

DXUS YUWE SAN LUKAS FXI'JNI

Teofxilo's neewe'wena fxi'jni

1 ¹⁻⁴ Adx namiku Teófxilo, idxa's khiyu'jna fxi'jaçthu kwe'sx ensu na'wē yuuk txā'sna. Txā'sa' txā'wē yūuya' takheçýna, Kristo yakh u'jusawe'sxa' ma'wēçxahne'ta ew uy txā'wēytxi txāawe'sxa' kwe'sxtxi pta'sx, açà' txā'sa' maawa txā'wēyta ew pta'sxna fxi'jçxa nvxiit wēe. Txāa pa'ga adxwa ma'wēçxahne' yūu txā'sa' wala ew jxpa'yakx paapējççxa idxna pta'sxna fxi'jaçthu, kxah isa yuh pta'sxi'ne'ta sūjūne'ga.

Juan Bautista upxwa'ja's pta'sxni

⁵ Judea kiwete ne'jwe'sx Herodes ensu', teeçx sacerdote Zakarias yaasesak u'pu'. Txāa yu', sacerdote ne'jwe'sx Abias ji'kh yu'. Açà' txajx nyu Elisabet yu', Aarón ji'kh yu'. ⁶ Ptamí Dxus jxkaahnitxi' nwēesē'jsatx yu', txāa pa'ga Dxus dxi'pte ew fxi'zesatx yu'. ⁷ Nawa txāawe'sxa' luuçx ji'phmeetx yu', Elisabetha' luuçx ji'phuwa'jsameene' yu' naa pa'ga. Khīçxawa wala thē'khwe yā'j yu'tx.

⁸ Zakarias yakh ūssawe'sxtxi dxuus yatte selpiwa'j en āhte', na'wēk yuu: ⁹ Dxuus yat altalte wēt putasá incienso's kabxa' u'kawa'jsa kimtewa jiyuya', sacerdotewe'sxa' swerte na'wēsa kutxi'jtx. Açà' kxteea' Zakariasku kaseh. ¹⁰ Txajū' Zakarias' Dxus altalte wēt putasa's kabuçte', nasa pa'jsa' jxukaysa ekajuçxáatx Dxus yakh puutx we'wena ūsu'. ¹¹ Naapkaçxha' Zakarias'a's vxyaak Dxus jxkaahni teeçx angel altal pukate paçu ju'gte. ¹² Açà' Zakarias' txā's uyçxa', kuh yajkxna wala ūukhku. ¹³ Nawa txāa angel yu' na'jīk:

—Zakarias, ūukhnu. Iidx pxtxaa we'weni's Dxus pasçxa kxtey yuuça', açà' iidx nyu Elisabetha' luuçx ji'phuna. Txāa luuçxa's Juan yasene'ga. ¹⁴ Txā'wē yuute', idxa' wala weçxana neeyūune'ga, açà' maawa txā'wēçxaxáa weçxaatxna txajx upxni's jiyuçxa', ¹⁵ txāa pa'gatey txāa luuçxa' Dxus dxi'pte walasa yuuwa'jsa'. Txāasa kīhwa ktū'ju'jwa'jsa yu'sa' tudxmeena, naasáa Dxus Espiritu yuuçxáana ūuste

jxuka ji'phuna njí'j tutxhu yuu kasehmey. ¹⁶Sa' Israel kiwesuwe'sxtxi maazkuēsatxwa taki'sa Dxus tasxtey ki' kuutxa'jana. ¹⁷Txāa Juana' Dxus Nçxi'k yaçte pekūjuna, sa' Dxus yuwe pta'sxsa Elias Espiritu kīhtewa ājawa'lja'sa' ji'phu'k txā'sna fiçxáa ji'phuna. Txāasa neywe'sxtxi luuçx yakh kaapu'ljmée kaafxi'ze'jena, sa' nwēesē'jsameetxwa nwēesē'jya' kaapiya'jana. Txā'wē yūuna nasatx pheu'juna Dxus Nçxi'ka'sa' jxpa'gakahn jíte', ¹⁸Zakariasa' na'jīnak pējx:

—Kwe'sxa' ptamíi wala thē'jyā'tha'w, aça' çma'wē yūuçxa iidx txā'jīni' kxtey yuune'thewa ew jii neeyūuki'th? jīk. ¹⁹Aça' Dxus angela' pta'sxku:

—Adxa' Dxusna selpiina fxi'zesa Gabrielthu. Txāa pa'gak adxa's jxkaah, idxa's naa yuwe ewsa's pta'sxkahn. ²⁰Nawa adx pta'sxni's txā'wē dxih yuuna sūhmeeg naa pa'ga açxhíi we'weya' ewumée neeyūune'ga iidx nçxi'k upxpkaçx jīk.

²¹Dxuus yat dxiite txā'wē jxthēeyūute', ekaju nasa yu' Zakariasa's ūythasnatx ūsu', çkīh yuuçxaki'k txakwe jxthēeyūu? sūhna. ²²Txajū' Zakariasa' kasehçxa', we'weya' ājāmeeçxa', kuseju vxijxaçxaçxáak khiyu'ju'. Aça' txā'wē yūute', dxuus yat dxiite kīja' uyyuhne' sūjū'tx nasa yu'. Sa' Zakariasa' txā'wēesa neeyūuk.

²³Dxuus yatte selpiina jxā'jçxa', Zakariasa' txajx yatna u'kh. ²⁴Txāa ensu' Zakarias nyu Elisabetha' nasa ji'ph neeyūuçxa', txajx yatu kasehmeeq u'pu' tahç a'tepkaçx, naa sūhna: ²⁵Åçxha' ū'kwe Dxusa' na'wēk yūu, aça' nasa' ū'kwe's peena yu' açewe'wemeetxna sūhna.

Jesus upxwa'ja's pta'sxni

²⁶Elisabetha' nasa ji'ph neeyūuni seis a'teju', Dxusa' angel Gabriela's Galileasu teeç çxhab Nasaret yaasesatek kaah, ²⁷teeçx kna'sa Maria yaasesa yatte pa'jçxa' yuwe pta'sxkahn. Txāa kna'sa yu', teeçx piçthē'j Jose yaasesa yakh iimi'ya' puutx we'weçxak u'p yu'. Txāa Jose' jxkaahsa Davxid ji'kh yu'. ²⁸Aça' Dxus angela' Maria u'pnite pa'jçxa' na'jīk:

—Dxusa' ijçxa yakh ūsa', naa pa'ga Dxus bediconal's maa maa u'ytewa jxthaakwe jxpa'gaçxa u'pi'çxa. Txāasa weçxana me'pçxi ewçxáa jíte', ²⁹Maria' Dxus angel we'weni's wēsē'jçxa thegçxa', kujk yajkx çma'wēteki'k txā'jī'? sūhna. ³⁰Aça' Dxus angela' na'jīk:

—Maria, ūukhnuçx, Dxus peeygāanisa i'çxa. ³¹Txāa pa'ga açxhíi teeçx luuçx pihç ji'ph neeyūuçxa txā'sa' Jesus yasene'çxka. ³²Txāa luuçxa' jxtuhthe walasa yuuwa'lja'sa. Txāasa cielute Dxus Nçxi'k ya'kxsusuna. Aça' txā'sa' Dxusa' jxkaahwa'lja'sa vxituna, yaçgathē'j Davxid na'wēysa. ³³Kxah Israelwe'sxtxi kiiwey jxkaajana, nawa txajx jxkaahni' bagaçxte yuhwa pçumeena jīk.

³⁴Txajū' Maria' txāa angela's pējxku:

—çMa'wē txā'wē yuja' yūukx? Ū'kwe' kna'sa nmi' ji'phmeeth açyuja' jíte', ³⁵angela' na'wēk pta'sx:

—Dxus Espiritu' içxa kakwe's txãaçxaçxáa jxuka iiyamuna. Txã'wě yuuniteçxáa nasa vxyaana. Txãa pa'ga luuçx upxsa' Dxus jii yuuna, sa' Dxus Nçxi'k ya'kxsusuna. ³⁶Txã'wěy içxa pukakhě nyakh Elisabethwa luuçx pihç jì'phuya'wa', thě'khuě yã'jçxawa. Bagaçx yuhwa nasa jì'phusameeçxawa, açxha' seis a'te yã'j yuuça' nasa jì'phuni. ³⁷Dxus yakha' kîh yuhwa thěysa yu' meea' jîna pta'sxte', ³⁸Maria pasçxa':

—Txã'wě', ù'kwe' Dxusna selpisáa ne'tka, aça' ù'kwe's Dxusa' kxtey yuuna na'wěg pta'sx txã'sa' jîk.

Txajû' Dxus angela' Maria tasxu txuteena u'kh.

Elisabet tasxna Maria u'jni

³⁹Txãa ensuy Maria' jxthěyüümée u'kh Judea thã'jsu teeçx çxhab üsu'k kxtee pa'jya'. ⁴⁰Sa' Zakarias yatte pa'jçxa', Maria' Elisabetha's weçxak. ⁴¹Maria weçxana we'weni's wěsě'jeçpkaçxha', Elisabet nasa tutxhtewe'sxa' ěsěk. Naapkaçxha' Dxus Espiritu' Elisabet üuste jxuka kaajiyu'kh. ⁴²Aça' Elisabetha' Maria's na'jînak sus we'we:

—Dxusa' ijçxa's maa maa u'ytewa jxthaakwek bedekîy, sa' txã'wěyku içxa nçxi'ka'swa bedekîy. ⁴³Aça' ù'kwe' çkîhte seelpitka açga ù'kwe's Nwe'wesa njî'ja' thegya' pa'já'? ⁴⁴Içxa weçxana we'weni's wěsě'jeçpkaçxha', ù'kwe luuçx tutxhtewe'sxa' ěsěk weçxana. ⁴⁵Dxus we'weni' kxtey yuuna sũhpa'ga, kxtey yuuya'wa' aça' weçxana mfxi'zeçx jîk. ⁴⁶Aça' Maria we'weçxa':

Ù'kwe' üusuh jxukath Dxusa's weçxá'.

⁴⁷Sa' ù'kwe Dxus nwe'wesa's üuste peçxkanameeth weçxana fxi'ze'.

⁴⁸Txã'wě makwe pxthaa ähmeekuětewa, Dxusa' peeygähçxa txã'sna selpiwa'jsa vxitku.

Aça' açxhüyã'ja' ù'kwe's Dxus txhitxhnisak yu' jîna nes yuutxna maa nasawa jxuka.

⁴⁹Txã'wě yaakxkahníçxáak Dxus txakwe walasa ù'kwe's txakwe ew yüu.

Txã' wala peeygáasa'.

⁵⁰Txãasa maawa txã'sna nwéesě'jsatxi' bagaçxtewa peeygähna nes yuuna.

⁵¹Dxusa' kîjkîhnawa jxukak vxit, sa' üuste iwejçx yaakxsatxwa kpaasu'jme'.

⁵²Jxkaahsatxwa txãawe'sx jxkaahnijü kutxi'kh,

Sa' kîhtewa ähmée pxthaakuēsatxi' walasak vxit.

⁵³Kîhwa jì'phmée peejiina fxi'zesatxi' txãawe'sx peejiini's jxukak üs.

Sa' wala jì'phsa yuutxi'sa' kîhwa jì'phmeek nvxiht.

⁵⁴Txã's selpisáa Israel nasatxi' pu'çxku,

Sa' peeygähna fxi'zewa'ja's peçxkaname'.

⁵⁵Ma'wěne' kwe'sx yaçgawe'sx Abrahamwe'sxtxi bagaçxtewa ew yüuya' neeyüu, txã'sa' kxteyku yuu jîk.

⁵⁶Txajü' Maria' Elisabet yakh tekx a'te u'pçxak txajx yatnay ki' sxawedna u'j.

Juan Bautista upxni

⁵⁷Txãa ensu' Elisabet açã'wa'j ähte', luuçx pihç ji'phuk. ⁵⁸Aça' Elisabet nwe'sx vxite' namikuwe'sxwa jiyuçxa', weçxaya' u'jtx Dxusa' Elisabetha's txã'wë ew yūupa'ga.

⁵⁹Txajü' teeçx ki'sute', luuçxa's cirkuncidäyya' u'jtx. Sa' ney yase Zakariastxi ki'p wëe. ⁶⁰Nawa nji'j we'weçxa':

—Txã'wëmëe wejxwa Juan yasewa'ja' jite', pi'kxna u'jsawe'sx pasçxa':

⁶¹—I'kwe nwe'sxa' maa yuhwa Juan yaasesa meetx yu' açã' çma'wëtekwe Juan yase ki'p wëjê'? jî'tx.

⁶²Txajü' neya's pëjxtxi ma'wë yasewa'thewa. ⁶³Aça' neya' Juan yasewa'ja' jīnak fxi'lçxa ūs. Txã'wë yūute', jxukaysa kuhtx yajkxna neeyūu. ⁶⁴Txãa dudtey Zakarias ki' we'weya' ewuuçxa', Dxusa's seena' wala weçxak. ⁶⁵Txã'wë yūute', kxsū utxasū u'psa' wala ūukh we'wena neeyūutx. Aça' Judea thã'jsuwe'sxwa txã'wë yūuni's jxuka jiyutx puutx ya'pta'sxna. ⁶⁶Txã'wë jiyuçxa', na'wëtx yajkxna puutx paapëyī':

—Isa, txãa luuçxa' Dxus bedekīynisane' yu' sa' çma'wë yūuwa'jsakx? jī'tx.

Zakariasa's Dxus Espiritu kwe'we'jni

⁶⁷Txajü' Juan ney Zakariasa's Dxus Espiritu txajx ūuste kwe'we'the', na'jīnak äate pta'sx:

⁶⁸Israelwe'sxtxi jxpe'jsa Dxusa' kīhtewa jxuka ewsa'.

Kwe'sxa' txajx nasatha'w, açã' nwe'weya' kīhçxa', ewte nvxihtku.

⁶⁹Dxusna selpisáa Davxid jī'thewe'sx teeçx kaakh kīhtewa jxuka nwe'weya' äjāwa'jsa.

⁷⁰Nyafxiitey Dxus yuwe pta'sxsawe'sx yakhwa na'wëk puutx we'we nwe'weya' kaahwa'ja's:

⁷¹Kwe'sxtxi açesawe'sx kuseju nwe'weçxa ewte nvxiitu'nja,

⁷²Sa' kwe'sx yaçgawe'sxtxiwa peeygāhna, txã'wë adx puutx we'weni yuutxi' le'çxkuëçxáa yuhwa peçxkaname'nja jī'k.

⁷³Sa' kwe'sx yaçgawe'sx Abraham yakhwa txã'wëyku na'wë puutx we'wena jurāy:

⁷⁴Kwe'sxtxi açesawe'sx kuseju nwe'weçxa ewte nvxiitu'nja, açã' ūukhmëe mselpiwe,

⁷⁵Adx yuuçxáana nwëesē'jna uu entepkaçx jī'k.

⁷⁶Aça' adx nçxi'kkuë idxa' Dxus itxīsa yuweet pta'sxsa yuuçxa, kwe'sxtxi Nwe'wesa pa'jwa'ja's pheu'jna pekūjune'ga yaçte.

⁷⁷Kxah nasa' pkalpa'ga peltunāywa'ja's maawa jiyuçxa, ewte neeyūuwa'ja's jī'phutxna.

⁷⁸ Kwe'sx Dxusa' peeygãhçxa, cielujuy sek na'wẽ kaakweethe'kh,

⁷⁹ Çxhi'dxte uu ente na'wẽ yã'lj ũstewa, wēt eena'te nvxiht-ya'.

Sa' kwe'sxtxiwa jxpubamée ewte kaafxi'ze'jya'k txã'wẽ yũu jĩnak we'we Zakariasa'.

⁸⁰ Txajũ' Juana' walaana u'kh Dxus yuwe's jiyuna, sa' nasa u'pnmíeé kiwesuk u'p-ya' u'j, Israelwe'sxtxi pta'sxya' kasehwa'j en àhpkaçx.

Jesus upxni

(Mt 1.18-25)

2 ¹ Txãn ensu' Romate jxkaahsa Augusto Cesara' txajx jxkaahni kiwesu nyafxçxah nasatx jxuka eçte àsxkahn jxkaakh, ² Sirate u'psa ne'jwe'sx Cirenio yaasesa's. ³ Aça' jxukaysatx u'jwa'j ji'phu' txãawe'sx upxni çxhabte, eçte àsxkahn. ⁴ Txãa pa'gak Jose' Nasaret çxhab Galilea kiweju kasehna u'j Judea kiwen Belen çxhab Davxid upxnite, Jose' Davxid ji'kh yu' naa pa'ga. ⁵ Belenna u'jweççxa', txajx nyu yuuwa'jsa Maria yakhku u'j. Nawa Maria' nasak ji'ph yu'. ⁶ Aça' Belente ũs'fyna, Maria's açã'wa'j en àhte', ⁷ kxtee ji'phuk nyafx nçxi'kkuë's. Sa' paadeewa'j yat àhmeete', klaa sã'jĩni yattek luuçxkuë's yapçxa khikh.

Dxus angel piisxáa-thegsawe'sxtxi we'weni

⁸ Belen utxasu kuswa dehmeétx piisxáa-thegsa u'p yu'. ⁹ Naapkaçxha' Dxus angel teeçx vxyaak txãawe'sx u'pnisu jxuka eena' kweethna. Aça' txãawe'sxa' wala ũukhtxi. ¹⁰ Nawa Dxus angela' na'wẽk we'we:

— ũukhnuwe, yuwe ewsa jxũna yuhth, txã'sa' maawa jxuka wala weçxaatxna. ¹¹ Açxha' Davxid çxhabte teeçx upxku i'kwe'sxtxi nwe'wewa'jsa txã' Dxus kaahni Kristo'. ¹² Aça' thegya' u'jçxa', uyuune'kwe luuçxkuë's yapçxa klaa sã'jĩni yatga khikhni ũste jĩçpkaçxha', ¹³ txãa dudtey txãa angel yakh wala kuh angel cielujũwe'sx vxyaatx, Dxusna weçxana:

¹⁴ jDxus êe walatewe'sxa' seena' yuh ew yuuk!

Naa kiwete nasa wēt wēt fxi'zewa'ja's ũsku peeygãhçxa jĩ'tx.

¹⁵ Txajũ' angeleswe'sxa' cielun ki' sxawedna u'jweçpkaçxha', piisxáa-thegsawe'sxa' puutx we'wetx:

— Belenna u'jwega Dxus pta'sxni's thegya' kĩh yũutewa uyu'nja'w jĩna.

¹⁶ Txajũ' wala dud u'jtx Belenna, sa' Mariawe'sxtxi' uytxi txã'wẽ luuçxkuë's klaa sã'jĩni yatga khikhçxa u'pte. ¹⁷ Sa' luuçxa's uyçxa', Dxus angel ma'wẽ we'weni'swa jxuka pta'sxtxi Mariawe'sxtxi. ¹⁸ Txajũ' vxitetxwa txã'wẽçxaçxáa pta'sxte', wala kuh we'wena neeyũutx. ¹⁹ Nawa Maria yu', txã'wẽ yũuni's jxuka peçxkanamée ũusteçxáak yajkxna fxi'ze'.

²⁰ Txajũ' piisxáa-thegsawe'sxa' Dxus angel ma'wẽ pta'sxtewa txã' kxtey yuutewa uyçxa', Dxusa's wala weçxana sxawedna u'jtx.

Jesus le'çxkuēyna Dxus yatna jxūna u'jni

²¹ Upxnijū teeçx ki'sute! luuçxkuē's cirkuncidāyya' u'l'çxa txāa entey JESUS yasetx, Maria nasa ji'phumeyna Dxus angel ma'wēne' yase's pta'sx txā'wēytxi yase.

²² Moises leya' nasate āçā'satx ma'wēne' ki'skaja' aça' Maria' txāa entxi kxtey yuuçxa', Jose yakh luuçxkuē's Jerusalen çxhabna jxūna u'l'jtx, dxuus yatte Dxusna weçxana neewe'weya'. ²³ Dxus leyte we'weçxa': Nyafxte piçkuē yūute', Dxus jii nvxiitwa'ja' ji'k txāa pa'gatx Dxusna neewe'weya' u'l'. ²⁴ Vxite ahte Dxus leyte we'weçxa': e'z tub çxihme meeçxawa tub luuçx jxūna u'l'çxa dxuus yatte ikhwa'ja' ji'k aça' txā'wēy yūuya' u'l'jtx.

²⁵ Txān ensu' Jerusalen çxhabte' teeçx piçthē'j Simeon yaasesak u'pu'. Txāa piçthē'ja' Dxusna yuuçxáak neewe'wena fxi'zesa yu', çbagaçx Israelwe'sxtxi nwe'wewa'jsa pa'jakx? sūhna üythāsna. Aça' Dxus Espiritu' Simeona's kaajiyu'kh ²⁶ Nwe'wewa'jsa Dxus kaahni Kristo's uumey uywa'ja's. ²⁷ Sa' Dxus Espiritu' Simeona's kaayaki'kh dxuus yatna u'l'jwa'ja's, aça' u'l'çxa' uyku txā'wē Jesus nji'l'jwe'sxa' Dxus ley jxkaahni's kxtey yuuya' Jesusa's nuypa'jaçte. ²⁸ Aça' Simeona' txāa luuçxkuē's yakhçxa na'jīnak Dxusna weçxa:

²⁹ Idxa' adx yakh puutx we'weni's kxtey yuug na' āçxhā' adx uuwa'ja's üsune'ga weçxana uukahn.

³⁰ Nwe'wesa's nasa jxukaysa dxi'pte kaag.

³¹ Aça' txā'sa' adx yafxju yuu uythu.

³² Txāaí Israel nasa meetxwa eena' kweethwa'jsa' na' Israelwe'sx yuutxi' jweeíçxáa weçxweçxa kaayaki'jwa'jsa' ji'k.

³³ Simeona' txāa luuçxkuē's txā'wē we'wete', Jose ptamwe'sxa' kuhtx yajkxna neeyūu. ³⁴ Aça' Simeona' bedekiçxa', Jesus nji'j Maria's pta'sxku: —Mwēesē'çx, naa luuçxkuē' Israelwe'sxtxi wala kçxhāaçxha'jwa'jsa' nawa txā'sna jiyusamée yu' wala jxpubawa'jsata'. Mpa'yajkxwe wakx txā'sa' wala açetxna. ³⁵ Aça' maaçxah txā'wē açewa'jsatxna aça' maaçxah txā'wē jxpa'gawa'jsatewa txā'wē yūunisa içxa üusuy we'thu yājāni na'wē yuuna jik.

³⁶ Kxteea' Fxanwel niisa, Aser ji'kh üsu' wala thē'khuēsa Ana yaasesa. Txā' Dxusna selpisaak yu' sa' wala kna'satey iimi'k nawa siete anxute' nmi'a' uuk. ³⁷ Åçxha' nmi' uuni oçxenta y kuarto anxu', nawa dxuus yatte pu'vxitumée een isak Dxusna selpiina, orāyna nes yu'. ³⁸ Sa' Ana' utxaana kühçxa, Dxusna weçxaçxa' pta'sxku Israelwe'sxtxi nwe'wewa'jsa's üythāsna üssawe'sxtxi's: Naa luuçx txā'wē yūuwa'jsa' jīna.

Nasaretna sxawedni

³⁹ Txajū' Dxus jxkaahni leya's kxtey yuuçxa', Galilea kiwesu txāawe'sx çxhab Nasaretnay Maria Josewe'sxa' sxawedtxi. ⁴⁰ Aça' luuçxkuē'

walaana u'kh Dxus yuwe's jweefiçxáa piyana, txã'sa' Dxusí pu'çxhi'ne' naa pa'ga.

Jesus doce anxu ji'phçxa Jerusalenna u'jni

⁴¹Jesus nji'jwe'sxa' anxu iisatx Jerusalen çxhabna Paskua fxiestan u'jwe'. ⁴²Sa' Jesus doce anxu ji'phpkaçxha', Jerusalen çxhabna fxiestate ki' u'jtx, ma'wëne'ta anxu iisa u'jwe' txã'wëy. ⁴³Aça' fxiesta pçuute', Maria Jose yakh sxawedna u'jtx. Sa' txãawe'sx jiyunimeete Jesusa' Jerusalentee neeyüuk. ⁴⁴Nawa nji'jwe'sx yu', Jesusa' nasa wala ksxavxyte yuhna sühnaçxáatx teen uta dxi'the u'j. ⁴⁵Txajü' nwe'sx ksxavxysu jxuka pakweçxawa uymeçxa', Jerusalen çxhabnay pakweya' sxawedtxi. ⁴⁶Sa' tekh ensu' dxuus yatte ley kaapiya'jsawe'sx ksxavxyte wësë'jna paapëjxna u'ptetx uy. ⁴⁷Txã'wë luuçxkuëçxáaçxawa txakwe wala leya's jiiçxa ew paste', jxukaysa kxtee wësë'jna üssa' wala kuh yaaki'tx. ⁴⁸Txajü' nji'jwe'sx uyçxa', kuhtx yajkx sa' nji'ja' na'jik:

—Idxa' çkijxa'ga pta'sxmée txã'wë neeyüu? Kwe'sxa' wala nxusna pakwetha'w jite', ⁴⁹Jesus pasçxa':

—Adxa' Adx Tata jxthäasniçxá's selpiina u'pthu aça' çkijxa'kwe adxa' pakwé'? jite', ⁵⁰txajx pasni'sa' jiyuya' äjámeeta.

⁵¹Txajü' Jesusa' neywe'sx yakh Nasaretnay sxawedna u'jçxa txãawe'sxtxi nwëesël'jak fxi'ze. Açá' txajx nji'ja' ma'wë we'weni'swa jiyumeçxawa txajx üuste peçxkana yu' meek yajkxna fxi'ze'. ⁵²Txajü' Jesusa' walaana u'kh Dxus yuwe's jweefiçxáa piyana, sa' Dxus dxi'pte ew yüuçxak fxi'ze, nasaa dxi'ptewa txã'wëy.

Juan Bautista nasa u'pnimée kiwesu Dxus yuwe's pta'sxni

(Mt 3.1-12; Mr 1.1-8; Jn 1.19-28)

3 ¹Tiberio Cesar Romate jxkaahna u'pni kince anxusu' Poncio Pilato' Judeate ne'jwe'sxku yu' açá' Herodesa' Galileate ne'jwe'sxku yu'. Naapkaçxha' txajx nyakh Fxelipe' Iturea vxite' Trakonitete ne'jwe'sxku yu'. Açá' Lisaniasa' Abiliniate ne'jwe'sxku yu'. ²Naapkaçxha' sacerdote npiçthë'jwe'sx yu' Anas vxite' Kaifxas txãawe'sxtxi yu'. Txän ensuk Dxusa' txajx yuwe's nasa u'pnimeesu pta'sxya' u'khan pa'ya Zakarias nçxi'k Juana's. ³Açá' Juana' Jordan yu'wala utxasu msuu msuuya jxuka peküjk nasatx pta'sxna:

—I'kwe'sx pkaltxi nvxihtçxa Dxus tasxte sxawedçxa yu'te mkhëwe ya'bautisäyna, i'kwe'sxtxi Dxus peltunäykahn jì'k. ⁴Dxus yuwe pta'sxsa Isaias na'jina fxi'jni' kxtey yuuk:

Nasa u'pnimée kiwesu sus we'wenik pthüuse' na'jina:

Dxus pa'jwa'ja's mpheujwe,

Txã' thëymée pa'khan.

⁵Kiwe kafx u'psuwa jxuka yuutawa'j yuuna,

Sa' thã'j wala vxite' vxiç ma'k yuu nawa jxuka uukwe'jni yuutxna.

Dxi'l'j ta'gusawa ku'le'jni yuutxna.

Dxi'l'j ewmeesa's pheu'jni yuutxna.

⁶ Aça' nasa jxukaysa uyuutxna nwe'wewa'jsa Dxus kaahnisa's jîna fxi'jni'.

⁷ Juan tasxte ya'bautisãyya' pa'jsatxi' na'jînak we'we:

—I'kwe'sxa' ul weesweesa ji'ji'kwe, txãa pa'ga kastigo seena'sa yuja' aça' txajü iyuwa'ja's çimnga pta'sx? ⁸ Txã'wê kastigo seena'saju iyuwa'ja's jiyuyã'lçxa', ewçxáa yûuna mfxi'zewe, kxah maawa uysa': Naawe'sxa' pkaltxi' nvxihtçxa Dxus tasxte sxawed yuhta sÿjÿtxna. Txã'ljite', kwe'sxa' Abrahan ji'tha'w sÿhna iwejçx yajkxna fxi'zewa'jme'. Na'jî'th na': I'kwe'sxçxáamée naa kwet yuhtxwa Abrahan ji'l'j vxit-ya' äjãna Dxusa'. ⁹ Txã'wê ewçxáa yûuna fxi'zemeete', ama' ih yã'j üsa' fxtüu tasxtxi spê'thya'. Maa fxtüu tasxwa ew yünmeena aça' spê'thçxa ipxte kabwa'lçxáa yuuna jînak yu'kxpeh.

¹⁰ Txã'ljite' nasa' paapëjxtxi:

—çKîhçxa yûuna ewçxáa fxi'zekxtha'w? jite', ¹¹ Juan pasçxa':

—E'z atxh ji'phçxa', ji'phmeesa'sa' teeçx üswa'ja'. Aça' ü'niwa jxthaakwe ji'phçxa', vxite ji'phmeesa's puuçwa'ja' jîk.

¹² Txã'wëy gobierno jîi vxuyu pkhakhsawe'sxwa yu'te ya'bautisãyya' utxaaçxa', Juana's na'wëtx paapëjx:

—Mpeeta'sx, kwe'sxa' çma'wë yûuna fxi'zekxtha'w? jite', ¹³ Juan pasçxa':

—Ley makwene' vxuyu's pëykaja' txã'sçxáana mpëjxwe, îsxîiçxa thaakwe pëjxmée jîk.

¹⁴ Txajü' soldauwe'sxwa maafí yü' txã'wëy pëjxtxi:

—Kwe'sxa' çma'wë yûuna fxi'zekxtha'w? jite', txãawe'sxtxiwa pta'sxku Juana':

—Maa nasa yuhtxwa juuna' we'weçxa txãawe'sx jîitx kusa'ljuuwe kîh yuhnawa. Sa' kîh yuhwa yuuwemeetewa îsxîiçxa pãatxhî'khna fxi'zenuwe. Sa' i'kwe'sxtxi makwe dewetewa txãa yakhçxáa weçxana mfxi'zewe.

¹⁵ Txã'wë we'wena üste', nasa wësê'jsa yu' wala yajkxna üsu'tx: Meeçxa' çnaa wáa Kristona? sÿhna. ¹⁶ Aça' Juana' jxukaysatx pta'sxku:

—Adxa' bautisãyna naasáa yu'teçxáath akhe'. Nawa adx e'suh vxite yuja', txã' Dxus Espiritu ipx na'wësa's i'kwe'sx üuste kxu'akhe'jya' äjãwa'jsa'. Aça' adxa' txajx pelgatxi weçxáa yuhtxwa khihbxa' äjãwa'jmeesath. ¹⁷ Txã' yujxa' skuutxh kweejxa'jni plaatu's kusete at yã'lçxa üsa'. Sa' kweejxa'lçxa skuutxha's jxaawuuna, nawa tama'sa' ipx bagaçxte yuhwa üçxhawa'jmeesate kabuna jîk.

¹⁸ Txã'wëk wala kuh jwed yu'kxpehna Dxus yuwe's pta'sxi' Juana'. ¹⁹ Sa' neljwe'sx Herodesa'swa yu'kxpejk txã'wë nyakh Fxelipe nyu Herodiasa's

kusa'jçxa, txãa yakh nyu na'wẽ fxi'zeçxa vxite' kîhwa ewmeeçxáak yũuna ũsu'. Aça' txãa pa'gak txã'wẽ yũuwa'jme' jîna yu'kxpeh Juana'. ²⁰Nawa Herodesa' nwẽesẽ'jepkaçxte jweeifiçxáak thaakwe ewmée yũu, Juana's karcelte kaakxuupha'jna.

Jesus ya'bautisâyni
(Mt 3.13-17; Mr 1.9-11)

²¹Txã'wẽ yũumeyna Juana' nasatx yu'te bautisâyna ũste', Jesuswa pa'jçxa yu'te ya'bautisâyku. Sa' oraïçpkaçxha', cielu' phaatek. ²²Aça' Dxus Espiritu' Jesus kajkwete tub çxihme na'wẽsak vxyaana kîh. Naapkaçxha' cieluju na'wẽ we'wenik pthũuse:

—Idxa' adx Nçxi'k wala wedxnisag, aça' iidxpaga' wala weçxana ũsthu jîni.

Jesukristo ji'j nyafxiiteywe'sxtxi pta'sxni
(Mt 1.1-17)

²³Jesusa' treinta anxu ji'phçxak Dxus yuwe's pta'sxya' takh. Jesusa' Jose nçxi'ka' jînisak yu'. Josea', Eli nçxi'kku yu'. ²⁴Elia', Matat nçxi'kku yu'. Matatha', Levxi nçxi'kku yu'. Levxia', Melki nçxi'kku yu'. Melkia', Jana nçxi'kku yu'. Jana', Jose nçxi'kku yu'. ²⁵Josea', Matatias nçxi'kku yu'. Matatiasa', Amos nçxi'kku yu'. Amosa', Nahum nçxi'kku yu'. Nahuma', Esli nçxi'kku yu'. Esli', Nagai nçxi'kku yu'. ²⁶Nagaia', Maat nçxi'kku yu'. Maatha', Matatias nçxi'kku yu'. Matatiasa', Semei nçxi'kku yu'. Semei', Jose nçxi'kku yu'. Josea', Juda nçxi'kku yu'. ²⁷Juda', Joana nçxi'kku yu'. Joana', Resa nçxi'kku yu'. Resa', Zorobabel nçxi'kku yu'. Zorobabela', Salatiel nçxi'kku yu'. Salatiela', Neri nçxi'kku yu'. ²⁸Neri', Melki nçxi'kku yu'. Melkia', Adi nçxi'kku yu'. Adi', Kosam nçxi'kku yu'. Kosama', Elmodam nçxi'kku yu'. Elmodama', Er nçxi'kku yu'. ²⁹Era', Joswe nçxi'kku yu'. Joswe', Eliezer nçxi'kku yu'. Eliezera', Jorim nçxi'kku yu'. Jorima', Matat nçxi'kku yu'. ³⁰Matatha', Levxi nçxi'kku yu'. Levxia', Simeon nçxi'kku yu'. Simeona', Juda nçxi'kku yu'. Juda', Jose nçxi'kku yu'. Josea', Jonan nçxi'kku yu'. Jonana', Eliakim nçxi'kku yu'. ³¹Eliakima', Melea nçxi'kku yu'. Melea', Mainan nçxi'kku yu'. Mainana', Matata nçxi'kku yu'. Matata', Natan nçxi'kku yu'. ³²Natana', Davxid nçxi'kku yu'. Davxida', Isaí nçxi'kku yu'. Isaía', Obed nçxi'kku yu'. Obeda', Booz nçxi'kku yu'. Booza', Salmon nçxi'kku yu'. Salmona', Naason nçxi'kku yu'. ³³Naasona', Aminadab nçxi'kku yu'. Aminadaba', Aram nçxi'kku yu'. Arama', Esrom nçxi'kku yu'. Esroma', Fxares nçxi'kku yu'. Fxaresa', Juda nçxi'kku yu'. ³⁴Juda', Jakob nçxi'kku yu'. Jakoba', Isaak nçxi'kku yu'. Isaakha', Abraham nçxi'kku yu'. Abrahamana', Tare nçxi'kku yu'. Tare', Nakor nçxi'kku yu'. ³⁵Nakora', Serug nçxi'kku yu'. Seruga', Ragau nçxi'kku yu'. Ragaua', Peleg nçxi'kku yu'. Pelega', Heber nçxi'kku

yu'. Hebera', Sala nçxi'kku yu'. ³⁶Sala', Kainan nçxi'kku yu'. Kainana', Arfxaxad nçxi'kku yu'. Arfxaxada', Sem nçxi'kku yu'. Sema', Noe nçxi'kku yu'. Noe', Lamek nçxi'kku yu'. ³⁷Lamekha', Matusalen nçxi'kku yu'. Matusalena', Enok nçxi'kku yu'. Enokha', Jared nçxi'kku yu'. Jareda', Mahalaleel nçxi'kku yu'. Mahalaleela', Kainan nçxi'kku yu'. ³⁸Kainana', Enos nçxi'kku yu'. Enosa', Set nçxi'kku yu'. Setha', Adan nçxi'kku yu'. Adan yu', Dxus kuseju yuu pheu'jnisak yu'.

Eçxthêj Jesusa's ísxii wëeni

(Mt 4.1-11; Mr 1.12-13)

4 ¹Dxus Espiritu Jesusa's jxpe'jya' jxukate vxyaanijü', Jesusa' Jordan yu'walaju kasejk, aça' Espiritu' pe'jna u'kh nasa u'pnimeesu.

²Kxteea' kuarenta en kîh yuhwa ü'mée u'pçxa', wëek. Aça' eçxthê'ja' pa'kh ewmée vxit wëeçxa. ³Sa' pa'jçxa na'jîk:

—Dxus Nçxi'k dxihçxa', naa kweta's pan myuukaah jîte', ⁴Jesus paşçxa':

—Nasa' pan yakhçxáa yu' îtxî fxi'zemeetxna, naasáa jxuka Dxus we'weni yakh yuuçxáa îtxî fxi'zetxna jîna fxi'jni üsa' Dxus librute' jînak pas.

⁵Txajü' eçxthê'ja' teeçx thã'the Jesusa's pe'jna u'jçxa', txáa vxîçu mtee mtee çxhab walatxwa kaavxya'ja'jçxa, ⁶na'jîk:

—Naa çxhabtxi petx kiwe kîjkihtxwa jxuka idxçxaçxá's üsu'nja. Na' jxuka adx kuseteçxaçxáa dukhnisata' aça' maawa adx wedxnisa yu'sa' üsuçxá'nja. ⁷Idxwa adx tasxte peejxükweçxa neewe'wene'ga aça', jxuka iidx jîiçxaçxáa yuutxna jîte', ⁸Jesus paşçxa':

—Idxna jxpe'jsa Dxusçxá's neewe'wewa'ja', sa' txáaçxá's selpiwa'ja' jî'k Dxus librute aça' eçxthê'j adx tasxu me'j jîk.

⁹Txáa e'su', eçxthê'ja' Jesusa's Jerusalenna pe'jna u'jçxa, dxuus yat êete kaateka'jçxa' na'jîk:

—Dxus Nçxi'k dxihçxa', kute ayjxu müph kiwekhê.

¹⁰Txáa pa'gatey Dxus librute we'weçxa': Txajx angeleswe'sxtxi jxkaajana idxa's nwe'wekahn. ¹¹Aça' angeleswe'sxa' kusete jxpa'gatxna, iidx çxida kwette kpã'yüukahmén jîte',

¹²Jesus paşçxa':

—Dxus librute': Idxna jxpe'jsa Dxusa's jxkaahwa'j jî'phmeeg jî'k jîna paste', ¹³eçxthê'ja' äjámée yã'jçxa', Jesusa's nvxihtçxa u'kh sa' maz en yu' vxyaame'.

Galilea kiwesu Jesus mjüiya' takhni

(Mt 4.12-17; Mr 1.14-15)

¹⁴Txajü' Jesusa' Dxus Espiritu jxpe'jni ki' Galileate sxawedna pa'the', txáa kiwesu nasa' jxuka Jesusçxaçxá'stxi we'we' kîjkihwa yü'k jîna.

¹⁵ Txajü' Jesusa' judiuwe'sx pkhaakhenisu Dxus yuwe's kaapiya'the', jxukaysa wala weçxana tuuthe'je'tx.

Jesusa' Nasaretna u'jni
(Mt 13.53-58; Mr 6.1-6)

¹⁶ Txajü' Jesusa' Nasaretnak u'j, txajx walaní çxhabna. Sa' kxte pa'jçxa', sapatu jxkaase ensu' ma'wëne' yü' txä'wëy, judiuwe'sx pkhaakhenite u'kaçxa yujuk Dxus libru's lëeyya'. ¹⁷ Aça' Dxus yuwe pta'sxsa Isaias libru'stxi üs. Aça' na'wë fxi'jnikhëk libru's phaade:

¹⁸ Dxus Espiritu' adx yakh üsa',

Txäasak adxa's txhitxh yuwe ewsa's puupletx pta'sxkahn.

Üuste nxusna u'psatxku kvxiisxa'jya' adxa's kaah,

Yuuwesa preesutx nwe'wewa'ja'sku pta'sxya' kaah,

Sa' uysameetxi' kaayuujna,

Pkxuunisatxi' nwe'weçxa,

¹⁹ Jxukasa weçxana neeyüuwa'j anxu äani's pta'sxya'k kaah jini's lëeyçxa',
²⁰ Jesusa' libru's aphçxa, judiuwe'sx pkhaakhenite pu'çxsa's dukhna'wa, kaçxku. Aça' jxukaysa judiuwe'sx pkhaakhenite üssa' ivxiitumeetx Jesusa's thegna neeyüu üythäsna. ²¹ Aça' Jesusa' na'jïnak pta'sx:

—Na'wë fxi'jnisa's wësë'ji'kwe txä' äçxhâ' kxtey yuuwa'j en äjk jïk.

²² Txajü' jxukaysa Jesusa's ewçxáatx we'wena kuh yajxna neeyüu, txä'wë zhiçxkwe pta'sxte'. Sa' puutx paapëyi'tx:

—Naa piçthë'ja' ¿Jose nçxi'k meená'? jïte', ²³ Jesus pasçxa':

—Isa yuuwa i'kwe'sxa' adxa's naa süjü'ne'kwe: Yu'çe'jsa, idxí mya'yu'çe'j. Sa' na'jïya'wane'kwe: Kapernaumte kïjkïhwa ew yüuk jini's wësë'je'tha'w txäatxi' txä'wëy myüu ayte iidx kiwetewa jïya'wane'kwe jïçxa', ²⁴ ki' we'wek:

—Isath we'we': Dxus yuwe pta'sxsa' peekx kiwesu' weeçxni yuuçxáa fxi'zetxna maawa. ²⁵ Dxus yuwe pta'sxsa Elias ensu Israel kiwesu' wala kuh vxiuda üsu'tx, na'wë tekh anxu y medio nus pa'lmeete', wala wëjë pa'kh txäa ensu. ²⁶ Nawa Dxusa' Eliasa's kxazkuë vxiuda tasxsu jxuka yu' kaahmëe, naasáa Sidon çxhab wala pukasu Sareptate teeçx vxiuda tasxte yuuçxáak kaah. ²⁷ Txä'wëy Israel kiwesu' wäljy weete wala äç'äsa üsu'tx, Dxus yuwe pta'sxsa Eliseo ensu. Nawa maa yuhtxwa nuykatxhímëe, naasáa Naaman Siria kiwetewe'sx yuuçxá'sku nuykatxhi jïte', ²⁸ wësë'lçxa', judiuwe'sx pkhaakhenite u'psa' wala üusaçxana, ²⁹ kiiteçxa Jesusa's çxhabuh kutxi'jtx. Txäa çxhab Nasaret yu', thälj vxiçgak üsu', aça' txäa penxa vxiçuhtx ukapajkxya'wa yu'.
³⁰ Nawa Jesusa' txäawe'sx ksxavxysu uymeyna skhëwçxa u'kh.

Eçx iiyamunisa
(Mr 1.21-28)

³¹ Txajü' Jesusa' Galileate Kapernaum çxhabte pa'jçxa', sapatu jxkaase ensu' Dxus yuwe's pta'sxna üsu'k. ³² Aça' nasa' wala kuh yajxna wësë'je'tx,

txā'wē Dxusa's nwēese'jwa'ja's ūukhnus pta'sxpa'ga. ³³Aça' kxte judiuwe'sx pkhaakhenite teeçx piçthē'j u'pu'k, eçx iyamunisa. Txā' susku na'jīna we'we:

³⁴—Jesus Nasarethuwe'sx, kwe'sxtxi' çkīhga yūu wējē'? Kuçx yuunu. Meeçxa' çivxiituya'wagá'? Idx kimtewa jiith. Idxa' Dxus kaahnisag jīte',
³⁵Jesusa' txāa eçx luuku vxit-sa's juuna'k na'jīna we'we:

—Sxuuna' myuu, sa' naa piçthē'j ūusuh mkaaseh jīte', txāa eçxa' txāa piçthē'ja's nasaa ksxavxysu pētççxa txajx ūusuh kasejk kīh yuhwa kpā'vxitmée.

³⁶Txā'wē yūute!, jxukaysa ūukhçxa txāawe'sx pwe'sx na'jīnatx puutx we'we:

—Jesusa' çkimki saki'k txā'wē juuna' jxkaahna we'weteçxáa eçx yuhwa nwēesē'jçxa' kaseje'? jī'tx.

³⁷Aça' Jesus txā'wē yūuni's msuuwa jxukatx wala tuuthe'je' txāa ja'dasu.

Pedro nyu nji'ja's Jesus nuykatxhini

(Mt 8.14-15; Mr 1.29-31)

³⁸Txajū' Jesusa' judiuwe'sx pkhaakhenijū kasehçxa', Simon yattek pa'j. Aça' Simon nyu nji'ja' wala kakwesekte açā'na ūsu'k. Txajū' Jesusa's pxthaa we'wena pta'sxtxi. ³⁹Aça' Jesusa' açā'sa tasxte kūhçxa kakwesek ūçxhakahn we'wek. Naapkaçxha' kakweseka' ūçxhate', kiiteçxa selpiiya' kasejk.

Jxuka çxhi'dxiçte maazkuēesatxwa nuykatxhini

(Mt 8.16-17; Mr 1.32-34)

⁴⁰Txajū' sek khējēçte', nasa kījkīh weeteçxah açā'satxwa jxuka Jesus tasxte nuypa'jtx. Aça' açā'sa kakwesu kuseju jxa'dxçxaçxáa jxuka nuykatxhik. ⁴¹Txāa açā'sawe'sx maai' yu' eçx luuku vxit-sa's ūuste jī'phtewa txāa eçxwa suhs na'jīna kasehtx:

—Idxa' Dxus Nçxi'kgu jīna. Txāawe'sxa' Dxus Nçxi'ktewa jiitx yu'. Nawa Jesusa' juuna' we'weçxa jwee yu' kwe'we'jme'.

Galileasu Dxus yuwe's Jesus pta'sxni

(Mr 1.35-39)

⁴²Khikhiiçte', Jesusa' çxhab eka jxu'j lajksxuk kaseh. Nawa nasa' kxteewa pakwena pa'jtx, vxite ahsu u'khamén neevxisxaya'. ⁴³Nawa Jesusa' na'wēk pta'sx txāawe'sxtxi':

—Dxus jxkaahwa'j yuwe's pta'sxwa'j jī'pthu vxite çxhabsuwa. Txā'wē yūuya' i'çxáa kaahnisath jīk.

⁴⁴Txāasak Galilea kiwesu judiuwe'sx pkhaakhenisu Dxus yuwe's pta'sxna pekūh.

Wedx ukhete wedx seena' wala khēeni

(Mt 4.18-22; Mr 1.16-20)

5 ¹Teeçx ente' Jesusa' Genesaret i'kh pukate ūste', nasa' kxtee zuuna'çxáatx utana pa'j Dxus yuwe's wēsē'j wēeçxa. ²Txajū' Jesusa'

e'z barko ìkh pukasu namu ji'phméé ùstek uy, namu wedx-uwesaawe'sx yu' kasehçxa, wedx ukhetx thethnatx ùs yu'. ³Aça' Jesusa' teeçx barko Simon jíte khēeçxa', yu'te wejkuē u'ljçxak, kxtee kaçxçxa, Dxus yuwe's pta'sx nasatx. ⁴Sa' Dxus yuwe's pta'sxna jxā'ljçxa', Simona's na'ljīk:

—Barko's ìkh wala pxāhte pa'j jxūna u'ljçxa txkhēe ukhe's makh wedx uweya' jíte', ⁵Simon pasçxa':

—Kwe'sxa' teeçx kus utatha'w mjīina pe'te, nawa teeçx wedxçxāa yuhwa uwemeetha'w. Nawa iidx jxkaahni's kxtey yu'nja jīçxa', ⁶kxtey yuute', wedx wala kuh khēetx, aça' ukhe' suteeçku yu'. ⁷Txajū' vxite barkote ùssatx pu'çxya' yuukahn kuseju pa'yatx. Aça' txāawe'sxwa kūhçxa', kasxisx pu'çççxa txāawe'sx jītewa āsxtxi. Nawa e'z barkotey utaçxa dujaaate', ìkh dxiikhē khēeya'watx yu'. ⁸Txā'wē yuute', Simon Pedro' Jesus tasxte peejxūkweçxa na'ljīk:

—Adxa' pkalsath aça' adx tasxu mtxutée jīk.

⁹Kxaazkuē wedx khēete', Simon Pedro' wala ùukhçxak txā'jī', aça' nasa kxtee ùssawa txā'wēytxi ùukh. ¹⁰Zebedeo nçxi'kwe'sx Jakobo Juan txāawe'sxa' Simon yakh wedx uwe pu'çxna u'ljusatx yu' sa' txāawe'sxwa txā'wēytxi wala ùukh. Nawa Jesusa' Simona's na'ljīk:

—Ùukhnu, āçxhūyā'ja' peena yu' wedx uwen u'ljumée nasatx Dxus jīi pkhakhsa yuune'ga jíte', ¹¹barkotx ìkh pukatee jxuka nvxihtna'wa Jesus yakh u'ljtx.

Teeçx piçthē'j wā'jy weete āçā'sa's Jesus nuykatxhini

(Mt 8.1-4; Mr 1.40-45)

¹²Jesusa' teeçx çxhabte ùste', teeçx piçthē'j wā'jy wee seena' kazx ji'phsak pa'j. Sa' Jesusa's uyna'wa, kīiçhuçxa peejxūkwēk na'ljīna:

—Adxa's nuykatxhiwā'ga ahçemeçxa' jíte', ¹³Jesusa' kuseju jxa'dxna'wa, na'ljīk:

—Ahçeme'nja, naa pa'ga katxhiçxa mneeyūu jīçpkaçxha', txāa wā'jy weeju katxhiçxak neeyūu. ¹⁴Aça' Jesusa' na'wēk jxkaah:

—Maa yuhtxwa pta'sxmeene'ga, naasāa sacerdotēçxā's iidx kakwe's txwesya' me'j. Sa' txāa weeju katxhipa'ga Dxusna peesune'ga Moises ma'wēga jxkaah txā'wēy, kxah nasa jxukaysa jiyutxna idx ew katxhiçxa neeyūutewa jīnak jxkaah.

¹⁵Tuuthe'khameetewa, nasa' jweefiçxāatx Jesus ew yūuni's tuuthe'je'. Aça' wēsē'jya' wala pkhaakhe'tx, āçā'satxwa kīh weejuwa nuykatxhikahn. ¹⁶Nawa Jesusa' nasa u'pnimeesu u'ljçxak, Dxus yakh puutx we'we'.

Ēsēya' ājasame's Jesus nuykatxhini

(Mt 9.1-8; Mr 2.1-12)

¹⁷Jesusa' teeçx çxhabte Dxus yuwe's pta'sxna ùste', kxteea' fxariseowe'sx vxite' Dxus leya's kaapiya'jsawe'sxwa Galileaju Judeaju vxite' Jerusalenu

txajūwe'sx pa'jçxatx kxsū kaççxa u'pu'. Aça' Dxus pu'çxni yakha' Jesusa' āçā'satxwa nuykatxhi'k. ¹⁸Txajū' ēšēya' ājāsameea's yakhçxa nuypa'jtx. Sa' Jesus tasxte pa'j nuykūh wēetx. ¹⁹Nawa nasa wala ūste', u'kaya' ājāmeēçxa yat ēete tejkaçxatx txkhē nuykīh āçā'sa's Jesus ūsnikhē. ²⁰Txajū' āçā'sa's yakhsawe'sxa' Jesusa' nuykatxhiyujuna sūhni's jiyuçxa', āçā'sa's na'jīk:

—Iidx pkala' peltunāyni yā'jtx neeyūu jīte', ²¹Dxus leya's kaapiya'jsawe'sx vxite' fxariseowe'sxa' ūuste na'wētx yajkxna u'pu': Naa piçthē'ja' çkiimna saga Dxusa's iiveeçx we'wé'? Dxus yuuçxāa pkaltxi peltunāyya' ājawa'jsa', aça' jweeju yu' çkimçxá' peltunāyya' ājāma'k? sūjū'tx.

²²Aça' Jesusa' txāawe'sx ūuste yaakxni's jiyuçxa' na'jīk:

²³—çKīh yūutekwe txā'wē yaakī'? çMaa thēyteesakx? Iidx pkala' peltunāyni yā'jtx neeyūu çjīniá'? Meeçxa': Kiiteçxa me'j çjīniá'? ²⁴Txā'wē thēysatewa Dxus Nçxi'k Nasa Yuusá' naa kiwete pkaltxi peltunāyya' ājawa'jsa' naa pa'ga kaajiyu'jya'wath açxha' jīçxa', txajū' txāa ēšēya' ājāsameea's we'wek:

—Idxa'sthū we'we': Kiiteçxa iidx deeni's tu'sçxa yatna me'j jīte', ²⁵dudtey txāa āçā'sa' kiitena' txajx deeni's tu'sçxa yatna u'kh, Dxusna weçxana tuuthe'jna. ²⁶Jxukaysa kxtee ūssa' wala kuh yajkxna we'wena, Dxusçxāanatx weçxana tuuthe'je' sa' txā'wē ūukhnawa na'jī'tx:

—Bagaçx yuhwa txā'wē yūunisa yu'sa' iuymeetha'w jī'tx.

Mateo's Jesus pa'yani (Mt 9.9-13; Mr 2.13-17)

²⁷Txāa skhēwa', Jesusa' kasehçxa', gobierno jīi vxyu pkhakhsa Levxi yaasesa's vxyu pkhakhnite kaçççxa u'pte uyçxa':

—Adx yakh myuh jīte', ²⁸Levxia' kiitena'wa kīhnawa jxuka nvxihtçxa Jesus yakh u'kh.

²⁹Txāa e'su', Levxia' txajx yatte fxiesta wala ewsa vxitku Jesusa's pi'kxçxa'. Aça' kxte' gobierno jīi vxyu pkhakhsawe'sx wala kuhsa vxite' nasa ma'wēsawa Jesus yakh ih mesate kaçxtxi. ³⁰Aça' fxariseowe'sx vxite' ley kaapiya'jsawe'sxa' Jesus yakh u'jusawe'sxtxi' na'wētx açewe'we:

—I'kwe'sxa' çma'wētekwe txā'wē gobierno jīi vxyu pkhakhsawe'sx yakh vxite' pkalsawe'sx yakh ū'wé'? jīte', ³¹Jesus paççxa':

—Yu'çel'jsa's jxpeejmeeta' aka jī'phmēe wēt ūssa', naasāa āçā'sa yuuçxāa yu'çel'jsa's jxpeejxta'. ³²Adxa' nasa ewsatx pakweya' kīhmeeth, naasāa pkalsatx pakweya'çxáath kīh, kxah ewmēe yūuna fxi'zeni's nvxihtçxa Dxus tasxte sxaweduutxna jīk.

Yūunani's Jesusa's pēyni (Mt 9.14-17; Mr 2.18-22)

³³Txajū' txāawe'sxa' Jesusa's na'wētx paapējx:

—¿Ma'wẽçxata Juan yakh u'jusa vxite' fxariseowe'sx yakh u'jusa txãawe'sxa' tahtatey yũunaana Dxus yakh puutx we'wena fxi'ze'? Naapkaçxha' idx yakh u'jusawe'sx yu' yũunameetx fxi'ze' jite', ³⁴ Jesus pasçxa':

—I'kwe'sxa' çptamu en fxiestate', pi'kxnisatxi' kaayũuna'jya' ajãma'kwe, novxio txãawe'sx yakh nee ũsiite'? ³⁵ Nawa novxio' txãawe'sx tasxu txuteewa'lj en pa'jana, txajũ isa yũunaatxna jičxa', ³⁶ naa ejemplo's kaaja'da'jnak pta'sx:

—Ropa iisx suteniite, tela u'sesa yakh ya'pã'khe'çme'. Txã'wẽme' tela u'sesa' jwee'içxáak sude' iisxsa's. ³⁷ Sa' txã'wẽy beka u'se aahnisa's slun iisxsate ya'awu'çme'. Txã'wẽme' beka u'sesa' slun iisxsa's sude'k, aç'a' beka yakh slun yakh e'zĩi vxitu'tx. ³⁸ Txãa pa'ga beka u'sesa's slun u'sesate awwa'ja'. Txã'wẽ yu', maa yuhwa vxitumeetxna. ³⁹ Aç'a' maawa beka jxaawniisa's tudxsa', beka u'sesa's yu' tudxya' wa'lu'k, jxaawniisaçxáa jxthaakwe ewa' jičxa.

Jxkaase entewa skuutxhtxi çxuktedeçxa ũ'ni

(Mt 12.1-8; Mr 2.23-28)

6 ¹ Teeçx sapatu jxkaase ente', Jesusa' skuutxh eshu u'jweçte', txãa yakh u'jusawe'sxa' skuutxhtxi ũhdena nxinxtxi sũupi'jçxa ũ'tx. ² Aç'a' fxariseowe'sx maafi yu' pẽjxtxi:

—I'kwe'sxa' çmjĩipa'gakwe mjĩi en meetewa txã'wẽ yũ' jite', ³ Jesusa' na'wẽk pas:

—I'kwe'sxa' Dxus librute iilẽeymeewá'kwe' Davxida' çkĩhga yũu? txãa yakh pi'kxna u'jusawe'sx yakh teeçx ente' wẽeçxa', ⁴ dxuus yatte u'kaçxa kxtee pantxi ũ'k, sa' txãa yakh u'jusawe'sxtxiwa ũsu'sku. Txãa pana' naasáa sacerdotewe'sxçxáa ũ'wa'the jiiçxawa txã'wẽk yũu. ⁵ Aç'a' Dxus Nçxi'k Nasa Yuusaawa makwe sapatu jxkaase entewa jxkaahwa'lj ji'pha' jĩk.

Teeçx piçthẽ'lj paçu kuse udxnisa

(Mt 12.9-14; Mr 3.1-6)

⁶ Vxite sapatu jxkaase ensu', Jesusa' judiwe'sx pkhaakhenite u'kaçxa, Dxus yuwe's pta'sxya' takhku. Aç'a' kxte' teeçx piçthẽ'lj paçu kuse udxnisak u'p yu'. ⁷ Aç'a' Dxus leya's kaapiya'lsawe'sx vxite' fxariseowe'sxa' Jesusa's peethegu'natx ũsu' txã'wẽ sapatu jxkaase entewa nuykatxhite' pãatxhĩ'khyal sũhçxa. ⁸ Nawa Jesusa' peethegu'sawe'sx txã'wẽ ũus yaakxni's jiyuçxa', na'ljik txãa piçthẽ'lj kuse udxnisa's:

—Kiiteçxa, nasaa pxãhte myuju jite', txãa piçthẽ'lja' nasaa pxãhtek yuju. ⁹ Aç'a' Jesusa' nasa kxte ũssatx na'ljik:

—I'kwe'sx çma'ljiki'kwe? Sapatu jxkaase entewa, pu'çxte çewmanx? meeçxa' çpu'çxwa'ljmeemanx? Nasa's nwe'wete çewmanx? meeçxa'

nwe'wemeete ζewmanx? jīçxa', ¹⁰Jesusa' nasatx thegçxa', txāa āçā'sa's na'wēk jxkaah:

—Kuse's mku'le'j jīçpkaçxha' txā'wēy yūute', txajx kuse' ewuuk.

¹¹Nawa vxitesa yu' wala ūusaçxatx, sa' puutx paapēyi'tx: Jesusa's ζma'wē yūuçxa ewmeete nvxiitukxtha'w? jīna.

Docesatx Dxus yuwe's pta'sxya' kaahni

(Mt 10.1-4; Mr 3.13-19)

¹²Txān ensuy Jesusa' Dxusna pējxya' u'kh thā'the sa' teeçx kus utak Dxusna pējxna pe'te. ¹³Sa' khikhyna sēhte', txā'sna pi'kxna u'jusa kuhsatx pa'yaçxa', doce nasa txhitxhku txajx jxkaahwa'j. ¹⁴Txāawe'sxa' naaçxahtx yu': Simon, txā'sa' Pedro yasek ki'p. Vxite' nyakh Adres, txajū' Jakobo, Juan, Fxelipe, Bartolomé, ¹⁵Mateo, Tomas, Alfexo nçxi'k Jakobo, Simon kananista nasa, ¹⁶Jakobo nyakh Judas, vxite' Judas Iskariote, Jesusa's açesawe'sx kusete dukhwa'jsa.

Nasa seena' wala kuhsatx Jesus kaapiya'jni

(Mt 4.23-25)

¹⁷Jesusa' txāa yakh u'jusawe'sx yakh thā'j vxixu jxsa'jna kīhçxa', teeçx ahte txaktek yuju nasa wala kuhsawe'sx yakh. Txāa nasa' Judea kiwesuwe'sx, Jerusalem çxhabuwe'sx, vxite' īkh wala pukasu Tiro Sidon çxhabsuwe'sxtxi Jesus pta'sxni's wēsē'jya' pa'j, açā' vxite' āçā'sa Jesus nuykatxhikahntxi pa'j. ¹⁸Sa' eçx luuku vxit-satx ūuste ji'phsawa Jesus kutxi'the', katxhiçxatx neeyū'. ¹⁹Açā' nasa jxukaysa kxte ūssa' Jesusa's jxa'dxya' wala pa'pçxu'tx, txā'wē jxa'dxçxaçxāa maawa katxhiçtetx yu', txāasatx txā'wēy yūu wējē'.

Weçxana fxi'zewa'jsa vxite' nxuste pa'jwa'jsa

(Mt 5.1-12)

²⁰Txajū' Jesusa' txāa yakh u'jusawe'sxtxi thegçxa', na'jīk:

—I'kwe'sxa' kīhwa ji'phmeeçxawa kuh yajkxmée weçxana mfxi'zewe, txāa pa'gatey Dxus jxkaahna ūsni' i'kwe'sx jī' naa pa'ga.

²¹I'kwe'sxa' āçxhīi yu' wēena ūsçxawa weçxana meswe, txāa pa'gatey wala sā'jīni yuune'kwe.

I'kwe'sxa' āçxhīi yu' nxusna ūsçxawa weçxana meswe, txāa pa'gatey sxijkana fxi'zewa'jsa jxpa'gawa'jsai'kwe.

²²I'kwe'sxa' Dxus Nçxi'k Nasa Yuusa's nwēesē'pha'ga ewmeesathas i'kwe'sx yasetx açewe'wena txāawe'sx tasxu kutxi'jna txā'wē yūuçtewa, weçxana mfxi'zewe. ²³Txāniitey Dxus yuwe pta'sxsawe'sxtxiwa txā'wēttx ppxuu na' āçxwa txā'wēyçxāa yuutxna. Nawa nxusmée weçxana mfxi'zewe, txāa pa'gatey cielute peesni's jxpa'gawa'j ji'phi'kwe.

²⁴Nawa ji'phsawe'sx āçxhīi weçxana fxi'zeni pçunijū', wala yuh nxuste pa'ljane'kwe.

²⁵I'kwe'sxa' āçxhí' wēt txikna ūsi'kwe, nawa e'su pxthaa yuh wējēne'kwe. I'kwe'sxa' āçxhí' sxijkana ūsi'kwe, nawa e'su nxusna ū'nene'kwe.

²⁶I'kwe'sx yu', āçxhí yu' maa maa nasawa ewçxáa tuuthe'jni fxi'zeçxawa, e'su nxuste neeyũune'kwe. Nyafxiiteywa Dxus yuwe's pta'sxsatha'w jīna īsxīina u'ljusatxi' txā'wēttx ewsata' jīna tuuthe'je'.

Açesatx peeygāawa'ja'

(Mt 5.38-48; 7.12)

²⁷Nawa ayte wēsē'jna ūssa i'kwe'sxtxi' na'wēth jxkaaja': Puíi jxpakwesatxi' mpeeygāhwe. Açesatxi' ew yūuna mfxi'zewe. ²⁸Ewmée nuywe'wesatxi's ka'tu' ewçxáa mwe'wewe. Wēesxusatxi' txāawe'sx pa'gate Dxusa's mneewe'wewe. ²⁹Idxa's pukakwetga pehtxate', ka'tuwe'sxa'swa petxakahn mes. Maaf' atxha's kusa'jaçyā'the', puiimée kmiisa yuhnawa mes. ³⁰Pe'wsa's mes, sa' iidx jī's kusa'jçxa', dukhmeetewa pāatxhī'khna pēynu. ³¹Maa nasawa i'kwe'sxtxi' ewçxáa yūuna fxi'ze jxthāasçxa', i'kwe'sxwa txā'wēy maa nasatxwa ewçxáa yūuna mfxi'zewe. ³²I'kwe'sxtxi' peeygāasaçxáatx ka'tuwa peeygāhçxa', ew yūusatha'w çjīya' ājāma'kwe? Makwe nasa ewmeesaçxawa txā'wē peeygāasaçxáatx peeygājxa' yu' ājā'tx aça'. ³³I'kwe'sxtxi' ew yūusaçxáatx ka'tuwa ew yūuçxa', i'kwe'sxa' ew yūusatha'w çjīya' ājāma'kwe? Makwe pkalsaçxawa txā'wē ew yūusaçxáatx ew yūuya' yu' ājā'tx. ³⁴Sa' i'kwe'sxtxi' ki' kaasxwedu'jya' ājāwa'jsaçxá's pki'jçxa', i'kwe'sxa' pu'çxsatha'w çjīya' ājāma'kwe? Makwe nasa ewmeesaçxawa, txā'wē kaasxwedu'jya' ājāwa'jsaçxáatx pki'jya' yu' ājā'tx. ³⁵Wejxwa i'kwe'sxa' puíi jxpakwesaatx peeygāhna fxi'ze jī'phi'kwe, sa' pki'jçxawa jxthaakwe kaasxwedu'juna sūhmée mfxi'zewe. Txā'wē ew yūusaatxi' Dxusa' wala deweena, aça' i'kwe'sxa' cielute Dxus luuçx yuune'kwe, txāa pa'gatey Dxus cielutewe'sxa' txā'sna yaakxsamée makwe ewmeesatewa ka'tu' ewçxáa yūuna ūsa'. ³⁶I'kwe'sxa' peeygāasa myuuwe, i'kwe'sx Tatawa ma'wē peeygāasana txā'wēy.

Jiimeeçxa' nuywe'wewa'jme'

(Mt 7.1-5)

³⁷Ma'wēsatewa jiimeeçxa', ewmeesata' jīna we'wewa'jme', txā'wē yūupa'ga i'kwe'sxwa Dxus dxi'pte ewmeesa yuuya'mée. Vxitetx nuywe'wewa'jme', ka'tuwa nuywe'wekahmén. Áhmée yūusaatx peltunāywa'ja', Dxuswa i'kwe'sxtxi' peltunāykahn. ³⁸Vxitetx peeswa'ja', ka'tuwa i'kwe'sxtxi' Dxusa' peeskahn. Makwe isaçxa vxitetx peeste', ka'tuwa i'kwe'sxtxi' Dxusa' txāa isanitey ew uta pu'kisu'sna zuuna' āsxçxa peesnisa's jxpa'gane'kwe.

³⁹Teeçx ejemplo kaaja'da'jçxa' na'wēk pta'sx:

—¿Yafx ji'phmeesa' vxitewa txã'wēysa's dxi'the pe'jna u'jya' ājāma'k? ¿E'zīi kafxkhē khēemeema'tx? ⁴⁰Piyasá' kaapiya'jsate jxthaakwesame'. Nawa maawa jxuka piyan jxã'ljçxa yuuçxáa, kaapiya'jsa na'wēy yuuna. ⁴¹¿Ma'wēçxa iidx yakthē'hj yafxte kxtã' le'çxkuēesa khēeçxa ūstewa, uyya' ājāki'g? iidx yafxte yu' fxtū pe'la yuu walasa khēeçxa ūste'. ⁴²¿Ma'wēçxa iidx yakthē'hja's pēyiki'g: iidx yafxte kxtã'a's kutxi'ji'nja jīna? iidx yafxte yu', fxtū pe'la walasa khēeçxa u'ptewa txāa yu'sa' uymeeçxa'. Āakhēçxáa ew we'wena u'jusathē'j, iidx yafxte fxtū pe'la walasa khuē'yna mkuutxi'j, sa' txã'wē yūuçxaçxáa iidx yakthē'hj yafxte kxtã' le'çxkuēsa's kutxi'jya' ājāne'ga.

Nasa ma'wē yūuçtewa mpa'yajkxwe jiyuya'

(Mt 7.17-20; 12.34-35)

⁴³Fxtūu tasx ewsa', ewsaíçxáak yūnu', nawa fxtūu tasx ewmeesa', ewmeesa íçxáak yūnu'. ⁴⁴Fxtūu tasx ma'wēsatewa yūntek isa ew ya'jiyu'. Brewa's khāas tasxte ya'ude'çme', sa' uwa's çhūçh tasxte ya'ude'çme'. ⁴⁵Nasa ewsa' ewçxáatx we'we', ewsa's ūuste ji'phna txāa pa'ga. Nawa nasa ewmeesa', kazxçxáatx we'we', txāa pa'gatey ūuste yuu, kazxsa u'pna aça' we'wenisa' ūusushe' kaseje' naa pa'ga.

Dxusa's nwēese'jsa vxite' Dxusa's nwēese'jsamée

(Mt 7.24-27)

⁴⁶I'kwe'sxa' adxa's Jxpe'jsa jī'i'kwe sa' ¿kīh yuuçxakwe adx jxkaahni's kxtey yu'çmée? ⁴⁷Maa nasawa adx tasxte utxaaçxa', adx we'weni's nwēesē'ljçxa jxkaahni's kxtey yūusa' txã' na'wēsa': ⁴⁸Teeçx piçthē'ja' yu'wala pukate kwet walate kaaçxida'ljçxa yat txajk. Txajū' yu' walaçxa', kxsū afixhbna skhēwçxawa yata's kēesē'jme', kwette kaaçxida'ljçxa txaahnipa'ga. ⁴⁹Nawa maa nasawa adx we'weni's wēsē'ljçxawa, adx jxkaahni's kxtey yuumeena txã' teeçx piçthē'ja' yu'wala pukate yata's kwetmuse kajkweteçxáa txaahni na'wēsa'. Yu' walaçxa', tūçxhaçxa txāa yata's pētçxçxa jxuka suwku.

Soldau kpiitan jxpe'jnisa's Jesus nuykatxhini

(Mt 8.5-13)

7 ¹Txajū' Jesusa' nasatx Dxus yuwe's pta'sxna jxã'ljçxa', Kapernaum çxhabna u'kh. ²Txāa çxhabte' teeçx kpiitan ūsu'k romanowe'sx. Sa' txāa kpiitana' teeçx selpisáa ji'phu'k wala peeygāanisa. Nawa wala açã'lçxa uuya'wayã'kh yu'. ³Txajū' kpiitana' Jesusa' ma'wēsaxwa nuykatxhi'k jīni's wēsē'ljçxa', judiuwe'sx pkhaakhenite npiiçthē'jsatx jxkaakh Jesusa's pxthaa we'weya', txã'sna selpisa's nuykatxhiya' yuukahn. ⁴Aça' txāawe'sxa' Jesusa's utxaaçxa', na'jīnatx pxthaa pi'kxna we'we:

—Txāa kpiitana'sa' idx pu'çxwaça' ewna sūjū'tha'w. ⁵Txā' kwe'sxtxi peeygāhçxa pkhaakhewa'j yat yuhwa ktxaaja'kh naa pa'ga jīte', ⁶Jesusa' txāawe'sx pe'jni u'kh. Nawa yat utxa pa'jaçteçxāa, kpiitana' txajx namikutx kaakha Jesusa's na'jīkahn:

—Adxa' wala āhmeekwesath aça' wejx yuuwa adx yatte u'kaya' yuhmēe tee yuu. ⁷Adxa' txā'wē āhmeekwesaçxa fiçxāath idxa's adx yuu pakweya' yujxa' thaame. Aça' wejx yuuwa txājūçxāa yuwejuçxāa mwe'we aççxāa adxa's selpisa' katxhina. ⁸Adxwa jwee npiiçthē'jsa jxkaahni's nwēesē'jna ūsthu, nawa jweeju adx jxkaahnisa soldau ji'pthu. Sa' txāawe'sxtxi' teeçxsa's me'j jīte', adx jxkaahni's kxtey yu'k. Sa' vxite's pa'yate', txāawa kxtey nwēesē'je'k. Sa' adxa's selpisa's kīh jxkaathewa, kxtey yu'k jīnak yuwekaah.

⁹Txajū' na'wē kpiitan yuwe kaahni's Jesus wēsē'jçxa', kuh yajkxnak neeyūu. Sa' e'ste yuusatx thegçxa' na'jīk:

—Isath we'we', Israelwe'sx mteewe'sx yuhwa txā'wē adx we'weteçxāa katxhina sūhsa yu' iuuymeeth naa kpiitan na'wēsa yu' jīk. ¹⁰Txajū' jxkaahnisawe'sxa' yatnay sxawedçxa', kpiitan jxpe'jni'sa' katxhyā'j u'ptetx uy.

Vxiuda nçxi'ka's Jesus itxi vxitni

¹¹Txāa e'su', Jesusa' teeçx çxhab Nain yaasesatek pa'jya' u'j, txāa yakh u'jusawe'sx vxite nasa kuhsa yakh. ¹²Sa' çxhabte u'kaçte', teeçx uusá's pedaaya' nasa wala kuh u'jweçtek uy. Txāa uusá' vxiuda nçxi'k txāaçxāasak yu'. ¹³Aça' Jesus uyçxa', txāa vxiuda's peeygāhçxa kvxiisxa'jna:

—Ū'nenuçx jīnak we'we.

¹⁴Sa' Jesusa' utxaaçxa, taula's jxa'dxku. Aça' yakhçxa u'jsa', nee yujutx. Naapkaçxha' Jesusa' uusá's na'jīk:

—Piçtakx, mkiite jī'th idxa's jīte', ¹⁵uusá' kaççxaxa we'wek. Aça' Jesusa' njī'ja's dukhku. ¹⁶Na'wē yūuni's nasa uyçxa', jxukaysa wala ūukhçxawa, txā'wēytxi Dxusa's wala weçxana na'jī':

—Dxus jxkaahni wala yuhsa kwe'sx ksxavxyte vxyaak jī'tx. Sa' ki' we'weçxa':

—Dxusa' txajx nasatx pu'çxya' kījk jī'tx.

¹⁷Txajū' Jesus txā'wē yūuni's nasa jxuka jiyutx Nain çxhab peeku'jsuwe'sx vxite' Judea kiwesuwe'sxwa jxuka.

Jesus tasxna kaahnisawe'sx

(Mt 11.2-19)

¹⁸Jesus txā'wē yūuni's Juan Bautista' jxuka jiyuk Juan yakh u'jusawe'sx pta'sxte'. Sa' txāa yakh u'jusa e'zsatx pa'yaçxa', ¹⁹Jesus tasxna kaakh paapējxya':

—Idxa' çisa Kristo naa kiwete kiiwa'jsa ũsu'k txãa dxihgá', meeçxa' vxite ũythasuwá'nja'w? jínak pëykaah. ²⁰ Aça' e'z jxkaahnisa' Jesus tasxte pa'ljçxa' txã'wëy pëjxtxi:

—Juan Bautista' kwe'sxtxi' kaakh idxa's paapëjxya': çKristo naa kiwete kiiwa'jsa ũsu'k txãa dxihgá', meeçxa' vxite ũythasuwá'nja'w? jínatx pëjx.

²¹ Sa' txã'wë paapëysawe'sx pa'ljaçte', Jesusa' nasa wala kïjkîh wee kazzsate açã'satxwa nuykatxhik, eçx luuku vxit-satx ũuste ji'phsa vxite' uyya' ajásamee maazkuëesatxwa jxuka nuykatxhik. ²² Sa' Jesusa' paapëysawe'sxtxi' na'wëk pas:

—I'kwe'sx ma'wëne'kwe wësë'jna uy txã'wëy pta'sxine'kwe Juana's na'ljina: Uyya' ajásameewa uyu'tx. Aça' legsawa katxhiçxa legmeetx neeyü'. Wäljy wee kazz ji'phsawa katxhinitx neeyü'. Aça' wësë'jya' ajásameewa wësë'jya' ajã'tx. Uuniisawa ki' itxí yu'tx. Sa' naa kiwete pxthaakuësa yuutxi' Dxus tasxte pa'ljwa'ja's pta'sxnik yuu. ²³ Aça' adxa's kuh yajkxna jxpubasame', weçxana fxi'zesa yuuna jínak pta'sxkaah.

²⁴ Juan yuwe kaahnisawe'sx u'the', Jesusa' Juan ma'wësatewa pta'sxku na'ljina:

—Nasa u'pnimée kiwesu' i'kwe'sxa' çkïja'skwe thegya' u'j? çKhîih tasx wejxate êsë'sesa's wá'kwe thegya' u'j? ²⁵ çKhímeeçxa' teeçx piçthë'j ropa zhiçxkwesa athçxa u'pna sühçxa wá'kwe thegya' u'j? I'kwe'sxa' jii i'kwe txã'wë ropa zhiçxkwesa athçxa wët weçxana fxi'zesa' jxkaahni yat-suçxáatx u'pu'. ²⁶ çKim yuunakwe thegya' u'j? çDxus yuwe pta'sxsa's wá'kwe thegya' u'j? Isa txã'wë dxih yuuçxa' Dxus yuwe pta'sxsate teeçx jxthaakwe walasa's ne'kwe uy. ²⁷ Juana's we'weçxak Dxus librute na'wë pta'sxi':

Adx yuwee pta'sxsa's iidx yaçte kajaçthu,

Iidx pa'ljwa'ja's pheu'khan jina fxi'jni'.

²⁸ Na'ljith na': naa kiwete Dxus yuwe pta'sxsate maa maatewa jxthaakwesa' Juan Bautistak yu'. Txã'wëtewa, maawa makwe ähmeekwesaçxawa Dxus jxkaahnite u'kasa yu', Juante jxthaakwesa yuutxna jite', ²⁹ Juan bautisäynisa nasa jxukaysa vxite' gobierno jii vxxy pkhakhsa txãawe'sx wësë'jçxa', Dxusa' maa yakhwa jxuka ewsana sühnatx neeyüu. ³⁰ Nawa fxariseowe'sx vxite' ley kaapiya'jsawe'sx Juan bautisäynimeesa yu', txãawe'sxtxi Dxus ew yüu wëeni yu'sa' jxpa'gamée ahçetx. ³¹ Aça' Jesusa' na'ljik:

—Naa ensu nasatxi' çkiim yakh kaaja'dal'jaki'th? çKiim na'wëta yu'? ³² Luuçx le'çxkuë na'wëtx yu'. Txãawe'sxçxáatx plaasasu pweesa'ljya' kaçççxa, vxite luuçxtxi sus pa'yana na'lji': Zhiçxkwetha'w tujkana kuvxi' nawa kul'ju'çmeei'kwe. Sa' nxus nxustha'w memu', nawa ü'ne'çmeei'kwe jì'tx. Txã'wësata' naa entewe'sxa'. ³³ I'kwe'sxa' Juan Bautista's eçx luuku vxit-sa's ji'phna txãasak pan ü'mée vxinowa tudxi'çmée jì'i'kwe, txã'wë kîhwa ü'mée tudxp'a'gameeçxáa. ³⁴ Nawa Dxus Nçxi'k Nasa Yuusáa kîhçxa', ü'we'th, tudxi'th, aç yu': Naa the'ja'

wala pū'we!, wala tudxsa! Gobierno jīi vxyu pkhakhsawe'sx vxite! pkalsawe'sx yakh namiku! jī'i'kwe. ³⁵I'kwe'sxa! jīimeeçxai'kwe txā'jī!. Nawa maawa jiyuwa'jsa yuutxi! Dxusa! kaajiyu'juna adx ma'wēsatewa jik.

Simon yatte Jesus pa'jni

³⁶Teeçx f خارiseo! Jesusa's pi'kxku sāl'jīya!, aça! Jesusa! txāa f خارiseo yatna u'l'çxa!, mesate kaçxku ū'ya!. ³⁷Naapkaçxha! teeçx u'y iiméh kazx ewmée yūuna u'jusa txāa çxhabtey u'psa jiyuk Jesusa! f خارiseo yatte ū'ya! u'jni's. Sa! teeçx fخرasko aceite wēt putasana atçxa f خارiseo yatte pa'kh. ³⁸Sa! ū'nena utxaana kūhçxa!, yafx yu'ju Jesus çxidatx pki'kxku. Khiçxak txajx dxkhasju adxi'l'çxa weçxá!. Sa! aceite wēt putasana's Jesus çxidakhē awku. ³⁹Txā'wē yūuni's f خارiseo Jesusa's pi'kxsathēj uyçxa!, na'wēk yajkx: Naa piçthēj isa Dxus yuwe's pta'sxsa dxihwaça!, jiyuna naa u'ya! pkalsa ewmeesaçxa txā'wē çxidatx pki'kxna aceite awna u'ptewa sūjū'k. ⁴⁰Aça! Jesusa! na'jik:

—Simon, idxa's na'wē we'wewa'j jī'pthu jīte!, f خارiseo pasçxa!:

—Mwe'we jīte!, ⁴¹Jesusa! na'jik:

—Teeçx piçthē'ja's e'z nasatx yuul yu' vxyu pki'l'çxa. Teeçxsa! kinientos pesok yuul yu'!. Aça! vxite! cinkwenta pesok yuul yu'!. ⁴²Aça! e'zīi txāawe'sx yuultxi dukhya! ājāmeete!, vxuyu pki'jsa! txāawe'sxtxi! peltunāyku. Aça! çmaa sūjūki'g txāa yuulusa e'zsatx maaki'k wejx thaakwe weçxa pki'jsa's? jīte!, ⁴³Simon pasçxa!:

—Wala yuulusane! wejx thaakwe weçxa jīte!, Jesusa!:

—Isa yuh we'we'g, jik.

⁴⁴Txajū! Jesusa! txāa u'ya's thegçxa! Simona's na'jik:

—Adxa! iidx yatte pa'thewa, yu' ūsmeeg adx çxidatx pki'kwa'j. Nawa naa u'ya's mtheg, txajx yafx yu'juk pki'khi! sa! txajx dxkhasjuk adxi'j. ⁴⁵Adxa's weçxameeg. Nawa naa u'ya! ayte u'kaīn nvxiitnime! adx çxidatx weçxana. ⁴⁶Adx jxkwetkhē aceite awmeeg. Nawa naa u'ya! aceite wēt putasana aw adx çxidakhē. ⁴⁷Na'jī'th na!, pka! iiméh wala kazxsatewa peltunāyni neeyūusa! txā'wēyku wala wedxna utxá! peltunāysa's. Nawa walamée peltunāynisa! jwee yu' weçxana utxa'çme!.

⁴⁸Txajū! txāa u'ya's we'weçxa!:

—I'kwe! peltunāyni yā'jī'kwe jik.

⁴⁹Aça! pi'kxnasa Jesus yakh ū'na u'psa! txāawe'sx pwe'sx na'wēt x puutx we'we!:

—Naa piçthē'ja! çkiimki saki'k pkalsa yuhtxwa peltunāi'? jī'tx.

⁵⁰Aça! Jesusa! na'wēk we'we txāa u'ya's:

—Adx peltunāina sūhçxane'kwe adx tasxte utxāa naa pa'ga ewte yā'jī'kwe neeyūu na! āçxha! wēt weçx weçxa me'jwe jik.

U'ywe'sx Jesusa's pi'kxna u'jusa

8 ¹Txāa e'su! Jesusa! maazkuēe çxhabsuwa pekūjk Dxus jxkaahwa'j ena's pta'sxna txāa yakh u'jusawe'sx docesa yakh, çxhab le'çxkuēsu

walasuwa txã'wëy. ²Vxite' u'ywe'sxwa pi'kxna u'ju'tx na'wë eçxtxi kutxi'jna kîh weete ãçã'satxwa nuykatxhik txã'wë yuuniisa, açã' txãã ksxavxyte teeçxsa' Maria Magdalena yaasesa txajx ùusuh siete eçxtxi kutxi'kh txãak yu'. ³Vxite' Herodesa's pu'çxsa Çxusa nyu Juanak yaasesa yu', vxite' Susanak yaasesa yu'. Kuh u'lysatx Jesusa's pu'çxna u'jusa yu' txãawe'sx ji'phuni kîjkwe yakhçxáawa.

Skuutxh uuhsa's kaaja'da'jni

(Mt 13.1-9; Mr 4.1-9)

⁴Txajü' çxhabuwe'sx wala nasa kasehtx, Jesusa's thegya'. Açã' nasa txaaazkuëe pkhaakhete', Jesusa' ejemplo yakhku pta'sx na'jîna:

⁵—Skuutxh uuhsa' uujxa' kasejk. Açã' msuúí yu' maz nxinx dxi'jsu ãasu neeyüute', nasa waakhi'khi'jiçte, vxiçxakwewa fxiwçxa ü'tx. ⁶Açã' msuúí yu', kwet-sutx üsxi. Nawa buçxaçxawa kiwe ew ji'phmeete', tuphaameeçxa jxuka uhdxtxi. ⁷Msuúí yu', çhüçh ksxavxysutx üsxi. Açã' çhüçhwa ja'da buçxaçxa' skuutxha's aphçxa ivxiitutx. ⁸Sa' vxite ahsu' kiwe ewstatek üsxi. Txãa yu' walaaçxa teeçx tasxçxáa cien nxinxtxi ji'phu.

Txajü' Jesusa' suhsku na'jîna we'we:

—Jiyuwa'jsa üsçxa', jiyune'kwe jîk.

⁹Txajü' txãa yakh u'jusawe'sxa' Jesusa's pëjxtxi txãa ejemplo's ma'jînitewa jiyuya'. ¹⁰Açã' Jesus pasçxa' na'jîk:

—Dxus jxkaahni ensu ma'wë yüuwa'ja'swa kim yuhwa jiyunimeesa's i'kwe'sx yuutxi's áate kaajiyu'ju'nja. Nawa vxite yuutxi' ejemplo yakhçxáath pta'sxi', kxah makwe uyçxawa, uysamée na'wëçxáa neeyüutxna. Sa' pta'sxni's wësê'lçxawa, jiyumée neeyüutxna.

¹¹Naa ejemplo' na'wësa': Skuutxh fxiwa' Dxus yuwe jîni'. ¹²Açã' maz nxinx dxi'jsu üsxisá', nasa Dxus yuwe's wësê'thewa eçxthê'ja' kutxi'jina wësê'lçxa yu'akhni's jîni'. Txã'wë Dxus yuwe's ùusuh kutxi'the', txãawe'sx üusa' vxituna. ¹³Açã' maz nxinx kwet-su üsxisá', nasa Dxus yuwe's jxpa'gaçxa maz en yu' weçxana wësê'lçxa fxi'zetxna. Nawa ùuste ew yu'akhmeeçxa', thëysa nxusu en pa'theçxáa, Dxus tasxu ki' txuteetxna jîni'. ¹⁴Açã' maz nxinx çhüçh ksxavxysu üsxisá', nasa wësê'lçxawa, naa kiwetewe'sx ji'phu wëeniçxá's yajkxna pa'pçxuna ewmeesuçxáa weçxweçxa fxi'zesa jîni'. Sa' Dxus yuwe's peçxkanatxna, açã' kxul íiçxáa yuuna. ¹⁵Nawa nasa ùus ewsa Dxus yuwe's jxpa'yakx wësê'lçxa nwëesê'lçxa Dxus yakhçxáa u'juçxa', kîhsuwa ewçxáa yüuna fxi'zена, txã' maz nxinx yu' kiwe ewstate üsxisáa na'wëta'.

Áate jiyuwa'j yu' neeyüuwa'jsamée

(Mr 4.21-25)

¹⁶Lampara's atüu dxiite aphçxa txajxa' txã'wë ya'pki'taçme'. Wejxwa êetek ya'txaja' eena' kweethkahn, kxah maawa u'kasa' eena'te u'kakahn.

¹⁷Makwe paaçte sũthnisaçxawa, kĩh yuhwa ãate vxyaamée yu' neeyũuwa'ljme'. Sa' makwe ũusteçxáa yaakxnisa'swa, kim yuhwa ãate jiyunimée yu' neeyũuwa'ljme'.

¹⁸Txã'wẽyã'the', ew mwẽesẽjwe. Maawa wa'lmée wẽsẽ'the', jxthaakwe kaajiyu'juna Dxusa'. Nawa wẽsẽ'jya' wa'lsa's, kaajiyu'jnimée yuuna. Jxuka kusa'jni yuuna.

Jesus njĩ'j vxite' txajx nyakhwe'sx

(Mt 12.46-50; Mr 3.31-35)

¹⁹Txajũ' Jesus ũsnite pa'ljtx njĩ'j vxite' nyakhwe'sx. Nawa nasa wala ũste', Jesus tasxte utxaaya' ãjãmeeta'. ²⁰Aça' kxtee ũssa teeçxa' Jesusa's pta'sxku na'jĩna:

—Iidx mama, iidx nyakhwe'sx, iidx npe'sxwe'sx idxa's thegya' pa'ljçxa ekate ũsta', sa' idxa's peejxta' jĩte', ²¹Jesus paşçxa':

—Dxus yuwe's wẽsẽ'jçxa' kxtey yuutxna txã'wẽ yuusaaçxáa, adx mama, adx nyakh, adx npe'sxwe'sx na'wẽsata' jĩk.

Marte wejxa wala's Jesus kxuujũ'jni

(Mt 8.23-27; Mr 4.35-41)

²²Teeçx ente' Jesusa' txãa yakh u'jusawe'sx yakh barkote khẽeçxa':

—Vxite ahn ìkh kuten u'jwega jĩçxa' u'jtx.

²³Nawa ìkh pxãjũy u'jweçpkaçxha' Jesusa' dejk. Naapkaçxha' wejxaa wala seena' kiiteçxa, yu'a's barkote yuutaçku yu'. Aça' barko' ìkh dxiikhẽ khẽeya'wak yu'. ²⁴Txajũ' Jesusa's fxĩtxtxi na'jĩna:

—Kwe'sxtxi jxpe'lja mkiite, ìkh dxiikhẽ khẽjẽçtha'w jĩte', Jesus kiiteçxa' wejxaa wala petx ìkh yã'ljçxa yujukaathe', jxuka yujuk, aça' kĩh yuhwamée ewçxáak neeyũ. ²⁵Txajũ' txãa yakh u'jusawe'sxtxi' na'jĩk:

—¿Mjĩiçxakwe Dxusa' pu'çxhina sũhna yajkxmée? jĩte', txãa yakh u'jusawe'sxa' ũukhçxa txãawe'sx pwe'sxçxáatx na'jĩna puutx we'we':

—Naa piçthẽ'ja' ¿kimki açki'tx wejxaa wala ìkh txã'wẽsa yuhwa nwẽese'je'? jĩ'tx.

Gadara kiwetewe'sx eçx iiyamunisa

(Mt 8.28-34; Mr 5.1-20)

²⁶Txajũ' pejka Gadara kiwete pesahtx Galilea ìkh kuteju. ²⁷Aça' Jesusa' txãa kiwete pa'ljaçte', kxte' teeçx çxhabuwe'sx piçthẽ'j kasejk Jesus yakh puutx uyya'. Txãa piçthẽ'ja' wala txaçxyã'l eçx luuku vxitni u'ju'k. Sa' ropa athmée yattewa u'psameek yu', naasáa uusáa pedaní kwet kafxsuçxáak u'psa yu'. ²⁸Sa' Jesusa's uyçxa', tasxte peejxũkweçxa', na'jĩnak suhs we'we':

—Jesus, Dxus ìtxisa Nçxi'k, adxa'sa' ¿kĩhga yũu wẽjẽ'? Adxa's nxuste ũswa'the akhkahmén pxthaath we'we' jĩk.

29 Jesusa' txāa eçx luuku vxit-sa's ūusu kaseh kajaçku yu', txāa pa'gak txā'wē we'we'. Txāa eçxa' ūuste khēeçxa nasa's luuku vxitpa'gatx, kadenaju kuse petx çxida yā'jçxa tud wēe. Nawa kīh yuhnawa weji'meek çxuktede!. Txā'wē yuuççak txāa eçx luuku vxit-sa' nasa u'pnimeesu jxūna u'jwe' txāa piçthē'ja's.

30 Txajū' Jesusa' txāa eçxa's pējxku:

—çKīh yaasega? jīte'!

—Legion yaaseth jīnak pas.

Txāa piçthē'j ūuste wala kuh eçx khēeçxa ūsu'tx, txāasak legion yaaseth jīna pas. 31 Sa' txāa eçx luuku vxit-sa' Jesusa's pxthaa we'wetx kafx wala seena' ūukhūkhsakhē akhkahmén. 32 Sa' kxsū thā'jsū kuçxi wala ūsu'tx aphna, aça' txāa kuçxi ūussu khēeya' u'jwa'ja'stxi Jesusa's pējx pxthaa we'wena. Aça' Jesusa' kuçxi ūussu khēeya' u'khaakh.

33 Txajū' txāa eçx luuku vxit-sa' txāa piçthē'j ūusu kasehçxa, kuçxi ūussu khēete', txāa kuçxi' penxakhē peluçxa, īkh walakhē khēeçxa jxuka uutx.

34 Aça' kuçxi thegsa' txā'wē yūute uyçxa', ūukhçxa pta'sxya' wala dud u'jtx çxhabna vxite' çxhab peeku'jsuwa jxuka. 35 Aça' kīh yūutewa uyya' nasa' theya' pa'jtx. Sa' Jesus ūsnite kūhçxa', uytxi eçx luuku vxit-sa' txāa piçthē'j ūusu jxuka kasehte', Jesus tasxte wēt yā'j ropa athçxa kaççxa u'pte. Sa' wala ūukhtxi.

36 Aça' txāa piçthē'j eçx luuku vxitnisa' ma'wē yūuçxa katxhitewa uysa' kxtee theya' pa'jsatx pta'sxtxi. 37 Txāa pa'gaçxāa Gadara kiwesuwe'sx jxukaysa ūukhçxa Jesusa's txāa kiweju kasehna u'khahtx. Txā'jyā'the', Jesusa' barkote khēeçxa ki' sxawedku.

38 Aça' txāa piçthē'j luuku vxitnijū katxhisa' Jesusa's pxthaa we'wek pe'ljçxa u'khan. Nawa Jesusa' txajx yatnak u'khaah na'jīna:

39 —Iidx yatna sxawedna me'j, sa' mtuuthe'j idxa's Dxus na'wē ew yūuni's jīte', txāa piçthē'j u'jçxa', çxhabsu jxuka pta'sxku Jesus ma'wē ew yūuni'swa jxuka.

Jairo niisa vxite' Jesus atxhte jxa'dxsa

(Mt 9.18-26; Mr 5.21-43)

40 Txajū' Jesusa' Galilea kiwetey ki' sxawedna pesathe', nasa ūythāsna ūssa' wala weçxana jxpa'gatx. 41 Kxte' teeçx piçthē'j judiuwe'sx pkhaakhenite npiiçthē'jsa Jairo yaasesak pa'j. Sa' txāa piçthē'ja' Jesus tasxte peejxūkweçxa', pxthaa we'wek txajx yatna yuukahn. 42 Kxtee yu' txajx niisa teeçxçxāasa doce anxu ji'phsa āçā'çxa uuwa'theçxāa yā'kh ūs yu' naa pa'ga. Aça' Jesusa' u'jweçte', txāa yakh u'jsa nasa wala kuh dxi'the utaçxáatx u'jna ūsu'. 43 Txāa nasa kuh ksxavxyte teeçx u'y doce anxu yā'j kakwe yu' vxyaate āçā'sak kaseh. Sa' txāa u'ya' txajx vxyu's jxuka pebak yu'çe'jsatx dewena, nanwa maa yuhwa nuykatxhiya' ājāmeeta'. 44 Aça' txāa u'ya' Jesus e'ste utxaaçxa, atxh vxixkhē kpaajxa'dxku, naapkaçxha' txāa dudtey kakwe yu'a' yujuk.

⁴⁵Txajü' Jesusa' paapëjxku:

—¿Kimga adxa's jxa'dx? jïna.

Aça' jxukaysa: Maa yuhwa jxa'dxmeetha'w jïte', Pedro vxite' txäa yakh u'jusa' na'ljïtx:

—Nasaa ksxavxyte zuuna'çxáa u'jna üsgu sayuja' çma'wëga kimga jxa'dx jïna pëyí'! jïte', ⁴⁶Jesus pasçxa':

—Teeçxa adxa's jxa'dxyujk, txä'wë adxa's jxa'dxpa'gaçxáa açã'çxawa katxhiçxak neeyüu adx pu'çxte jïk.

⁴⁷Aça' txäa u'y ma'wë yüuni'swa Jesusa' jiyute', txajx tasxte üukhna yayana kühçxa peejxükwek. Sa' nasaa dxl'pte jxuka pta'sxku açã'çxa Jesus atxhte jxa'dxçxa' txäa dudtey katxhiçxa neeyüuni's. ⁴⁸Txajü' Jesus we'weçxa':

—Katxhi'nja sühçxane'kwe adx tasxte txä'wë yüuya' yuwé' txäa pa'ga açxha' katxhi'kwe neeyüu na' weçxana me'ljwe jïk.

⁴⁹Kxtee nee Jesus we'wena üsíyna, judiuwe'sx pkhaakhenite npiičthë'jsa Jairo yatu yuusa teeçx pa'ljçxa', Jairo's pta'sxku:

—İdx niisa' uuyä'kh, açã' Jesusa's kuçx pe'ljna yuunu jïte', ⁵⁰Jesus wëse'ljçxa':

—Nxusnu, adxçxá's myajkx aççxáa iidx niisa' katxhina jïk.

⁵¹Txajü' Jairo yatte pa'ljçxa', vxite' yuutxi' ka'ga'jmée, naasáa Pedro, Jakobo, Juan, vxite' kna'sa neywe'sxtiçxáak ka'ga'lj. ⁵²Kxte' nxus we'wena ü'nenatx üsu'. Nawa Jesus we'weçxa':

—Ü'nenuwe, txäa kna'sa' uunime', naasáa deeniçxá' jïte', ⁵³kxtee üssa' npeevxysxijkatx, uuní üste txäl'jïpa'ga. ⁵⁴Txajü' Jesusa' uuniisa's kuseju pu'kisna' suhsku we'we:

—Kna'sa, mkiiteçx jïna.

⁵⁵Naapkaçxha', dudtey itxí yuuçxa kiitek, açã' Jesusa' puuçaakakh. ⁵⁶Aça' neywe'sxa' wala kuh yajkxna weçxana thegtxi. Nawa Jesusa' maa yuhtxwa pta'sxkaahme' txä'wë uuniitewa itxí vxitni's.

Docesatx Dxus yuwe's pta'sxya' kaahni

(Mt 10.5-15; Mr 6.7-13)

9 ¹Jesusa' txäa yakh u'jusa docesatx kxteeçxah pa'yaçxa' kíh weete açã'satxwa nuykatxhiya' äjãwa'ja's üsku, eçx luuku vxit-satxwa nasa üusu kutxi'khan. ²Txä'wë yuuçxak kaah Dxus jxkaahwalj ena's pta'sxna açã'satxwa nuykatxhikahn. ³Sa' na'wëk yu'kxpeh:

—Dxi'the kíh yuhwa jxümée me'ljwe khãabu, ya'ja, vxyu, kaame txä'wësatx. Kmiisa yuhwa e'z yu' jxüçxa u'ljnuwe. ⁴Maa yatte paadejxa' pa'ljyäljçxa', kxteeçxáa paadehna üsune'kwe txajü ki' kasehna u'phkaçx. ⁵Maa çxhabteya' i'kwe'sxtxi xjpa'gameete', i'kwe'sx çxidate kiwe tuhda's sakweekweçxa kasejene'kwe, kxah Dxus yuwe's makwe jxpa'gameeçxawa, yuuwesa yuutxna jïnak yu'kxpeh.

⁶Txajũ' txãawe'sxa' kasehçxa', çxhab le'çxsũ mtee mteewa jxuka Dxus yuwe's pta'sxna açã'satxwa nuykatxhinatx pekũh.

Juan Bautista uunĩ
(Mt 14.1-12; Mr 6.14-29)

⁷Txajũ' ne'jwe'sx Herodesa' Jesus kĩjkĩhwa ew yũuni's jiyuçxa', wala kuh yajkxku, txã'wẽ maafĩ yu' Juan Bautistane' uuçxawa ki' itxĩ yuu jĩ'tx txãa pa'ga. ⁸Aça' vxite yu', Dxus yuwe's pta'sxsa Eliasne' ki' vxyaa jĩ'tx. Naapkaçxha' vxite we'weçxa': Dxus yuwe pta'sxsawe'sx jwee yaçgaywe'sxne' ki' itxĩ yuu jĩ'tx. ⁹Nawa Herodes yu' na'jĩ'k:

—Adxĩth Juan Bautista txhikha's kaaspẽ'the'j txãana. Txãameeçxa' jwee yu' çkimçxah txakwe kĩjkĩhwa yũuya' ajãkx? jĩ'k.

Txãasak Herodesa' txakwe uy wẽjẽ' Jesusa's.

Cinko mil nasatx Jesus sã'jĩni
(Mt 14.13-21; Mr 6.30-44; Jn 6.1-14)

¹⁰Jesus kaahnisawe'sxa' ki' sxawedna pa'jçxa', txãawe'sx kĩhçxahne'ta yũu txã'sna pta'sxtxi Jesusa's. Txajũ' Jesusa' txãawe'sxçxáatx fxiite pe'jna u'kh Beçaida çxhab ja'dasu nasa u'pnimeesu. ¹¹Nawa nasa' jiyuçxa', txãawe'sxwa Jesus e'stey u'jtx. Aça' Jesusa' jxpa'gaçxa', Dxus ma'wẽ jxkaahwa'ja'swa pta'sxku sa' açã'satxwa nuykatxhik.

¹²Txajũ' kusuçte', Jesus yakh u'jusawe'sx docesa' na'jĩtx Jesus tasxte utxaaçxa:

—Nasatxi' mkaah, çxhabsu paadee yat-su ũ' weyçxa ũ'kahn. Txã'wẽme' ayte' nasa yat utxameesũ ũstha'w jĩte', ¹³Jesus pasçxa':

—I'kwe'sxĩwa mpuuçwe jĩk. Aça' txãawe'sx pasçxa':

—Tahç pan, e'z wedxçxáa jiptha'w. Kwe'sxa' çxhabna weyya' u'jmeete yu', ahmeena naazkuẽesatx puuçwa'j jĩtx.

¹⁴Nasa yu', piçthẽ'jçxáa cinko mil ahtx yu'. Nawa Jesusa' txãa yakh u'jusawe'sxtxi' na'jĩk:

—Cinkwenta txuhdeçxa fxiifxii txaksu mkaaçxi'jwe jĩte',

¹⁵txãawe'sxa' txã'wẽy nasatx jxukay kaykaçxhi'tx. ¹⁶Txajũ' Jesusa' tahç pan e'z wedxtxi jxpa'gana'wa cielute pagayçxa, Dxusna weçxana orãyku. Sa' pe'ltedeçxa txãa yakh u'jusawe'sxtxi ũsku, nasa jxukaysatx ũsu'skahn. ¹⁷Txajũ' jxukaysa ũ'çxa txikte', kijxasaatx doce kanastate utatx pkhakh.

Pedro' jiyuk Jesusa' Dxus tasxu yuusaatewa
(Mt 16.13-19; Mr 8.27-29)

¹⁸Teeçx ente Jesusa' txãa yakh u'jusawe'sx yakhçxáa fxii txuteena uljçxa Dxusna orãyna u'pçxa', txãawe'sxtxi pẽjxku:

—Nasa' adxa'sa' çkimna jĩ'ta? jĩte', ¹⁹txãawe'sx pasçxa':

—Maaí!: Juan Bautistana jĩ'tx. Vxite!: Eliasna jĩ'tx. Aça' vxite yu!: Dxus yuwe pta'sxsa txãniiteywe'sx uuniiçxawa ãtxĩ yuusaana jĩ'tx jĩte!, ²⁰ Jesus pẽjçxça'!

—Txajũ' i'kwe'sxa' adxa'sa' çkimna sũjũ'kwe? jĩte!, Pedro pasçxa'!

—Idxa' Kristo, Dxus tasxu yuusag jĩk. ²¹ Txajũ' wala neewe'wek Jesusa' Dxus tasxu yuusa Kristo' jĩna maa yuhtxwa pta'sxkahnẽn.

Jesusa' txajx uuwa'ja's pta'sxni

(Mt 16.20-28; Mr 8.30–9.1)

²² Txajũ' na'wẽk pta'sx:

—Dxus Nçxi'k Nasa Yuusá' wala pkxuuni yuuwa'ja's jxpa'gawa'j pejka peejxyuja', txãa pa'ga judiu nthẽ'jsawe'sx vxite! sacerdote npiĩçthẽ'jwe'sx vxite! Dxus leya's kaapiya'jsawe'sx ahçççxa ikhetxna. Nawa uuçxawa tekhte' ki' ãtxĩ yuuna jĩnak pta'sx.

²³ Txajũ' jxukaysatx na'jĩk:

—Maawa adx yakh yuu wẽççxa', peekx kakwe jxthãasni's kĩhnawa jxuka nvxihtçxa yuuçxáa adx yakh yujxa' ajãne'kwe, makwe pxthaa yuuwa'j seena'sa een isa ma'k pa'jnawa txã'sa' ãukhmẽe. ²⁴ Maa nasawa naa kiwete ãtxĩ fxi'zewa'jçxá's ya'nwe'wesa' Dxus yakh fxi'zewa'j yu'sa' ivxiituna. Nawa maa nasawa adx yakh fxi'zepa'gaçxáa naa kiwete ãtxĩ fxi'zeni's yajxkmẽe ivxiitusa', Dxus yakh fxi'zewa'j yu'sa' ivxiitumeena. ²⁵ Nasa' naa kiwetewe'sxçxá's jxuka knayçxa', txajx ãus yu's ivxiitute!, çkĩhte selpiikx, peekx ãus yu's nwe'wemeete!? ²⁶ Maa nasawa adxa's jxpa'gaya' wa'lina adx pta'sxnixwa wa'lutxna aça' Dxus Nçxi'k Nasa Yuusaawa adx Tata eena' kweethniite Dxus angeleswe'sx yakh jxkaajxa' kĩhçxa', txã'wẽ yũusatxi' jxpa'gaya' wa'luna. ²⁷ Isath we'we', ayte ãssa uumẽy uyuune'kwe Dxus jxkaajxa' kĩini's jĩk.

Jesusa' zhiçxkwe yu'pthehçxa vxyaani

(Mt 17.1-8; Mr 9.2-8)

²⁸ Txã'wẽ we'weni teeçx ki'su skhẽwniite!, Jesusa' thã'the orãyya' u'kh Pedro, Jakobo, Juan txãawe'sx yakh. ²⁹ Jesusa' orãyna u'piyna, txajx dxi'pa' fxiyku zhiçxkwe yu'ptheh, aça' txajx athni ropawa txã'wẽytxi çxihme kwehnesa yuu. ³⁰ Txajũ' txãa yakha' e'z piçthẽ'jtx puutx we'wena vxyaa, teeçxsa' Moises vxite! Elias txãawe'stxxi yu!. ³¹ Jxuka zhiçxkwe eena' kweethni pxãhte Jesus ma'wẽ nxus pxthaa yuuçxa Jerusالente uuwa'ja'stxi we'we!. ³² Pedrowe'sxa' wala dee wẽççxawa, dehmẽe u'pçxa' uytxi, Jesus eena' kweethni vxite e'zsa txãa yakh ãssatx. ³³ Txajũ' txãa e'z piçthẽ'jwe'sxa' Jesusa's txuteena u'jweçte!, Pedro' na'jĩk:

—Ayte! kwe'sx ãswa'j wala ewa', aça' tekhte wa' txajaga, teeçxsa' iidx jĩi, vxite! Moises jĩi, vxite! Elias jĩi jĩk.

Nawa Pedro' ãus yuu yajxkmẽy we'wesaçxáak yu!. ³⁴ Naapkaçxha' tãaph kĩhna'wa, jxuka aphku. Aça' wala ãukhtxi tãaph dxiite neeyũuçxa. ³⁵ Txajũ' tãaph dxiiju na'wẽk we'we:

—Na' adx Nçxi'k wala wedxnisa', aça' txã'sa' nwëesē'jna kxtey myuuwe jīnik pthūuse.

³⁶Txã'wē we'wenijū', Jesusçxáa yā'j ūstetx uy. Sa' txāawe'sxa' sxuuna'tx neeyūu, sa' txān ensu' kim yuhtxwa pta'sxmeeta' txã'wē uyni's.

Teeçx luuçx wëeçxpajsa's Jesus nuykatxhini

(Mt 17.14-21; Mr 9.14-29)

³⁷Sa' kuskuus enkhē', thā'ju kījaçte', nasa wala kuh Jesusa's pu'thegya' kasehtx. ³⁸Aça' teeçx piçthē'ja' nasaa ksxavxyte ūssa' sus we'weçxa':

—Adx nçxi'k teeçxçxáa jipthu txã'sa' meen theg. ³⁹Txã'sa' eçx luuku vxit-sa uweçxa kaywëçxpajja'jna kweeyi'jna wala plxu'k sa' txhwete wējē'çme'. Txã'wē yūute', yuwesu bu'çxçxáak sējē'. ⁴⁰Idx yakh u'jusawe'sxtxi' pxthaa we'weyā'th, txāa eçxa's adx nçxi'k ūusu kutxi'khan. Nawa txāawe'sxa' ājāmeeta' jīte', ⁴¹Jesus pasçxa':

—Dxusa' pu'çxhina sūhwa'j yu'sa' jiphmeesata' naa nasa'. çBagaçxpkaçx i'kwe'sx yakh pu'çxna ūs ya'watka? çBagaçxpkaçx ājāmée fxi'ze ya'wakwe? Mneejxūh iidx nçxi'ka's jīte', ⁴²txāa piçtakxa' Jesus tasxte utxaana kūjūçpkaçxha', txāa eçx luuku vxit-sa' kaywëçxpajja'jçxa pētcku. Nawa Jesusa' juuna' we'weçxa eçx luuku vxit-sa's ūusu kutxi'the', txāa piçtakxa' ew katxhik aça' Jesusa' neya's dukhku.

⁴³Aça' Dxus txakwe wala ew yūute', jxukaysa wala kuh yajkxtxi.

Jesusa' txajx uuwa'ja's ki' pta'sxni

(Mt 17.22-23; Mr 9.30-32)

Na'wē yūuni's nasa wala kuh yajkxna ūspkaçxha', Jesusa' txāa yakh u'jusawe'sxtxi' na'wēk we'we:

⁴⁴—Na'sa' ew wēsē'ljçxa peçxkananuwe: Dxus Nçxi'k Nasa Yuusá's nasa ewmeesa kusete dukhni yuuwa'ja' jīte'wa, ⁴⁵txāa yakh u'jusawe'sx yu' jiyuya' ājāmeeta', txāawe'sx jiyuwa'jmeene' yu' naa pa'ga. Sa' txā'wëçxawa pējx yu' meeta' ūukhçxa.

Kim wejx jxthaakwe jxtuhtesakx

(Mt 18.1-5; Mr 9.33-37)

⁴⁶Txajū' Jesus yakh u'jusawe'sxa' txāawe'sx pwe'sx puutx paapēyi'tx: —Ayte' kwe'sx pwe'sx çmaa wejx jxthaakwe walasakxtha'w? jīna. ⁴⁷Nawa kīh yajkxçxa txã'wē puutx we'weçtewa Jesusa' jiyuçxa', teeçx luuçxkuē's txajx pukate txahçxa' na'jīk:

⁴⁸—Adxa's wedxsa' maawa naa luuçx na'wēsath aħçemée jxpa'gasa', adxa's jxpa'gasa yuutxna. Sa' adxa's jxpa'gasa', adxa's jxkaahsanawa jxpa'gasa yuutxna. I'kwe'sx pwe'sx maa txã'wē āhmeekwesa na'wē yajkxna fxi'zena txāa yuuçxáa jxthaakwe walasa yuuna jīk.

Kwe'stxxi açesamée yu' kwe'sx yakh fxi'zesatxna
(Mr 9.38-40)

⁴⁹Txajü' Juan we'weçxa':

—Kwe'stxxi jxpe'jsa mwëese'j. Teeçx piçthê'j iidx yase's kxsusçxa eçx luuku vxit-sa's nasaa üusu kutxi'jiçte kwe'sxa' uyçxa', txã'wë yūunu jīnatha'w we'we, kwe'sx yakh u'jusameek yu' naa pa'ga jīte', ⁵⁰Jesus paşçxa':

—Maawa kwe'stxxi açewe'wesamée yu' kwe'stxxi pu'çxsa íçxáatxna, açá' txãawe'stxxi' kuçx txã'wë yuunuwe jīk.

Juanwe'sx cieluju ipx kaakijij' wēeni

⁵¹Txajü' Jesus cielun u'jwa'j en utxaaçte', ūukhmée Jerusalen çxhabna u'jya' kasejk. ⁵²Sa' u'jweççxa', yaçte yuwe kaakh, açá' txãawe'sxa' Samaria kiwete teeçx çxhabetx deewa'j yat pakweya' u'j. ⁵³Nawa txãa çxhabetewe'sxa' Jesus Jerusalenna u'jweçte uyçxa', jxpa'ga wēemeeta'. ⁵⁴Txajü' txã'wë yūute', Jakobo, Juanwe'sxa' Jesusa's na'jītx:

—Kwe'sxa' cieluju ipx kaakijij'çxa txãa nasatxi' peba jxthāaswaça', kwe'sxa' kxtey yu'nja'w Dxus yuwe pta'sxsa Eliaswa ma'wēga yūu txã'wēy jīte', ⁵⁵Jesusa' thegçxa' na'jīnak yu'kxpeh:

—I'kwe'sxa' jiyu'çmeei'kwe ma'wë yūuwa'ja'swa. ⁵⁶Dxus Nçxi'k Nasa Yuuçxawa, adxa' nasatx pebaya' yuwe'çmeeth, naasáa nwe'weçxa ewte nvxiht-ya'çxáath kīh jīk.

Txajü' vxite çxhabnatx u'j.

Jesus yakh fxi'ze wēesa
(Mt 8.19-22)

⁵⁷Txãawe'sx dxi'the u'jweçte', teeçx piçthê'j Jesusa's na'jīk:

—Jxpe'jsa, idx yakh yuu wēeth, idx mtee u'jweçtewa jīte', ⁵⁸Jesus paşçxa':

—Yu'kh niimal yuhwa deewa'j kafx jī'phta', açá' vxiçxakuēwa yat jī'phta'. Nawa Dxus Nçxi'k Nasa Yuusa' mtee yuhwa txajx dxiktheçxáa yuja'swa khikhwa'j jī'phme' jīk.

⁵⁹Txajü' Jesusa' vxite's pa'yak:

—Adx yakh myuh jīna.

Aça' txãa paşçxa':

—Jxpe'jsa, müythās, adx tata khuē'lyna pedaaya' u'jweçthu jīte',

⁶⁰Jesus paşçxa':

—Uusaawe'sxa' peekx uusáa pwe'sx ya'pedaatxna. Aça' idxa' Dxus jxkaahwa'j ena'sçxáa pta'sxya' me'j jīk.

⁶¹Txajü' vxite' na'jīk:

—Jxpe'jsa, adxa' idx yakh yuu wēeth, nawa adx yattewe'sx khuē'lytxi neewe'weya' u'jweçthu jīte', ⁶²Jesus paşçxa':

—Maawa mjíia's takhçxaçxáa e'su yu' thegsa' selpimeena Dxus ma'wê jxkaahwa'ja'swa pta'sxya' jîk.

Setenta nasatx Jesus kaahni

10 ¹Txãa e'su' vxite setenta txhitxhçxa, e'z e'zku yaçte kaah, txajx pa'ljwa'l çxhabsu mteewa jxuka. ²Sa' na'ljîk:

—Isa mjíiwa'ja' wala yuh úsa', nawa mjíisa yu' kuhmeeta'. Aça' mjíi namu's pxthaa we'wena mpêjxwe nasa mjíiwa'jsa txajx mjíitewe'sx. ³I'kwe'sxa' jxpa'yakx me'ljwe, piisakuêtx alum ksxavxysu na'wê kajaçthu naa pa'ga. ⁴Ya'ja, vxuyu, pelgatxi txã'wêsa jxumée me'ljwe. Sa' dxi'the nasa pu'jykhêw yuhçxawa weçxana jxthêyuuemeene'kwe. ⁵Kiim yatte pa'ljçxawa, ewçxáa we'wena weçxana pa'jane'kwe. ⁶Aça' txãa yattewe'sx açesameeçxa', txã'wê weçxana pa'jni's ewçxáa jxpa'gatxna. Nawa jxpa'gameete', txajû ki' u'ljwene'kwe. ⁷Sa' mtee ew jxpa'gatxna, txãa yatte paadejene'kwe, txãawe'sx kîh sã'jîni'swa ú'na, txãa pa'gatey mjíisa' ú'wa'ja's jxpa'gawa'l j'i'pha'. Aça' i'kwe'sxa' yat iisa paadehna pekûhnuwe. ⁸Maa çxhabetewe'sx i'kwe'sxtxi jxpa'gate', kxtee úsune'kwe kîh puuçtewa wa'lmée jxpa'gana. ⁹Sa' kxtee açã'satxwa nuykatxhiçxa na'wê pta'sxine'kwe: Dxus jxkaahna pa'ljwa'l ena' i'kwe'sx yakh utxa úsa'. ¹⁰Nawa maa çxhabetewa i'kwe'sxtxi jxpa'gameete', txãa çxhabte jxuka na'ljîne'kwe: ¹¹I'kwe'sxa' jxpa'gameeçxawa yuuwesa yuukahn i'kwe'sx çxhabte kxtã'tuhd yuhnawa sakweekweçxa u'ljweçtha'w kwe'sx çxidate uweni's. Sa' makwe jxpa'gameeçxawa, jiyuçxa neeyúuçi'kwe: i'kwe'sxtxi Dxus jxkaahna pa'ljwa'l ena' utxa úsa' jîne'kwe. ¹²Na'ljî'th na': Dxus kastigäywa'l ente', txãa çxhabetewe'sxa' Sodoma çxhabetewe'sxte jxthaakwe nxus ya'kastigaïtxna.

Çxhab nwêese'jsamée yakh úukhúukhsa

(Mt 11.20-24)

¹³Korazín çxhabte nasa, Beçaidatewe'sx yã'ljçxa, seena' yuh nxuste neeyúuwa'lj'kwe. Ayte i'kwe'sx dxi'pte na'wêth açã'satx nuykatxhina uusáatx fxítxna yúu na' Tiro vxite' Sidon çxhabetewa txã'wêy yúuwaça', txãawe'sxa' pkaltxi nvxihtçxa Dxus tasxte sxawedni txaçxyã'l jyuuna. ¹⁴Dxus kastigäywa'l ente', Tiro vxite' Sidon çxhabte nasate jxthaakwe i'kwe'sxa' nxus kastigo's knayuune'kwe. ¹⁵Aça' Kapernaum çxhabetewe'sxa' cielute u'ljwa'ljsath sühna i'kwe yaaki', nawa infxiernote khêeya' u'ljwa'ljsai'kwe.

¹⁶Txãa çxhabtxi' txã'wê we'weçxa', setentasawe'sxtxi' na'ljîk:

—Maa nasawa i'kwe'sx pta'sxni's wêsê'ljçxa', adxa'swa nwêesê'jsa yuutxna. Sa' maawa i'kwe'sxtxi açesa', adxa'swa açesa yuutxna. Sa' adxa's açesa' adxçxáana ahçemée adxa's kaahsanawa açesa yuutxna jînak jxkaah.

Setentasawe'sx ki' sxawedni

¹⁷Txajū' setentasawe'sxa' wala weçxana ki' sxawedtxi na'ljina:

—Eçx luuku vxit-sa yuhwa idx pu'çxte', kwe'sxtxi' nwēesē'je'tx jina pta'sxte', ¹⁸Jesusa' na'ljik:

—Isa yuh pta'sxi'i'kwe adxa' uythu eçxthē'ja' cieluju kpi'sx kwehneni na'wē wetena kijaçte. ¹⁹I'kwe'sx txā'wē yūukahn fiçxáath adxa' kihtewa jxuka ajāwa'ja's ūs, ul weeswée usmitx kijkih eçx seena'sawa i'kwe'sxtxi kpā'vxit-ya' ajākahmén. ²⁰Nawa eçx luuku vxit-sa i'kwe'sxtxi nwēesē'pha'gaçxáa yu', weçxweçxa yaakxnuwe. Naasáa cielute i'kwe'sx yase fxi'jni ūsa' txāa pa'ga yuuçxáa weçxweçxa myajkxwe jičxa', ²¹Jesusa' txajx ūuste wala weçxak txā'wē Dxus Espiritu pu'çxpa'ga. Sa' na'ljik:

Jesus ūuste wala weçxweçxa yaakxni

(Mt 11.25-27; 13.16-17)

—Tata, idxa's wala weçxa'th, idxa' cielute vxite' naa kiwete jxuka Namug. Txāasag naa kiwete wala jxtuhtesa yuutxi's kaajiyu'jmeeçxawa, ahmeekwesa yuutxi's jiyuwa'ja's ūsgu. Iidx jxthāasni' txā'wēne' yu' aça' txā'sa' kxtey yuug.

²²Adx Tata' kijkihtewa jiyuwa'ja's adxçxaçxá'sku dukh. Txāa pa'ga kim yuhwa jiyu'çmeeta' Dxus Nçxi'ka's, naasáa Ney yuuçxáa jia'. Txā'wēy Tata'swa kim yuhwa jiyu'çmeeta', naasáa Nçxi'k yuuçxáa jia', sa' maatxwa Nçxi'k í khiyu'theçxáa jiyuya' ajātxna adx Tata's.

²³Txā'ljīçxa' txāa yakh u'ljusawe'sxtxi theçxa', na'ljik txāawe'sxçxáatx:

—Açxh i'kwe'sx uyna ūsi'kwe txā'sna txāawe'sx yafxju uysá' wala yuh weçxawa'l jiphta'. Txāa pa'gatey açxh i'kwe'sx uyna ūsi'kwe txā'sa' ²⁴nyafxiitey Dxus yuwe pta'sxsawe'sx vxite' jxkaahsawe'sxwa wala yuh uy wēetx, nawa uyya' ajāmeeta'. Txā'wēy zhiçxkwe pta'sxni's açxh i'kwe'sx wēsē'jna ūsi'kwe txā'snawa wala yuh wēsē'j wēetx, nawa wēsē'jya' ajāmeeta' jik.

Teeçx Samaritano ew yūusa

²⁵Txajū' ley kaapiya'jsa teeçxsa Jesus tasxte utxaaçxa', ewmée vxit wēeçxa na'wēk paapējx:

—Adxa' çma'wē yūuçxa pçumée itxī fxi'zewa'ja's jiphuki'th? jite', ²⁶Jesus pasçxa':

—Dxus leyte' çma'wē fxi'jni ūsna açga lēeyçxa jiyu'çmée? jite', ²⁷ley kaapiya'jsa' na'wēk pas:

—Idxna jxpe'jsa Dxusa's ūusuh jxuka yajkxçxa bagaçxte yuhwa peena yu' txuteeya'mée utxaaçxa txāa yuuçxá's selpiina mfxi'ze. Sa' idx ma'wēga ya'peeygāja', txā'wēy vxite nasatxwa mpeeygāh jī'k jite', ²⁸Jesus we'weçxa':

—Ew yuh pasgu. Txã'sa' kxtey yuuçxa', pçumée itxĩ fxi'zewa'ja's ji'phune'ga jĩk.

²⁹Nawa ley kaapiya'jsa yu', txajx yuweteyçxáa ewmeete neeyũuyã'jçxa', na'wëk pêjx:

—Txãa vxite nasa jĩ'k txãa yu' çkimtyna? jĩte', ³⁰Jesus pasçxa' na'wëk kwentu'j:

—Teeçx piçthê'j Jerusalenu kasehçxa' Jerikon u'jni dxi'jkhê u'jweçte', peswée dxi'the yupxa' kasehtx. Sa' kījkihne' jxūna u'jweç yu', txã's jxuka peswéetx. Sa' kpã'vxitçxa', uuwa'jçxáa yã'jtx nvxiht. ³¹Peswée u'jni txaçxmeyna, teeçx sacerdotê kīhçxa' uyku txãa kpã'vxitnisa's, nawa pu'çxmée dxi'j skhêwku. ³²Txã'wëy Levxi jithewe'sxwa kīhçxa' uyku, nawa txãawa pu'çxmée dxi'j skhêwku. ³³Txajū' teeçx piçthê'j Samariatewe'sx txãa dxi'khêy kīhçxa', kpã'vxitnisa's uyçxa', wala peeygãjk. ³⁴Sa' kpã'yūusa tasxte utxaaçxa', kpã'su aceite vxino yakh awna yu'çe'kh. Txajū' txajx a'jni jibate yakhçxa ka'ja'kh, sa' paadee yatna pe'jna u'jçxa, kxte' kījkihwa peejxmeeek sã'jĩ. ³⁵Kuskuus enkhê', txãa Samariatewe'sxa' u'jweççxa', e'z vxyu kutxi'jçxa, yat namu's dewek. Sa' na'wëk neewe'we: Naa piçthê'j kpã'vxitnisa's meen sã'jĩ. Meeçxa' vxyu nvxiituçthu txãa ähmeewána nawa ki' sxawedna pa'jçxa, dukhe'nja txãa yuuluni's jik. ³⁶Jesusa' txã'wë pta'sxçxa na'wëk pêjx:

—Idx ũus myajkx. Txãa tekhtewe'sxa' çmaasaga ew yūusana' thegu'? jĩte', ³⁷ley kaapiya'jsa pasçxa':

—Kpã'vxitnisa's peeygãasa jĩte', Jesus pasçxa':

—Idxwa txã'wëy pu'çxna peeygãhna me'ju jĩnak jxkaah.

Maria Martawe'sx yatte Jesus pa'jni

³⁸Txajū' Jesusa' teeçx çxhab le'çxkuêtek pa'jya' u'j. Txãa çxhabte teeçx u'y Marta yaasesa' txajx yatte jxpa'gak. ³⁹Sa' Marta' teeçx nyakhku ji'phu' Maria yaasesa. Aça' Maria yu', Jesus pta'sxniçxá's wësê'jya' txajx tasxte kaçxku. ⁴⁰Naapkaçxha' Marta yu', mjĩiniçxá's wala pa'pçxuna ũsçxa', Jesusa's utxaaçxa na'jĩk:

—çYyu'çmeegá' na'wë ũ'kweçxáa wala mjĩina ũste', ũ'kwe nyakh yu' pu'çxhiçme'. Aça' mpu'çxkaah jĩte', ⁴¹Jesus pasçxa':

—Marta, i'kwe' wala yuh kuh jwed mjĩina tudumée ũsi'kwe. ⁴²Nawa jxthaakwe peejxsa yu' teeçx jwed yuuçxá'. Aça' Maria' wejx jxthaakwe peejxsa's wësê'je'ça' txã'sa' kim yuhwa kusa'jmeetxna jĩnak we'w e.

Dxus yakh na'wë puutx we'wewa'ja'

(Mt 6.9-15; 7.7-11)

11 ¹Teeçx ente' Jesusa' Dxusna orãynak u'pu' teeçx ahte, sa' orãyna jxã'the', txãa yakh u'jusa teeçxsa' na'jĩk:

—Kwe'sxtxi mkaapiya'j, Dxus yakh puutx we'wena orãyya', Juanwa ma'wëga txãa yakh u'jusawe'sxtxi' kaapiya'ja' txã'wëy jĩte', ²Jesus pasçxa':

—Dxus yakh puutx we'wena oraĩçça', na'jĩne'kwe:
 Kwe'sx Tata cielute ũssa,
 Idxa' багаçxtewa wala jxtuhthesag.
 Iidx jxkaahwa'j ena'sçxáatha'w ũythasu'.
 Naa kiwete idx ma'wēne'ga jxthāasu' txāa yu' jxuka kxtey tee yuu
 cielute na'wēy.

³ Āçxh kwe'sx ũ'wa'ja's meen pees.

⁴ Kwe'sx ewmée yūuni's meen peltunaĩ, kwe'sxwa peltunāytha'w
 kwe'sxtxi ewmée yūusatx txāa pa'ga.

Ewmeete wetekahmén meen nwe'we jĩna oraĩne'kwe.

⁵ Txajũ' na'jĩnak we'we:

—I'kwe'sxa' namiku yatte kuspçāh u'jçxa': Namiku, tekh pan mpeeki'j.

⁶ Dxi'j u'jsa adx namikuk yatte pa'j, aça' kĩh yuhwa ji'phmeeth puuçwa'j,
 çjĩmeema'kwe kĩhwa ji'phmeeçxa'? ⁷ Aça' dxiiju passa' na'jĩna: Adx luuçç
 deeni yā'tha', aça' kuçç susnu. Naapkaçxha' vxitxwa aphni yā'j ũsa', aça'
 kĩh yuhwa ũsya' ewume'nja jĩçxawa, ⁸ jwee kuçç susna nes yuukahmén
 kiiteçxa kĩh pējxtewa jxuka ũsuna. Na'jĩ'th na': Namiku pa'gaçxāa
 kuspçāh kiiteçxa ew yūumée naasāa kuçç suskahménçxāa txā'wē yūuna.
⁹ Txāa pa'gath adxa' i'kwe'sxtxi Dxusna pēykaja' aça' txā' ũsuna. Kĩh
 peejini'swa pakweçxa' uyuune'kwe. Vxitxte pa'yate' phaadena. ¹⁰ Na'jĩ'th
 na': maawa Dxusna pēysa', jxpa'gana. Aça' pakwesa', uyuuna. Aça'
 vxitxte tu'kakate', phaadena.

¹¹ Ūus miijajkxwe: i'kwe'sx luuçç pan pējxte', çkweta's ũsma'kwe?
 Meeçxa' wedx pējxte', çula's ũsma'kwe? ¹² Meeçxawa çĩç pējxte',
 çusmitxa's ũsma'kwe? ¹³ I'kwe'sxa' Dxus dxi'pte ewmeesaçxawa, i'kwe'sx
 luuççxtxi' ewsaçxāa i'kwe peesu'. Aça' i'kwe'sx Tata cielutewe'sxa' wejx
 jxthaakwe ewsa Dxus Espiritu's peesuna pēysatxi's jik.

Dxus Espiritu's açewe'weni

(Mt 12.22-30; Mr 3.19-27)

¹⁴ Jesusa' eçx luuku vxit-sa kwe'we'jsame's piçthē'j ũusuh kutxi'the',
 txāa eçxa' ũusuh kasejk, aça' txāa piçthē'ja' we'weya' ājak. Txā'wē yūute',
 nasa' wala kuh yajkxna neeyūutx. ¹⁵ Nawa vxite yu', na'jĩnatx we'we':

—Eçxthē'j pu'çxteçxāak naa piçthē'ja' eçx luuku vxit-satxwa nasaa
 ũusuh kutxi'ji' jĩ'tx.

¹⁶ Naapkaçxha' vxite yu' Jesus kĩh yūutewa jiyuya' sũhçxa cielujũ
 seena'sa mkaavxya'ja'j jĩte', ¹⁷ Jesusa' txāawe'sx ewmée ũus yaakxni's
 jiyuçxa', kxtey yuumée na'wēçxāak we'we:

—Maa gobiernowa peekx nasa yakhĩçxāa puiiçxa', txāawe'sx
 pwe'sxĩçxāa jxuka pçuutxna. Maa yattewe'sxwa txāawe'sx pwe'sxĩçxāa
 puutx puiiçxa', txāawe'sx pwe'sxĩçxāa jxuka pçuutxna. ¹⁸ Txā'wēy
 eçxthē'jwa txāawe'sx pwe'sxĩçxāa puutx puiiçxa', puutx pçuutxna.

Adxa'sa' eçxthê'lj pu'çxteçxáak eçx luuku vxit-satxwa nasa úusu kutxi'jya' ajā' jī'i'kwe txāa pa'gath txā'jī'. ¹⁹Txā'wē dxihte!, i'kwe'sx yakh u'jusatxwa eçxthê'ljjiçxáane! pu'çxhi' eçx luuku vxit-satx kutxi'jya'. Ew yajkxwaç yu!, i'kwe'sx yakh u'jusafíçxáa i'kwe'sx jxpubani's khiyu'jwa'jsata'. ²⁰Adxa's eçxthê'lj pu'çxmée, Dxus pu'çxteth eçx luuku vxit-satx nasaa úusuh kutxi'ji!. Isa ew jiyuwaç yu!, i'kwe'sxtxi Dxus jxkaahwa'lj en ajk txāa pa'ga txā'wē yūuçthu.

²¹Teeçx piçthê'lj çxhāçxhasa' kījkihwa txajx ji'phuni's ivxiituya'mée sūhçxa puiiwa'lj tū'sçxa yatte yupu'k ka'ga'lja'mée. ²²Nawa vxite wejx jxthaakwe çxhāçxhasa pa'lçxa', txāa yupsa's knayçxa puiiwa'lja'swa kusa'jna yuuçxa ji'phunitxi's txāak iiyamu.

²³Adx ju'gumée ússa!, adxa's açesata!. Aça' adx yakh pkhakh pu'çxsame' neusaçxa txā'wē yuuna.

Eçxa' nasa úuste ki' sxawedni

(Mt 12.43-45)

²⁴Eçx luuku vxit-sa' nasa úusu kasehçxa', nasa u'pnimeesuk jxkaasewa'lj pakwena u'ju!. Nawa uymeeçxa' naa sūju'k: Adx kasehni yatnay sxawedna u'jwe'nja sūhçxa ²⁵ki' sxawedte' txāa nasa úus yu' yata's ew padçxa txaahni na'wē ústek uyna pa'ja'. ²⁶Sa' u'lçxa vxite siete eçx txāate jxthaakwe ewmeesatx nuypa'lçxa, txāa nasa úuste pejka u'katx. Aça' txāa nasa' jxthaakwek ewmeesa yuuna pa'ja'.

Kim wejx thaakwe weçxawa'jsatxki

²⁷Jesusa' txā'wē pta'sxiçpkaçxha!, teeçx u'y nasaa ksxavxyte na'ljinak sus we'we:

—Idxna kçxu'lçxusa mama yakha' seena' yuh wala weçxa yuhna jīte!,

²⁸Jesus paççxa!:

—Txā'wēme!, wejxwa Dxus we'weni's wēsē'lçxa!, txajx jxkaahnitxi's kxtey yuusáa yakhçxáa seena' wala weçxa yuja' jik.

Nasa ewmeesa' cieluju kihçxáawa kaavxya'lja'khaahni

(Mt 12.38-42; Mr 8.12)

²⁹Txajū' nasa' Jesus we'weni's wēsē'lja' txajx tasxte pkaakhesatxi' na'ljinak we'we:

—Nasa ewmeesa naa ensuwe'sxa' kihçxáawa seena'sa

kaavxya'lja'khaja'tx. Nawa kih yuhwa jwee yu' kaavxya'lja'jmée, naasáa Dxus yuwe pta'sxsa Jonas ma'wēsaga yu' txā'sçxáana khiyu'the ewna.

³⁰Jonaswa ma'wēga Níniwe çxhabte nasa ewmeesatx khiyu'lj, txā'wēy Dxus Nçxi'k Nasa Yuusaawa naa ensu nasa ewmeesatx khiyu'jsa'.

³¹Naa ensu nasatx Dxus kastigäywa'lj en ähte!, txāniitey jxu'lj kiwete jxkaahsa u'ythê'lja' äçxga nasatxi' ewmeete nvxiituna. Txāa u'ya' txakwe

jxu'juwe'sx yuhçxawa, wa'lméek Salomon pta'sxniçxá'swa wësê'jya' pa'j. Naapkaçxha' açxh yu' Salomonte jxthaakwesa ayte ūsa' nawa wa'lu'tx naa pa'ga txāa u'ya' ewmeete nvxiituna. ³²Txā'wēy Níniwe çxhabetewe'sxwa Dxus kastigāywa'j en āhte', naa ensu nasatx ewmeete nvxiitutxna. Txāawe'sxa' Jonas pta'sxniçxá'swa wësê'jçxa', txāawe'sx pkaltxi nvxihtçxa Dxus tasxte sxawedtxi. Naapkaçxha' açxh yu' Jonaste jxthaakwesa ayte ūsa' nawa wa'lu'tx naa pa'ga Níniwe çxhabetewe'sxa' ewmeete nvxiitutxna.

Yafxa' kakwe's ewte kaafxi'ze'jsata'

(Mt 5.15; 6.22-23)

³³Lampara's atūu dxiite aphçxa txajxa' txā'wē ya'pki'taçme', wejxwa ēetek ya'txaja' eena' kweethkahn, kxah maawa u'kasa' eena'te u'kakahn. ³⁴Peekx kakwete yafxa' lampara na'wēsata'. Aça' iidx yafxa' suwenimée ewçxa' iidx kakwete jxuka eena' kweethna nes yuuna. Nawa iidx yafx ewmée suweniite', iidx kakwe' jxuka çxhi'dxteçxáa neeyūuna. ³⁵Iidx kakwete kīhte yuhwa çxhi'dxsamée jxuka eena'saçxáa ūste', jxuka ew uyuune'ga, lamparawa ma'wēga ew eena' kweethe' txā'wē. ³⁶Nawa mpa'yajkx. Txā'wēme', eena' khikhysa ji'phgu txāa kweethmeete', çxhi'dxteçxáa neeyūune'ga.

Fxariseo vxite' ley kaapiya'jsawe'sxtxi yuuwesa Jesus nvxiitni

(Mt 23.1-36; Mr 12.38-40; Lk 20.45-47)

³⁷Txajū' Jesusa' txā'wē we'wena jxā'the', teeçx fxariseo txajx yatte sāj'jya' pi'kxku. Aça' Jesusa' u'jçxa ū'ya' kaçxku. ³⁸Txajū' txāa fxariseo' naasūjk: Naa piçthē'ja' wala yuh fxiy yu'k kusekhē yu' kaahmēe ū'ya' kaçxku sūjū'k. ³⁹Aça' Jesusa' na'jik:

—Fxariseowe'sx i'kwe'sxa' plaatu waso ma'k yuu nawa txāa yuutxi' ekakhē yu' pki'khi'i'kwe. Nawa i'kwe'sx ūus dxiite yu', pesweena kijkihwa ewmeeçxáa yūunisaçxáa jxuka uta ūsa'. ⁴⁰I'kwe'sxa' jiimeewá'kwe: Dxusa' kakwekhē āakhēwe'sxçxá's uyçxa', ūustewe'sx yu's uyu'çmeene' ¿sūjū'wá'kwe? ⁴¹Txā'wē kīhwa ji'phmeesatx ūusuh jxuka peeygāhna lmusxnu peeswaça', āakhēçxáa yaatesa yuumeene'kwe.

⁴²Fxariseowe'sx, i'kwe'sx yakha' seena' yuh ūukhūukha', i'kwe'sxa' putatxhāl, me'sukwe, kijkihwa uuthasxte ūsna txāa yu'sa' jxuka diesmo dukhçxawa, Dxus yu'sa' ūusu jxuka wedxna nwēese'jna fxi'ze'çmeei'kwe naa pa'ga seena' yuh ūukhūukha'. Diesmo's dukhwa'j yuja', nawa Dxusna nwēese'jni wejx jxthaakwe ewa'.

⁴³Fxariseowe'sx, i'kwe'sx yakh seena' yuh ūukhūukha', i'kwe'sxa' judiwe'sx pkhaakhenisu kaçxni wejx ewsaçxáana i'kwe pakwé', sa' çxhabsu msuwa ewkuēçxáa weçxa jxthāasna i'kwe pekūju' naa pa'ga seena' yuh ūukhūukha'.

⁴⁴Ley kaapiya'jsawe'sx vxite' f xariseowe'sx, i'kwe'sx yakha' seena' yuh ũukhũukha', i'kwe'sxa' āajuçxáa ew we'weçxa', ũus dxiiyu yu' ewmeeeçxáa yajkxna fxi'zepa'ga. I'kwe'sxa' uúsáa pedani kafxa's aphnisa na'wēi'kwe. Txāa kafxa's aphte', nasa' ma'wē dxiiga kīh ũstewa jīmée kajkwesu skhēuukx txā'wēçxáa i'kwe jiyunimeete fxi'ze' jite', ⁴⁵ley kaapiya'jsa pasçxa':

—Kwe'sxtxig açewe'we' jítewa, ⁴⁶Jesusa' ki' we'weçxa':

—Ley kaapiya'jsawe'sx, i'kwe'sx yakha' seena' yuh ũukhũukha', i'kwe'sxwa vxiteçxáatx txā'wē kim yuhwa ājāwa'jmée thēysa's ũsçxa', i'kwe'sx yu', ma'wēkuēçxáa yuhwa pu'çxhiçmeei'kwe naa pa'ga.

⁴⁷Txā'wēy i'kwe'sx ji'j yaçgawe'sx txā'wē Dxus yuwe pta'sxsatx ikhçxa pedaate', i'kwe'sx yu' txāa pedani's zhiçkwe vxitnai'kwe pheu'ju'.

⁴⁸Sa' txā'wē yūuçxa', kwe'sx ji'j yaçgawe'sx ew yuh yuutx jīçxane'kwe txāawe'sx ikhçxa pedani's zhiçkwe vxitna pheu'ju' naapa'ga i'kwe'sx yakha' seena' yuh ũukhũukha'.

⁴⁹Kxají Dxusa' txā'wē yūuni's we'weçxak na'jī': Adx yuwee pta'sxsa txāniitey ensuwa kaja'nja, sa' naa ensuwa kaja'nja. Nawa maafítxi' ikhetxna, sa' vxite yuutxi' wala ahçena pkxuutxna jī'k. ⁵⁰Naa ensu nasa' jxukaysa kastigo's knayuutxna, ⁵¹txā'wē Abela's ikhnijūjx Dxus yuwe pta'sxsatx ikhçxa Zakariasa's ikhni entepkaçx ee pkawpa'ga. Txāa Zakarias yu'sa' dxuus yat patxute altal utxatetx ikh. Txāa pa'ga naa ensu nasatx Dxusa' kastigaína, txā'wē Dxus kaahnisatx ikhpa'ga.

⁵²Ley kaapiya'jsawe'sx, i'kwe'sx yakha' seena' yuh ũukhũukha', i'kwe'sxa' txakwe wala leya's jīsatha'w jīçxawa, vxite yuutxi's kaapiya'ja'çmeei'kwe. Txāasa vxite jiyu wēesatx i'kwe'sxa' yupnaçxáa ũsi'kwe jite', ⁵³ley kaapiya'jsawe'sx vxite' f xariseowe'sxa' wala ũusaçxaçxa kīhçxáawa wala paapējxtxi, ⁵⁴kīhteçxáawa ewmée paste' pāatxhī'khyā' sūhçxa.

Fxariseowe'sx yakh jxpa'yakx fxi'ze kaahni

12 ¹Txajū' nasa iiméh seena' wala pkhaakheçxa jxuka utate', Jesusa' txāa yakh u'jusawe'sx khuē'ytxi na'wēk we'we:

—Fxariseowe'sx ewmée yūuna fxi'zeni's mpa'yajkxwe. Txā'wēme' txāawe'sxa' āajuçxáa ew we'weçxa', ũus dxiite yu', ewmeeeçxáatx yaaki'.

²Nawa makwe paaçte sūthnisaçxawa kīh yuhwa āate vxyaamée yu' neeyūumeena, sa' makwe ũusteçxáa yaakxnisawa kīh yuhwa jiyunimée yu' neeyūumeena. ³Txāa pa'ga i'kwe'sxa' kim yuhwa wēsē'jnimeete wá'kwe we'we' nawa jxuka pthūusena. Meeçxa' i'kwe'sx ũusteçxáa wá'kwe ewmée yajkx, nawa maazkuēe yat-suwa jxuka kaajiyu'jni yuuna.

Kimna wejx ũukhwa'jkx

(Mt 10.28-31)

⁴Āçxha', adx namiku i'kwe'sxtxi na'jī'th: Kakweçxá's ikhsatxi' ũukhnuwe. Txāawe'sxa' kakweçxá's ikhçxa', jwee yu' kīhwa yūuya'

ājāmeetxna. ⁵Nawa pta'sxiçthu kimna ũukhwa'thewa: Naa kiwete ïtxĩ ul'juni's kusa'lçxa', ũusa's infxiernote kaahwa'ljaşçá's ũukhna mfxi'zewe. Txã'sçxáa ũukhwa'ja'.

⁶Tahç vxiçxakuët x e'z centawoteçxáak ya'txweyú'. Nawa makwe pa'gameesatewa Dxusa' teexçxáa yuhnawa peçxkanaméek thegna fxi'ze'. ⁷I'kwe'sx jxkwette dxkhas yuhwa jxuka isani ũsta'. Aça' i'kwe'sx yu' maazkuëe vxiçxakuëtewa jxthaakwe pa'gasai'kwe. Txãasa ũukhmée mfxi'zewe.

Jesus kimtewa thaamemée pta'sxni

(Mt 10.32-33; 12.32; 10.19-20)

⁸I'kwe'sxtxi na'ljiçthu: maawa naa kiwete nasaa dxi'pte thaamemée Kristo jiiith jina áate pta'sxsatxi', adxwa Dxus Nçxi'k Nasa Yuusa' txã'wëy Dxus angeleswe'sx dxi'pte thaamemée: Na' adx nasata' jina pta'sxi'nja.

⁹Nawa maawa naa kiwete nasaa dxi'pte thaameçxa Kristo's jiimeeth jina ïsxiijana aça' adxwa Dxus angeleswe'sx dxi'pte txã'sa' jiimeeth ji'nja.

¹⁰Maawa Dxus Nçxi'k Nasa Yuusa's makwe açewe'wetewa, ya'peltunaína. Nawa Dxus Espiritu's açewe'wete', bagaçxte yuhwa peltunäynimée yuuna.

¹¹Na'lji'th na': i'kwe'sxtxi judiuwe'sx pkhaakhenisu meeçxa' khuëswe'sx tasxte kuutxa'thewa, ũukhnuwe kuh yajkxna kih we'weki'th sühna.

¹²Txãa pa'gatey Dxus Espiritu' ma'wë we'wewa'ja'swa kaaüusuthe'jena txãa dudte jik.

Teeçx ji'phsa ũ'a's jxaawya' yaakxni

¹³Txajü' teeçx piçthëj nasaa ksxavxyte ũssa' Jesusa's na'ljik:

—Adx yakhthë'ja's meen we'we, tatawe'sx ji'phuni's pxähn adx jii txudeekahn jite', ¹⁴Jesus paşçxa':

—¿Kimga adxa'sa' txudeedewa'ljsa meeçxawa khuës na'wësa ki'p? jičxa', ¹⁵na'wëk we'we:

—Mpa'yajkxwe, naa kiwete ji'phuniçxá's yaakxnisa's. Txã'wëme' naa kiwete kijkihwa ji'phuçxaçxáa txã'wë ïtxĩ ya'fxi'ze'çme'.

¹⁶Txajü' Jesusa' na'wëk ejemplo pta'sx:

—Teeçx piçthëj wala ji'phsa u'pu'k. Txajx kiwete uuthasx wala yünku. ¹⁷Aça' txãa ji'phsa' yajkxya' kaçxku: ¿Ma'wë yüuki'th? Mtee yuhwa adx ũ'a's jxuka jxaawya' äjänimeeth süjü'k. ¹⁸Sa' yajkxku: Jiiyã'th ma'wë yüuwa'ja'swa. ũ' jxaaw yattxi pëtxya'wath, vxite wejx walasa txajxa'. Sa' kijkih ũ'wa thë'the' vxite' kih ji'phunitxwa kxtee jxaawu'nja. ¹⁹Txajü' adx ũuste na'lji'nja: Wala kihwa jxaawni ji'phgu, wala kuh anxu selpiwalj. Açxha' mjiiimée kaasena kihwa ũ'na weçxweçxa miyajkx süjü'k. ²⁰Nawa Dxusa' na'ljik: Ähmeeg yaaki'. Naa kuste uuya'wag. Aça' iidx ji'phuni jxaawni' çkiim jii yuuwa'ljtxna? jik. ²¹Jesus we'weçxa': Txã'wëk ya'yu'

naa kiwete ji'phuniçxá's nuywalaana üsçxa', Dxus dxi'pte yu' puuplek neeyü' jîk.

Kwe'sx peejini's Dxusa' jxuka pu'çxhina
(Mt 6.25-34)

22 Jesusa' txãa yakh u'jusawe'sxtxi' na'wêk yu'kxpeh:

—I'kwe'sxa' çkîhte ü'wa'j uyuukxtha'w? Sa' ropawa çkîhte uyuukxtha'w? sühna pa'pçxunuwe. 23 Txã'wê yuukahmenî itxî fxi'zenisa' ü'nite jxthaakwe ewsa', aç'a' txã'wêy kakwewa ropate jxthaakwe ewsa'. 24 Vxiçxakuêtx mthegwe wakx. Txãawe'sxa' uja'çwameeta', sa' ü' jxaaw yatwa txahçxa ü' pkhakhe'çwameeta'. Nawa Dxusa' txãawe'sxtxi' sã'jî'k na' i'kwe'sx yuutxi's wejx txã'wê sã'jîna vxiçxakuête jxthaakwesai'kwe naa pa'ga. 25 I'kwe'sxa' çmaaçxá' iiméh wala pa'pçxuçxa peena medio metro thaakwe walaaya' äjama'kwe? 26 Txã'wê äjameeçxa', çkîjxa'çxáakwe naa kiwetewe'sxçxáatx txakwe wala pa'pçxu'?

27 Kitetx mthegwe, ropa uyya' mjüimeeçxawa ma'wêta zhiçxkwe walá'. Isath we'we': Jxkaahsa Salomon txakwe ji'phsa yuhçxawa txãa kite na'wê yu' zhiçxkwesa ropa athme'. 28 Kite' teeçx en fxi'zena', kuskuuskhé' ipxte kabwa'jçxáa yã'thewa txã'wêk zhiçxkwe pheu'j. Dxusa' txã'wêy i'kwe'sx yuutxi's wejx ropa ewsa üsna nes yuuna na's i'kwe Dxusa' txã'wê yuuna süjü'çmêe. 29 Txã'wê yã'the', ü'wa'j çkîhte uyuukxtha'w? sühna pa'pçxuna fxi'zenuwe. 30 Naa kiwete nasaçxáatx kakwete peejiniçxáana yajkxna fxi'ze'. Nawa i'kwe'sxa' cielute Tata ji'phi'kwe txã' jxuka jiiyã'ja' i'kwe'sx kîh peejini'swa. 31 Txãa pa'ga wejxwa Dxus jxkaahnitewe'sxa's khuë'yna wejx thaakwe mpa'pçxuwe. Naa kiwetewe'sxtxi' wejx pa'pçxumeetewa, pejka yuh üsni yuuna.

Cielute ji'phuwa'jçxá's mpa'pçxuwe
(Mt 6.19-21)

32 I'kwe'sxa' kuhmeekwe i'kwe nawa üukhnuwe, txãa pa'gatey i'kwe'sx Tata cielutewe'sxa' i'kwe'sxtxi peeygãhçxa txajx jxkaahna üsni's i'kwe'sxtxi üsya'wa'. 33 Ji'phunisa's txweyçxa jxpeejsatx mpeeswe. Vxyu jxaawni suwewa'jmeesa mvxitwe. I'kwe'sx ji'phuni cielutewe'sxa' pçumeena, kxteea' kîh peswée yuhwa u'kameena, sa' çxikaçxáa yuhwa suwmeena. 34 Mtee jxaawni ji'phçxa', kxte yuuçxáak wejx jxthaakwe yajkxna ya'fxi'ze'.

Jxpa'yakx üythasna üsni

35 Jxuka pheu'jçxa lamparatx pki'taçxa üythasna meswe. 36 Patrona' boda yatu sxawedna pal'çxa', vxitxte tu'kakaçpkaçxha', selpisaawe'sxa' dudtey vxitxa's phaadeya' jxpa'yakx üythasna üssa na'wê myuuwe. 37 Jxpa'yakx üste patron pa'the', selpisaawe'sx yakha' wala yuh weçxa yuhna. Isath we'we': Txã'wê

jxpa'yakx ūssatxi' patrona' pheu'jçxa mesate kaaçxi'jina puuçya'. ³⁸ Kuspāh ma'k yuu meeçxa' khikhiiçte ma'k yuu nawa jxpa'yakx ūste pa'the', selpisaawe'sx yakha' wala yuh weçxa yuhna. ³⁹ Ūs miyajxwe wakx: Maa yat namuwa peswée kīh orate txajx yatte pa'jwa'ja's jiyuwaça', dehmée jxpa'yakx ūsçxa' ka'ga'jmeena txajx yatte pesweewe'sxte. ⁴⁰ Ikwe'sxwa txā'wēy pheu'jçxa jxpa'yakx meswe. Txā'wēme', yajxkmée ūsiyna, Dxus Nçxi'k Nasa Yuusá' kihçxáa yuuna jik.

Selpisáa ewsa vxite' ewmeesa

(Mt 24.45-51)

⁴¹ Txajū' Pedro' na'wēk pējx:

—Naa ejemplo' çkwe'sx jiiçxáa wána meeçxa' jxukaysatx wá'ga pta'sxi'? jite', ⁴² Jesusa' na'wēk pta'sx:

—Maa patronwa yultumu nwéesē'jsa ewsa's neewe'weçxa nvxiituna, txajx yatte mjīsatx sāl'jina nes yuukahn. ⁴³ Aça' patron jxkaahni's kxtey yuuna ūste patron pa'the', txāa selpisáa yakha' wala yuh weçxa yuhna. ⁴⁴ Isath we'we': Txā'wē yūusa's patrona' txajx j'phuni's kījkhnawa jxuka txāa yultumuçxaçxá's neewe'weçxa thegkahn nvxiituna. ⁴⁵ Nawa txāa yultumu': Adx patron dud pa'jmeena sūhçxa kxtee mjīsatx pkxuuya' kiiteçxa, txāa yu' tudxna tūuya' kiitena. ⁴⁶ Naapkaçxha' txajx patrona' sxaweduuna txā'wē yultumu' patron pa'jwa'ja's jii meeçxa' ūythasmée ūsiyna. Sa' wala seena' kastigaína, nwéesē'jsameewe'sxtxi ma'wē kastigaikx txā'wēy.

⁴⁷ Maa selpisaawa txajx patron jxthāasni's jiiçxawa kxtey nwéesē'jsame', wala kujus kastigāyni yuuna. ⁴⁸ Nawa maa selpisaawa patron jxkaahni's jii meeçxa' āhmée yūuna txā'sa' kujusmée ya'kastigaína. Maanawa wala ūsçxa', wala ya'pēyina. Aça' maanawa jxthaakwe kīhnawa neewe'weçxa', jxthaakwe ew jxpe'khanfí yuuna.

Jesusa' nasatx kaapui'jsa na'wē yuuni

(Mt 10.34-36)

⁴⁹ Naa kiwete ipx pki'taya' kīisa na'wēth kīh, behnayā'j ūswaç ma'wē wala weçxaaki'th. ⁵⁰ Adxa' uuwa'jsath txāasa wala nxusna u'juth uuwa'j en āhpkçaç. ⁵¹ Naa kiwete puiimée wēt kaafxizel'jya'ne' kīh çsūjū'wá'kwe adxa'sa'? Nawa txā'wē yūuya' kīhmeeth. Adx pa'gateçxáa maa nasafí yu' puutx yahçena puuina fxi'zetxna. ⁵² Açxhūyā'ja' teeçx yattewe'sx taç nasaçxawa tekhsa' e'zsatx ahçena puutx txā'wēçxaçxáa puuina fxi'zetxna. ⁵³ Neyā' nçxi'ka's açeyajxna fxi'zena. Aça' nçxi'ka' neya's txā'wēy yūuna fxi'zena. Njī'ja' niisa's ahçena fxi'zena, aça' niisa' njī'ja's txā'wēy yūuna fxi'zena. Swegra' nkuēmyu's açena, naapkaçxha' nkuēmyu', swegra's açena.

Naa ensu kīh yūuya'watewa txāa yu'sa' jiiimée fxi'zeni

(Mt 16.1-14; Mr 8.11-13)

⁵⁴ Txajū' Jesusa' na'wēk we'we:

—I'kwe'sxa' sek khēenijū tāaph kiitena yuhte', nus pa'jya'wa' jī'i'kwe, aça' kxtey yu'k. ⁵⁵Sa' wejxaçte', sek ya'wa' jī'i'kwe, aça' kxtey yu'k. ⁵⁶¿Ma'wē yuuçxa nus pa'jna ki' sek ya'watewa jīsatha'w jīna ūuste yu' iwejçx i'kwe yajkxna fxi'ze'? Sa' jīsaçxa' ¿ma'wētekwe naa ensu' kīh yūuçtewa txā's yu' jiyu'çmée?

Açesa yakh yuwe's puutx we'weni

(Mt 5.25-26)

⁵⁷I'kwe'sxa' ¿mjīitekwe ewteçxah puutx we'wena yuwe's pheu'ju'çmée? ⁵⁸Maawa idxa's pāatxhī'khte', txāa yakh khuēs tasxte utxaaya' u'jweççxa', dxi'the ewteçxah puutx we'wena yuwe's mpheu'jwe, kxah khuēs tasxte kuutxa'jmeena. Txā'wēme', khuēsa' idxa's policia's dukhena, aça' policia yu', karcelte kxuuphana. ⁵⁹Na'jī'th na': Txajūyā'ja' vxxy nmeh jī'phuni's dukhmeçxa yu', karceluh kasehmeene'ga jīk.

Pkaltxi nvxihtmeeçxa' maawa jxuka vxituni

13 ¹Txāa ensuy nasa maafī yu' Jesusa's na'wētχ pta'sxna utxāa: —Galileajuwe'sxa' Dxusna weçxana neewe'weya' altalte kabwa'j tajkx ikheçpkaçxha', Pilato' txāawe'sxtxi' ikhkaakh, aça' txāawe'sx eea' takx ee yakh jxuka ka'duk jīte', ²Jesusa' na'jīk:

—Galileaju nasatx txā'wē yūute', txāa uusaawe'sxa' Galileasu nasate jxthaakwe pkalsane'ta yu', txāa pa'gatx txā'wē uu ena's jī'phu ¿sūjūk'wé'? ³Na'jī'th na': Txāawe'sxçxāa thaakwe pkalsa yu'çmeeta'. Aça' i'kwe'sxwa pkaltxi nvxihtçxa Dxus tasxte sxawedmeeçxa', txāawe'sx na'wēyçxāa uuwa'jsai'kwe. ⁴Txā'wēy diecioçxo nasa Siloete toçxe kajkwekhē wetete' uutx txāa uusaawe'sxa' Jerusalen çxhabe u'psawe'sxte jxthaakwe yuuwesane'ta yu', txāa pa'gatx txā'wē uu ena's jī'phu ¿sūjūk'wé'? ⁵Na'jī'th na': txāawe'sxçxāa thaakwe yuuwesa yu'çmeeta'. Aça' i'kwe'sxwa pkaltxi nvxihtçxa Dxus tasxte sxawedmeeçxa', txāawe'sx na'wēyçxāa uuwa'jsai'kwe.

Higwera tasxa's spē'th kaahni

⁶Jesusa' naa ejemplo'sku pta'sx:

—Teeçx piçthē'ja' higwera fxtūu tasxku txajx kiwete uhni jī'phu'. Sa' thegya' u'kh, yūnwáana sūhçxa. Nawa uyme'. ⁷Txajū' na'jīk kxtee uuthasx thegsa's: Naa fxtūu tasx yūnuuçwáana sūhçxa adx thegya' pa'jna ūsni tekh anxuyā'ja', nawa teeçx yūn yuhwa uynimeeth. Aça' mespē'th, ¿mjīya'çxāa kxul ūsya'wana? jīte', ⁸uuthasx thegsa pasçxa': Menvxihit naa anxuçxāawa, aça' kiwe's luupe'jçxa sxaakwe'je'nja. ⁹Açá' yūnne'jwáana. Txā'wē yūute yūnmeete, kaaspē'the'jene'ga jīk.

Teeçx u'y ku'le u'juya' ājasame's sapatu ente nuykatxhini

¹⁰Teeçx sapatu jxkaase ente', Jesusa' judiuwe'sx pkhaakhenitek kaapiya'jna ūsu'. ¹¹Açá' kxte' teeçx u'y diecioçxo anxuyā'j āçā'na u'jusak

ũsu', eçx luuku vxit-sa pkxuute ku'le u'juya' ãjasamée. ¹²Aça' Jesus uyçxa', pa'yak:

—I'kwe' naa weēju katxhiyã'ji'kwe jičxa', ¹³Jesusa' ãçã'sa kakwete jxa'dxku. Naapkaçxha' txãa u'ya' dudtey ku'le'ya' ãjãçxa', seena' wala Dxusa's weçxana we'wek. ¹⁴Jesusa' txã'wẽ sapatu jxkaase entewa ãçã'a's nuykatxhite', judiuwe'sx pkhaakhenite npiičthẽ'jsa' ũusaçxaçxa nasatx na'jik:

—Ki'su' seis en ji'pha' mjiiwa'j. Aça' katxhi wẽeçxa' vxite ensu myuhwe. Nawa sapatu jxkaase ente yu', katxhiya'çxãa yu' pa'jnuwe jĩnak jxkaah.

¹⁵Aça' Jesus paççxa':

—Ãateçxãa ew we'weçxa' ũuste yu' ewmeeçxãa yaakxsawe'sx mpaaswe: I'kwe'sx kla meeçxawa i'kwe'sx jiba tudni ũste', makwe jxkaase entewa jxũkhwedeçxa yu' yusya' ¿jxũna u'jmeema'kwe? ¹⁶Naa u'ya' Abraham ji'ja' nawa eçxthẽ'ja' diecioçxo anxuk kaãçã'jna ji'phu'. Aça' makwe jxkaase entewa eçxthẽ'j kuseju kusa'the ¿ewmeemanx? jite', ¹⁷Jesusa's açeyaakxsawe'sxa' wẽsẽ'jçxa', thaametx. Nawa nasa jwee kuhsa yu' weçxa'tx, Jesus txakwe wala ew yũupa'ga.

Mostasa fxiwa's kaaja'da'jni

(Mt 13.31-32; Mr 4.30-32)

¹⁸Txajũ' Jesusa' na'jik:

—Dxus jxkaahwa'j ena' ¿ma'wẽkx sũjũ'kwe? Txã'sa' ¿kĩh yakh kaaja'da'jaki'th? ¹⁹Nawa na'wẽ': teeçx piçthẽ'j txajx kiwete mostasa fxiwa's uhte', ma'wẽ seena' walaakx. Aça' vxiçxakuẽ yuhwa txãa mostasa ku'tasu yaatutxki txã'wẽsa'.

Lewadura's kaaja'daljnisa

(Mt 13.33)

²⁰Ki'kin vxite ejemplo na'wẽsa yakhku kaaja'da'jna pta'sx Dxus jxkaahwa'j ena's:

²¹—Teeçx u'ya' tekx libra skuutxh ũ'wete le'çxkwe lewadura's ka'dte', ma'wẽ jxuka pẽethẽjekx txã'wẽy yuuna jĩk.

Vxix pteezsa

(Mt 7.13-14, 21-23)

²²Jesusa' Jerusalenna u'jweççxa', çxhabsu msuuwa iikaapiya'kh u'jwe'.

²³Aça' teeçxsa' na'wẽk pejx:

—Dxus tasxte ewte neeyũuwa'jsa' ¿kuhmeewáatxna? jite', Jesus paççxa':

²⁴—I'kwe'sxa' wala yuh mpa'pçxuwe vxix pteezte u'kaya'. Na'jĩ'th na': Maawa wala yuh u'ka wẽjẽtxna, nawa thẽytewa pa'pçxumeeçxa yu'

u'kaya' ãjãmeetxna. ²⁵Yat namu' vxitxa's aphyã'the', i'kwe'sxa' ekaju neeyũuçxa' vxitxte tu'kakana na'jĩne'kwe: Vxitxa's meen phaade, kwe'sx u'kaya'watha'w jĩne'kwe. Nawa txãa pasçxa': Adxa' jiimeeth i'kwe'sxa' majũwe'sxne'kwe nawa jĩte', ²⁶i'kwe'sxa' na'jĩne'kwe: Kwe'sxa' idx yakh txutemée mteewa u'jusatha'w. Aça' idxa' kwe'sx çxhabsuwa kaapiya'jg jiwá'kwe. ²⁷Nawa txã' na'wẽ pasuna: Na'jĩyã'th na', i'kwe'sxtxi' jiimeeth majũwe'sxne'kwe nawa. Adx tasxu me'jwe, i'kwe'sxa' jxukay ewmée yũusaçxáa i'kwe jĩna. ²⁸Aça' i'kwe'sx yu' eka kutxi'jni neeyũuçpkaçxha', Abraham, Isaak, Jakob vxite' Dxus yuwe pta'sxsa txãawe'sx yu' Dxus jxkaahna ũsnite ũste uyçxa', seena' wala ũ'nene'kwe ki'th yuhtxwa ksusu'jna. ²⁹Ekaju neeyũusáa txã'wẽ nxuskahníi sek kãanijũwe'sx, sek khẽenijũwe'sx, majũ majũwe'sxwa jxuka pa'jya'wata', Dxus jxkaahna ũsnite u'kaya'. ³⁰Aça' kxtee u'kawa'jsa açxh maafí yu' e'stewe'sx ũsta' txãa yu' yaçte yuutxna, naapkaçxha' yaçtewe'sx yu' e'ste yuutxna jik.

Jesusa' Jerusaleña's thegçxa ũ'neni

(Mt 23.37-39)

³¹Txãa entey maz fxariseowe'sx pa'jçxa', Jesusa's na'jĩtx:

—Me'j ayjxu. Txã'wẽme', Herodesa' idxa's ikhya'wa' jĩna pta'sxte',

³²Jesús pasçxa':

—U'jçxa na'jĩne'kwe txãa thẽ'ja's: Açxh yakh kuskus yakh nee mjĩiwa'j ji'phthu eçx luuku vxit-satx nasa ũusu kutxi'jna açã'satxwa nuykatxhina. Sa' tekh ente' mjĩina jxã'ja'nja jĩ'k jĩne'kwe. ³³Adxa' nee u'juwal'j en ji'phũçxáath tekh en ãhpkaçx, txãa pa'gatey Dxus yuwe pta'sxsa' Jerusaleña ekaju yu' uuwa'j ji'phme'.

³⁴Jerusalentewe'sxa' Dxus yuwe pta'sxsatx ikhna Dxus kaahnisatxwa pãpana pkuu'kwe. Nawa adxa' i'kwe'sxtxi' maazkuẽe uswa pa'yath nwe'weya', atalxwa ma'wẽga luuçxkuẽtx fxuu ku'ta dxiite yu'ãsxi' txã'wẽy yũuya', nawa nwẽesẽ'jmeei'kwe. ³⁵Txãa pa'ga mpa'yajkxwe. I'kwe'sx çxhaba' jxuka pçuuna sa' açxhũyã'ja' adxa's peena yu' uymeene'kwe, Dxus kaahni jxtuhthe ki' kiiwa'j en ãhpkaçx jĩ k.

Çu'vxy weete açã'sa's nuykatxhini

14 ¹Teeçx sapatu jxkaase ente' Jesusa' fxariseo npiĩçthẽ'j yattek ũ'ya' u'j. Aça' vxite fxariseowe'sx yu' peethegu'natx ũsu'. ²Txãa yatte' teeçx piçthẽ'j çu'vxy weete açã'sak ũsu'. ³Aça' Jesusa' na'jĩnak pẽjx ley kaapiya'jsawe'sx vxite' fxariseowe'sxtxi':

—Sapatu jxkaase entewa açã'sa's nuykatxhite çewmanx? jĩte',

⁴txãawe'sxa' pasmée sxuuna'tx neeyũu. Aça' Jesusa' txãa açã'sa's pa'yaçxa nuykatxhiçxak kaah. ⁵Sa' fxariseowe'sxtxi' na'jĩk:

—I'kwe'sx jiba meeçxawa i'kwe'sx kla kafxte khẽeçxa u'pte', çudtey kutxi'jmeema'kwe jxkaase entewa?

⁶Txã'jíte!, weh yuhwa pasya' ãjãmeeta!.

Boda fxiestate pi'kxte walasath sũhna pa'jsa

⁷Fxiestate pi'kxnisa' kaçxní ewsaçxáatx txhithxiçte uyçxa', Jesusa' na'wêk yu'kxpeh:

⁸—Boda fxiestate i'kwe'sxtxi pi'kxte!, kaçxní ewsu yu' kaçxnuwe. Txã'wême! vxite i'kwe'sxte jxthaakwe jxtuhthesa wáa pa'jana, ⁹açá' fxiesta namu' i'kwe'sxtxi kiisuna: Ayte! naajx kaçxwa'jçxá' jĩçxa. Aça' wala thaamena u'jwene'kwe kaçxní açxamée ewkhê kaçxya'. ¹⁰Fxiestate i'kwe'sxtxi pi'kxte!, wejxwa nmeh puzakhê mkaaçxwe, kxah i'kwe'sxtxi pi'kksa uyçxa': Namiku, ay yaçkhê wejx ewkhê myuh kaçxya' jíte!, wala weçxana yaçkhê kaçxya' u'jwene'kwe. ¹¹Maawa walasath sũhna iwejçx iwejçx yaakksa' thaamewa'jçxáa ji'phuna. Nawa ãhmeekwesa na'wêçxáa yajkxna fxi'zesa' jxtuhthe wálasa yuuna.

¹²Sa' fxiesta namu pi'kksa'swa na'jik Jesusa':

—Idxa' sã'jĩya' pi'kiççxa', iidx namikuwe'sxtxi yakthê'jwe'sxtxi pukakhê npe'sxtxi meeçxawa utxasuwe'sx vxyu ji'phsatx pi'kxnu. Txã'wême! txáawe'sxwa kaasxwedu'ju'tha'w jĩna idxa's txã'wêy sã'jĩya' pi'kitxna. ¹³Aça' sã'jĩya' fxiesta vxituççxa', wejxwa puuple ãhmeekwesa legsa uysamée txã'wesaçxáatx mpi'kx sã'jĩya'. ¹⁴Aça' txáawe'sxa' ka'tu' txã'wêy kaasxwedu'jya' ãjãmeetxna idxa's. Nawa weçxana mneeyũu, txãa pa'gategy Dxusa' idxa's deweena Dxus luuçx ki' itxĩ yuu ente' jik.

Fxiestate pi'kxte wa'lsa

¹⁵Txã'wê pta'sxni's wêšê'jçxa', mesate u'psa teeçxsa' na'wêk we'we Jesusa's:

—Dxus jxkaahna ũsnite u'kaçxa ũ'sa yakha' wala yuh weçxa yuhna jíte!, ¹⁶Jesusa' na'wêk kwentu'j:

—Teeçx piçthê'j fxiesta wala vxituççxa', nasa seena' wala kuh pi'kxku sã'jĩya'. ¹⁷Sa' ũ'wal'j ora ãjãçte!, teeçx selpisa's pa'yaya' kaakh: Ũ'ya' myuhwe, jxuka pheu'jniyã'j ũsa' jĩna pa'yakahn. ¹⁸Nawa jxukaysa wa'lçxa na'wêçxáatx pas: Nyafxtewe'sx pasçxa': Kiweth wey, sa' thegya' u'jwe ji'phthu. Aça' tee peltunaĩ jik. ¹⁹Aça' vxite we'weçxa': Diez novxiloth wey, sa' thegya' u'jweçthu. Naa pa'ga tee peltunaĩ jik. ²⁰Aça' tekhtewe'sxa' na'wêk pas: Açxçxáatha'w ptamúu, sa' yujxa' tuduume'nja jik. ²¹Txajũ' selpisá' sxawedna u'jçxa txajx patrona's jxuka pta'sxku. Aça' patrona' wala ũusaçxaçxa txã's selpisa's na'jĩnak jxkaah: Dudtey plaasasu klxiikhunsu ki' u'jçxa puuple ãhmeekwesa legsa yafx puuple uysamée txã'wêsatx pi'kççxa ayte pe'jna yuweene'ga jik. ²²Aça' selpisá' u'jçxa ki' sxawedna pa'jçxa': Iidx jxkaahni's kxtey yuuth, açá' pa'jtx. Nawa kaçxwa'j yu' nee ũsiyçxáata' jíte!, ²³patrona' selpisá's na'jik: Açxha' çxhab ekaju jxu'juwe'sx vxite' dxi'j u'jsatxwa pi'kççxa ayte ka'ga'jane'kwe makwe wa'luçtewa ãadxijimée,

adx yatte utapkaçx. ²⁴Nawa nyafxte pi'kxnisa wa'ltxi txãawe'sx yuutxi' kaapa'jal'me'nja adx yatte puuçya' jîk. Txã'jînak kwentu'j Jesusa'.

Jesus yakh fxi'zewa'j thëya'

²⁵Txajü' Jesus e'ste nasa wala u'jweç yu'tx, aç'a' txãawe'sxtxi yu'thegçxa na'jîk:

²⁶—Maawa adx yakh yuusá' txajx ney, njî'j, nyu, luuçx, nyakhwe'sx, npe'sxwe'sxtxi nvxihtçxa txã'wëy iivejçx yajkxna fxi'zeni's uu entepkaçx nvxihtmeeçxa yu', adx yakh fxi'zeya' äjãmeena. ²⁷Sa' makwe thëyte uupçxãhtewa txãatxi' yajkxmée, adx yakh yuhmeeçxa yu' adx yakh fxi'zeya' äjãmeena. ²⁸I'kwe'sxa' yat wálasa txajxa'waçxa', jxuka jxã'jwa'j kîjkîhwa äh üstxmanx sühna kaçxçxa çyajkxmeema'kwe? ²⁹Txã'wë yüumeete', kiwete pxähn pa'j mjîiçxaçxáa nvxihtte', maawa uysa' npeevxysikatzna: ³⁰Jxã'jya' äjãme' jîna.

³¹Txã'wëy maa npiiçthë'jwa vxite npiiçthë'j yakh puiiya'waçxa', kaçxçxa üus yajkxmeema'k: Naa diez mil soldau yakhçxáa weinte mil soldautx çknayma'th? sühna. ³²Sa' ewupçxähmeete', vxite npiiçthë'j utxameyna, yuwe kajana kuçx puiimée ewteçxah neeyüuya'. ³³Aç'a' txã'wëy i'kwe'sxwa dxiihkëy jxuka üus yajkxçxa i'kwe'sx ji'phuni's nvxihtmeeçxa yu', adx yakh fxi'zeya' äjãmeene'kwe.

Nega seelpimeesa

(Mt 5.13; Mr 9.50)

³⁴Nega' selpi'k, nawa jxuka sxüukãhçxa' çma'wë selpiikx? ³⁵Kiwete sxaakwe'jwa'jçxáa yuhwa selpi'çme', pubwa'jçxáak yu'. Jiyuwa'jsa üsçxa', jiyune'kwe jîk.

Piisxáa vxitusa yakh kaaja'da'jni

(Mt 18.10-14)

15 ¹Gobierno jîi vxyu pkhakhsawe'sx vxite' pkalsawe'sx jxukaysa Jesus pta'sxni's wësé'jya' utxaatx. ²Txãa pa'gatx Dxus ley kaapiya'jsawe'sx vxite' fxariseowe'sxa' Jesusa's na'jîna nuywe'we:

—Naa piçthë'ja' wala fxiy yu'k, pkalsawe'sxtxi jxpa'gaçxa txãawe'sx yakhku ü'we' jîte', ³Jesusa' naa ejemplo'sku pta'sx:

⁴—I'kwe'sxa' cien piisxáa ji'phçxa', teeçxsa' vxyaameete', vxite nowenta y nwewesatx kxsüu nvxihtçxa çpiisxáa vxitusa's pakweya' u'jmeema'kwe uypkaçx? ⁵Sa' piisxa's uyçxa', yakhçxa wala weçxana ⁶yatte pa'jçxa, namikuwe'sx vxite' kxsüu utxasuwe'sxtxi pa'yaçxa: Adx piisxáa vxitusa's uyyã'th, aç'a' adx yakh ja'da weçxa mpu'çxwe jîna çpta'sxmeema'kwe? ⁷Na'jî'th na': Cielutewa txã'wëy nowenta y nwewe nasa ewsate jxthaakwe wala weçxa yuja' teeçx nasaçxáawa pkaltxi nvxihtçxa Dxus tasxte sxawedte'.

Vxyu weteni's kaaja'da'jni

⁸Txã'wëy teeçx u'y diez vxyu musx ji'phçxa', teeçxsa wetete', çlampara's pki'taçxa yatte jxpa'yakx padna pakwemeema'k uypkaçx?
⁹Sa' txã vxyu's uyçxa' txajx namikuwe'sx vxite' kxsûu utxasuwe'sxtxi pa'yaçxa: Û'kwe vxyu wetesa's uythu, aç'a' ù'kwe yakh ja'da weçxa mpu'çxwe jîna çpta'sxmeema'k? ¹⁰Na'ji'th na': Dxus angeleswe'sxtxiwa txã'wëy weçxa yuja' teeçx nasaçxáawa pkaltxi nvxihtçxa Dxus tasxte sxawedte'.

Luuçx ney yatu kasehni

¹¹Txajü' Jesusa' vxite ejemplo na'wësak pta'sx:

—Teeçx piçthê'j e'z nçxi'kku ji'phu'. ¹²Aça' nuuçxsa' neya's na'jik: Tata, iidx ji'phuni adx jîi yuuwa'ja's txuhdeçxa mah jîte', neya' txuhdeçxa dukhku. ¹³Aça' jxpa'gani maz enteçxáa txã nçxi'k nuuçxsa' ney dukhni's jxuka pkhakhçxa jxu'j kiwen u'kh. Sa' kxteea' ewméé yûuna jxuka vxyu's psuwna pebak. ¹⁴Txã'wë vxyu's psuwna pebaaçpkaçxha', wëjê en pa'kh txãa kiwete. Aç'a' txãa piçtakxa' wëeya' yajkxku. ¹⁵Sa' kxsû mjîi pakweya' u'kh teeçx piçthê'j tasxte. Aç'a' txãa piçthê'j yu' kuçxi sã'jiya'k kaah txajx tulte. ¹⁶Txajü' txãa piçtakxa' wëeçxa kuçxi ù'pusnawa ù' wëek. Nawa txã'wësaçxáa yuhnawa puuçmeeta' txãa piçtakxa's. ¹⁷Txajü' úus yajkxya' kaçxçxa naa süjk: Adx yu' ayte wëeçxa uuya'wath, naapkaçxha' adx tata yatte mjîisa piuna' kîh yuhwa wëeméé üstxna maazkuëeçxawa. ¹⁸Aça' adx tata yatna ki' sxawedna u'lçxa na'ji'nja: Tata, Dxus dxi'pte wala ähméé yûuth, sa' idxa'swa txã'wëythu wala ähméé yûu. ¹⁹Sa' nçxi'kçxawa açxha' iidx peeygáawa'jmeeyã'th. Nawa iidx piun na'wëçxáawa meen jxpa'ga jî'nja sühnak yajkx. ²⁰Txajü' kiiteçxa ney yatna sxawedna u'kh. Aç'a' pa'jaçte', neya' jiyuk jxu'the yujíyna. Sa' nçxi'ka's peeygãhçxa pu'thegya' wuwuuna u'lçxa, psxa'dçxak weçxa. ²¹Txajü' nçxi'ka' na'jik neya's: Tata, Dxus dxi'pte wala ähméé yûuth. Sa' idxa'swa txã'wëythu wala ähméé yûu. Nçxi'kçxawa, açxha' iidx peeygáawa'jmeeyã'th jîte', ²²neya' selpisaatx pa'yaçxa na'jînak jxkaah: Ropa ewsa kutxi'lçxa dud mkaathe'jwe. Sa' sultxhikhawa kusete ki'pçxa spaatuwa mpaathwe. ²³Teeçx tulu piçtakx niisxsa's nikxya' u'lçxa miikhwe, fxiesta vxitçxa ù'ya'. ²⁴Adx nçxi'ka' uuníi na'wë yã'lçxawa ki'kin ítxi yuuk, sa' vxituna u'ljuçxawa ki' vxyaak jçxa', wala weçxana fxiesta vxittxi.

²⁵Naapkaçxha' nçxi'k nthê'jsa yu' mjîi ehstu u'ljuçxa', sxawedna yatte pa'jaççxa', wësê'kh ku'jna tukani músika zhiçxkwesa's. ²⁶Sa' teeçx selpisá's pa'yaçxa pëjxku: Yatte' çkîh yûuna üstxna? jîte', ²⁷selpisá' pta'sxku: Iidx nyakh jxu'j kiwen u'jsa ki' sxawedna pa'kh. Txãa pa'ga iidx tata' tulu niisxsa's kiikhelçxa fxiesta'jaça' jîte', ²⁸nyakh nthê'jsa' wala

ũusaçxaçxa yatte u'kaya' wa'lku. Aça' neythê'ja' kasehçxa wala pxthaa we'wek u'kakahn. ²⁹Txajũ' txāa nçxi'k yu' na'ljik neya's: Adxa' maazkuēe anxu iidx tasxte bagaçx yuhwa wa'lmée selpiina ũstewa jiig. Nawa idxa' teeçx kaplakuēçxāa yuhwa iiūsmeeg, adx namikuwe'sx yakh fxiesta'khan. ³⁰Nawa iidx nçxi'k txakwe wala u'y ewmeesa yakh vxuyu's psuwna pebasāa yu'sa' tulu niisxsa's ikhçxag fxiesta'ja' jite', ³¹neythê'j pasçxa': Adx nçxi'k, isa yuh we'we'g. Idxa' bagaçxtewa adx yakh txutemée nesgu yu', naa pa'ga adx ji'phuni' kīhwa jxuka iidx jiiçxaçxāata'. ³²Txā'wē iidx nyakh uuní na'wēyā'ljçxawa ki'kin itxī yuuk sa' vxituna u'juçxawa ki' vxyaak txāa pa'ga weçxana pejka fxiesta'jwa'lj ji'ptha'w jik neya'.

Yultumu patron jī's ewmée jxpe'jsa

16 ¹Txajũ' Jesusa' na'ljinak kwentu'j txāa yakh u'jusawe'sxtxi: —Teeçx patron wala ji'phsa' teeçx yultumu ji'phu'k. Aça' txāa yultumu ewmée yūuni's pta'sxtxi: Iidx yultumu' iidx ji'phuni's wala psuwna ũsa' jite', ²txāa patrona' txajx yultumu's pa'yaçxa na'ljik: Adx ji'phunitxi' wala psuwna ũsa' ji'tx sa' idxa' çkīh yūuna ũsga? Txā'wē yā'ljçxa', idxna neewe'weni adx ji'phuni's jxuka ki' mdukh adxna. Idxa' peena yu' adx yultumu selpiiya' ājāmeene'ga jite', ³yultumu' ũus yajkxya' kaçxku: Āçxha' çkīh yūuki'th adx mjīia's patron kusa'the'? Adxa' uuthasxte mjīiya' yu' jiimeeth sa' lmusxnu thāasna u'jute yu' thaameyuhna. ⁴Aça' patron tasxu kasehnijũ maawa txāawe'sx yat-su pe'ljna sāl'jikahn na'wē yūuya'k yajkx: ⁵Patrona's yuulsatx teeçx teeçxçxah pa'yaçxa, nyafxte utxaasa's pējxku: Idxa' çmaz yuulga adx patrona's? jite', ⁶Cien taçxo aceite yuulthu jik. Aça' yultumu' na'ljik: Iidx yuuluni eça' ayga ũsa' txā'sa' dud yuh khūkhçxa, yuula's cinkwentaçxāa mki'p jik. ⁷Txajũ' vxite'sku pējx: Idxa' çmakwe yuulga? jite', cien açxoba skuutxh yuulthu jik. Aça' yultumu' na'ljik: Iidx yuuluní eça' ayga ũsa' txā'sa' dud yuh khūkhçxa, yuula's oçxentaçxāa mki'p jik. ⁸Txajũ' txāa yultumu ewmeesa' txā'wē dudtey yūuni's patrona' jiyuçxa': Ma'wē fxi'zewa'ja'swa dud yuh ũus yaaki'k jik. Aça' naa kiwete nasa pkalsa' Dxus luuçxte jxthaakwetx dud ũus yaaki' txāawe'sx ma'wē puutx we'wewa'ja'swa. ⁹Aça' adxa' i'kwe'sxtxi' yu'kxpeje'th txā'wēy yūukahn, naa kiwete ji'phuni's psuwmée jxpa'yakx mkseelpi'jwe namiku vxitna. Kxah naa kiwete ji'phunisa pçuutewa, vxite kiwe pçuwa'ljmeete i'kwe'sxtxi jxpa'gawa'jsa ji'phune'kwe.

¹⁰Maawa le'çxkuēçxāa ji'phçxawa jxpa'yakx jxpe'jsa', walasa'swa txā'wēy jxpa'yakx jxpe'jena. Aça' maawa le'çxkuēçxāataewa jxpa'yakxmée psuwna jxpe'jsa', walasa'swa txā'wēyçxāa jxpa'yakxmée psuwuuna.

¹¹Txā'wē naa kiwete ji'phuni'sçxāa yuhwa jxpa'yakxmée psuwna fxi'zeçte', i'kwe'sxtxi' çkim neewe'weçxa nvxiitukx pçuwa'ljmée ji'phuwa'ja's? ¹²Peekx jīimée vxite jīi yuhtxwa jxpa'yakxmée psuwna fxi'zeçte', çkim ũsukx i'kwe'sx jīi yuuwa'ja's?

¹³Maa selpisáa yuhwa e'z patrontxi selpiia' ãjãmeena. Txã'wê vxiteçxá's wedxna fxi'zeçxa', vxite patron yu'sa' açena. Sa' teeçxsa jxkaahniçxá's kxtey yuuçxa', vxite patron jxkaahni yu'sa' kxtey yuuya' ãjãmeena. Txã'wêy Dxusna selpiina naa kiwete ji'phuni'swa pa'pçxuna e'z ahtey yajkxna fxi'zeyá' ãjãmeena jíte', ¹⁴fxariseowe'sxa' naa kiwete ji'phuniçxá's wejx pa'pçxuna fxi'zesa wêsê'ljçxa', Jesusa's weeçx we'wetx. ¹⁵Aça' Jesusa' na'jik fxariseowe'sxtxi':

—I'kwe'sxa' naa kiwete nasaa dxi'pte yu' wala ewsa na'wê fxi'ze'i'kwe. Nawa Dxusa' i'kwe'sx úus yaakxnitxi' jxuka jiia'. Naa kiwete nasaçxáa i'kwe'sxtxi' ewсата' jíte', Dxus yu' txã'jimeena.

Dxus jxkaahni ley skhêwwa'jsamée

¹⁶Moises ley vxite' Dxus yuwe pta'sxsawe'sx kaapiya'jni' Juan Bautista entepkaçxtxi' úsu'. Kxajuk yuwe u'sesa' Dxus jxkaahwa'j ena's pta'sxni yuu, açá' maawa Dxus jxkaahnitewe'sx yuuya' wala pa'pçxu'tx. ¹⁷Makwe cielu pçuuna, kiwewa pçuuna, nawa Dxus jxkaahni ley yu' weh yuhwa yu'pthehwa'jsame' bagaçxte yuhwa jík.

Ptamsa txuteewa'jme's Jesus kaapiya'jni

(Mt 19.1-12; Mr 10.1-12)

¹⁸Maa piçthê'jwa peekx nyu's wãatãhçxa vxite yakh ptamuuçxa', txã' pkal yuuna. Aça' maa piçthê'jwa txãa u'y wãatãanisa yakh ptamuuçxa', txãawa pkal íçxáa yuuna.

Teeçx ji'phsa vxite' puuple Lasaro

¹⁹Txajü' Jesusa' vxite kwentu na'wêsak pta'sx:

—Teeçx piçthê'j wala ji'phsa u'pu'k. Sa' ropa ewsa yuuçxáa athçxa een isak wala weçxana fxiesta vxitu'. ²⁰Txãa ji'phsa yat vxitxte teeçx puuple wã'jyçxáa uta ji'phsa Lasaro yaasesak kiwete kaçxçxa u'pu'. ²¹Txãa puuple yu' wêeçxa ji'phsa mesa tasxsu kîh ü' pe'laçxáawa úsxisatx ü'wên üythasna u'pte', alku' kühçxa txãa wã'jytxi teçxi'tx. ²²Nawa teeçx ente' txãa puuple' uuk. Aça' angeleswe'sxa' jxüna u'jtx wêt úsnite Abrahan yakh úskahn. Txãa e'su' ji'phsawa uuk, açá' txã'sa' pedaatx. ²³Aça' ji'phsa' uusaawe'sx úsni ksxavxyte pxthaa yaaçxana úsçxa', pesayçxa jxu'the uyku Lasaro yu' Abrahan yakh wêt weçxana u'pte. ²⁴Txajü' na'jínak sus we'we: Tata Abrahan, adxa's meen peeygãh. Seena' yuh wala pa'ga yuuna ústhu naa ipx wala açxate. Aça' Lasaro's mkaah txajx kuse vxíççxáanawa yu'te tuupha'ljçxa adx thunete tuupha'jya' yuukahn jíte', ²⁵Abrahan pasçxa: Nçxi'k, miiyajkx. Idxa' nee ítxi' u'juy yu', wala yuh wêt weçxana fxi'zesa yu'g. Naapkaçxha' Lasaro yu' wala pxthaa yuuna nxuste fxi'zek. Nawa açxha' ayte wêt weçxana úsa', naapkaçxha' idxa' wala yuh pxthaa yuuna úsgu. ²⁶Pxthaa'g we'we' nawa penxa thkafx

wala txuhdena ūsa', aça' ayjxuwe'sx kxtee pesah wēeçxawa ājāmeetxna, sa' txajuwe'sxwa ayte pesajxa' ājāmeetxna jīte', ²⁷çxhavxysáa pasçxa': Txāwēyā'the', Tata Abraham, idxa'sthu pxthaa we'we', aça' Lasaro's meen kaah adx tata yatna, ²⁸kxte' taç nyakh ji'pthu txāawe'sxtxi pta'sxya' adx ayte nakwe wala pxthaa yuuna ūsthu kxtee yuukahmén jīte', ²⁹Abraham pasçxa': Txāawe'sxa' Moises vxite' Dxus yuwe pta'sxsawe'sx fxi'jnix ji'phta' na' txāatx wēsē'jetxna jīte', ³⁰çxhavxysáa pasçxa': Tata Abraham, txāwē yuhta'. Nawa maaçxáawa uusaawe'sx ksxavxyu ítī yuuçxa txāawe'sxtxi' pta'sxya' u'jwaça', pkaltxi nvxihtçxa Dxus tasxte ki' sxaweduutxna jīk. ³¹Aça' Abraham pasçxa': Moises vxite' Dxus yuwe pta'ssxa txāawe'sxtxi' nwēsē'jmeeyā'jçxa', makwe uusaawe'sx ksxavxyu ki' ítī yuuçxa pta'sxtewa, kxul yuhna jīk.

Pkalte kweete'jya'mée jxpa'yakxwa'ja'

(Mt 18.6-7, 21-22; Mr 9.42)

17 ¹Jesusa' na'wēk kaapiya'j txāa yakh u'jusawe'sxtxi: —Nasatx pkalte kweete'jsa yu' багаçxtewa nes yuutxna. Nawa pkalte kweete'jsa' wala yuh nxus kastigo knayuuna. ²Aça' txāa pkalte kweete'jsa's skuutxh ū'khni kweta's txhikhte tudçxa ìkh wala dxiikhē wāatāhwaç yuuçxáa wejx ewna, naa le'çxkwesatx pkalte kweete'khamen. ³Txā'wē yūuya'mée jxpa'yakx me'juwe.

Meeçxawa idxa's wáa āhmée yūuna iidx yakhthē'j aça' txā'sa' myu'kxpeh. Txajū' āhmée yūusa': Meen peltunāi jīte', idxa' peltunāywa'j ji'phgu. ⁴Makwe teenteçxáa sietepkaçx āhmée yūuçxawa, kxaz usí idxa's perdon pējxya' pa'the', idxa' peltunāywa'j ji'phgu jīk.

Dxusa's jweeíçxáa çxhāçxha yaakxwa'ja's pēyni

⁵Txajū' Jesus yakh u'jusawe'sxa' na'wētçx pējx:

—Dxusçxáana wejx çxhāçxha yajkxna fxi'zekahn kwe'sxtxi' meen pu'çx jīte', ⁶Jesus pasçxa':

—Dxusa' pu'çxhina sūhwa'ja's mostasa nxinx na'wēkuēçxáawa ji'phwaça', naa fxtūu tasxa's khubeteçxáa ìkh walate me'j khēeya' jīte', txāa fxtūu tasxa' kxtey yuuna jīk.

Selpisa' na'wē yuupa'jsa'

⁷I'kwe'sxa' teeçx selpisáa ji'phte', txā' mjīi ehshu u'juçxa kusuçte pa'the': Myuh ayte kaçxçxa ū'ya' ¿jīma'kwe? ⁸Txā'jīmée wejxwa na'wē kajane'kwe: Adx ū'wal'j iīçel'çxa mesate pheul'çxa mtxah. Sa' adx ū'na jxā'the, idxa' ū'wene'ga jīne'kwe. ⁹Patrona' ¿selpisa's weçxama'k txā'wē kxtey yuupa'ga? Weçxameena. ¹⁰Txā'wēy i'kwe'sxa' Dxusa's selpiwa'jsai'kwe na' makwe txajx jxkaahni's jxuka kxtey yuuçxawa, weçxaa jxthāaswa'jsameei'kwe jīk.

Diez piçthê'j wâ'jy weete âça'satx nuykatxhini

¹¹Txajû' Jesusa' Jerusalenna u'jweççxa', Samaria vxite' Galilea kiwesuk skhêwna u'j. ¹²Aça' teeçx çxhabe' diez piçthê'j wâ'jy wee kazx ji'pshatx Jesusa's puutx uyua' kaseh. Nawa jxu'theçxáa yujuçxa, ¹³na'jînatx sus we'we:

—Kwe'sxtxi meen peeygâh jîte', ¹⁴Jesusa' txâawe'sxtxi' na'wêk jxkaah:

—I'kwe'sx kakwetx sacerdotewe'sxtxi txwesya' me'jwe jîna jxkaathe', txâawe'sxa' dxi'the u'jweçtxi yu', naapkaçxha' txâa wâ'jy we' naa dudte jxuka wêetku. ¹⁵Aça' teeçxsa' katxhiyâ'jçxa', dxi'juu sxawedku Dxusa's sus we'wena weçxana. ¹⁶Sa' Jesus tasxte kühçxa' peejxükwek: Weçx ew yûug jîna. Txâa piçthê'j yu' Samariajûwe'sxku yu'. ¹⁷Aça' Jesusa' na'jîk:

—¿Diezsaíi jxuka katxhimeewá'nta? Vxite nwewesa yu' ¿mteeta yuu? ¹⁸¿Naa piçthê'j vxite ajûwe'sxçxáa wá' Dxusna weçxaya' sxawed? jîçxa', ¹⁹txâa piçthê'ja's na'jîk:

—Kiiteçxa me'j. Idxa' katxhinig neeyûu, txâ'wê Dxusa' nuykatxhina sühçxane'ga kxtey nwêesê'j naa pa'ga jîk.

Dxus Nçxi'k Nasa Yuusáa pa'jwa'j en

(Mt 24.23-28, 36-41)

²⁰Txajû' fxariseowe'sxa' Jesusa's na'jînatx pèjx:

—¿Bagaçx Dxusa' isa naa kiwete jxkaajakx? jîte', Jesus pasçxa':

—Dxus naa kiwete jxkaahni's yafxju yu' âate ya'uymeena.

²¹Dxusa' jxkaajxa' pa'jçxa: Açxha' ayte úsa' meeçxawa kxtee úsa' jîna ya'we'wemeena. Txâa pa'gately i'kwe'sxa' Dxus jxkaahni enteyâ'j úsi'kwe.

²²Txajû' txâa yakh u'jusawe'sxtxi na'jînak yu'kxpeh:

—I'kwe'sxa' Dxus Nçxi'k Nasa Yuusáa naa kiwete kîini's dud uy wêjêne'kwe, nawa dud yu' uymeene'kwe. ²³I'kwe'sxtxi' nasa yu' na'jîwáatxna: Ayte úsa' meeçxa' kxtee úsa' jîtewa, u'jmeene'kwe sa' nwêesê'jwameene'kwe. ²⁴Kpi'sx kwehnewaççxáa ma'wê naa dudte majûwa jxuka vxyaakx, txâ'wêyçxáa yuuna Dxus Nçxi'k Nasa Yuusáa pa'jwa'j en âhte'. ²⁵Nawa txâa en âhmeyna, Dxus Nçxi'k Nasa Yuusa' wala pa'ga yuuna naa ensu nasa yaaçeni. ²⁶Noé ensuwa ma'wêga yuu, txâ'wêyçxáa yuuna Dxus Nçxi'k Nasa Yuusáa pa'jwa'j ensuwa. ²⁷Noé ensu nasa' kîh yuhwa peejxmée ũ'na ptamuuna vxite' txâawe'sx niisatx kaaimi'aljnatx úsu'. Nawa Noé barkote u'kaçpkaçxha', nus wala pa'jçxa' îkh utate' jxuka uutx. ²⁸Lot ensuwa txâ'wêytxi yûuna úsu', kîh yuhwa peejxmée ũ'na, uuthasx vxitna, txweyina, yatwa txâ'wêytxi wala txahna úsu'. ²⁹Nawa Lot Sodomajû kasejeçpkaçxha', cielujû asufxre behna kîhçxa' jxukaysatx kabku. ³⁰Txâ'wêyçxáa yuuna Dxus Nçxi'k Nasa Yuusáa vxya' entewa.

³¹Txâa ente' éeyatte wáa u'psa yuuna, nawa sa'jçxa' kîhçxáanawa dxiiju kutxi'jwa'j ençxáa yuhwa ji'phumeena. Sa' maafí yu' çxhab ekaju wáa u'ju

yuuna, nawa yatna sxawedwa'lj ençxáa yuhwa uymeena. ³²Lot nyuuwa ma'wēga yuu txā'sna miijajkxwe. ³³Txāa ente' maa nasawa naa kiwete ãtxĩ fxi'zeniçxá's yaakxsa', Dxus yakh ãtxĩ fxi'zewa'lj yu'sa' ivxiituna. Nawa maawa naa kiwete ãtxĩ fxi'zeni's yaakxsame', Dxus yakh ãtxĩ fxi'zewa'lja's ji'phuna.

³⁴Na'jĩ'th na': Txāa kuste' teeçx kamaga e'z wáa dehna ũs yuutxna. Nawa teeçxsa's pehna u'ljni yuuna, naapkaçxha' vxite yu' neeyũuna. ³⁵Txā'wēy e'z u'y wáa kxteeçxah ũ'khna ũs yuutxna. Nawa teeçxsa's jxũna u'ljni yuuna, naapkaçxha' vxite yu' neeyũuna. ³⁶Meeçxa' e'z piçthē'lj wáa kxteeçxah mjũina ũs yuutxna. Nawa teeçxsa's jxũna u'ljni yuuna, naapkaçxha' vxite yu' neeyũuna jite', ³⁷Jesus yakh u'jusawe'sxa' na'wētx pējx:

—¿Mtee txā'wē yuukx? jĩtx. Aça' Jesus pasçxa':

—Kakwe kha'tx mkaa uuna ũstewa, mēewējxa' āate pkhaakhetxna jĩk.

Khuēs ewmeesa vxiuda's nwe'weni

18 ¹Dxusa's peçxkanamée bagaçxtewa txāa yakh puutx we'wena nes yuukahn naa ejemplo'sku pta'sx Jesusa':

²—Teeçx çxhabte teeçx khuēs u'pu'k, Dxusa's yaakxsamée sa' nasatxwa peeygāja'çme'. ³Txāa çxhabte' teeçx u'y vxiudak u'pu', sa' khuēs tasxte pāatxhĩ'khyā' u'ljna nesku yu': Ũ'kwe's meen nwe'we, açesa wala pkxu'tx jĩna. ⁴Maazkuēe uswa pa'thewa, txāa khuēsa' pu'çxme', nawa na'wēk yajkx: Dxusnawa yaakiçmeeth sa' nasa maa yuhtxwa peeygāsameeth. ⁵Nawa naa vxiuda' wala kuçx tahtatey pa'ja'k aça' pu'çxhi'nja peena yu' pa'khamén jĩk.

⁶—Khuēs ewmeesa yuhwa txā'wēk pu'çxya' yajkx jĩk Jesusa'. ⁷Dxusa' çtxā'wēyçxáa pu'çxmeema'k txajx txhitxhniatxi'? Txā'wē kus ma'k yuu en ma'k yuu nawa pxthaa we'wena nes yuute' pu'çxya' jxthēyuuemeena. ⁸Na'jĩ'th na': Dxus Nçxi'k Nasa Yuusáa naa kiwete sxawedna kĩi entewa çtxā'wē Dxus yakh pu'vxitumée neewe'wesa ũsma'tx yuu? jĩk.

E'zsa dxuus yatte Dxus yakh puutx we'weya' u'kani

⁹Jesusa' na'wēk vxite ejemplo pta'sx txā'wē maafi yu' wala ewsatha'w sũhna vxite yuutxi' ahçena fxi'zesawe'sxtxi:

¹⁰—E'z piçthē'ljtx dxuus yatte Dxus yakh weçxana puutx we'weya' u'ka. Teeçxsa' fxa'riseo', aça' vxite' gobierno jĩi vxyu pkhaksak yu'. ¹¹Fxa'riseo yu' yujuçxa na'ljinak Dxus yakh puutx we'we': Dxus, idxa's wala weçxa'th, adxa' vxite nasa na'wēmeeth. Txāawe'sxa' pesweeta', ewmée kazxsata'. Sa' nyu ji'phçxawa vxite yakh pka'k yuusata'. Aça' adxa' txā'wēsameeth. Naa piçthē'lj aye ũsa' gobierno jĩi vxyu pkhaksaxa' txā'wēsaxçxáa yuhwa meeth. ¹²Sa' ki'sute e'z us yũuna'th. Adx knayni kĩjkihnawa diesmo dukhe'th idxa's jĩk. ¹³Naapkaçxha' gobierno jĩi vxyu pkhaksaxa' yu'

jxu'theçxáa yujuçxa cielute yuhwa pagaymée naasáa txajx peçxuteçxáak iikakana Dxusa's na'jī': Dxus, adxa's meen peeygāh. Wala yuuwesath jīnaçxáak we'we'. ¹⁴Na'jī'th na': Gobierno jīi vxyu pkhakhsa we'weni's Dxusa' pasne'. Nawa fxariseo yu' pasnimeene! yatna sxawedna u'j. Maawa iwejçx iwejçx yajkçxaxa we'wesa', jxthaakwe āhmeekwesa yuuna. Nawa maawa āhmeekwesa na'wē yajkxna we'wesa' iwejçx yaakxsate jxthaakwe ewsa yuuna jīk.

Luuçxkuētx Jesus bedekīyni
(Mt 19.13-15; Mr 10.13-16)

¹⁵Txajū' nasa' Jesus tasxte txāawe'sx luuçxkuētx nuypa'jtx Dxus kusete neewe'wekahn. Aça' Jesus yakh u'jusawe'sxa' ūusçxa we'wetx luuçxkuētx nuypa'jsatx. ¹⁶Nawa Jesusa' txāa yakh u'jusawe'sxtxi pa'yaçxa na'jīk:
—Luuçxkuē adx tasxte yuhte', kuçx yupnuwe, txāa pa'gatey Dxus jxkaahna ūsnisa' naa luuçxkuēwe'sx na'wēsa jīi fiçxá'. ¹⁷Isath we'we', maawa luuçxkuē na'wē Dxus jxkaahwa'j ena's wa'lmée jxpa'gameeçxa yu', багаçxte yuhwa Dxus tasxte u'kameetxna jīk.

Piçtakx wala ji'phsa Jesus yakh puutx we'weni
(Mt 19.16-30; Mr 10.17-31)

¹⁸Txajū' teeçx piçtakx npiçthē'jsa na'wēk paapējx Jesusa's:
—Idxa' wala ewgu kīhsuwa jxuka, txāa pa'ga na'wēth paapēyi': ¿Ma'wē yūuçxa pçumée itxī fxi'zewa'ja's ji'phuki'th? jīte', ¹⁹Jesusa' na'jīk:
—¿Kīh yuupa'gaga adxa's ewsa jī'? Naa kiwete' teeçxçxáa yuhwa ewsa yu' meeta'? naasáa Dxus yuuçxáa ewsa ūsa'. ²⁰Pçumée itxī fxi'zewa'ja's ji'phu wēeçxa', Dxus jxkaahnitxi' jii txāatxi' kxtey myuu. Txā' naata': Ptamsayā'ja' vxite yakh pkal yuuwa'jme'. Nasa ikhwa'jme'. Pesweewa'jme'. Vxitetx īsxiina nuywe'wewa'jme'. Neywe'sxtxi peeygāhna ewçxáa yūuna fxi'zewa'ja' jīte', ²¹txāa piçtakx pasçxa':
—Txāatxi' le'çxkuējūjx jxuka kxtey yuunath waláa jīk.
²²Aça' Jesus wēsē'lçxa' na'wēk jxkaah:
—Txā'wētewa, nee peeji'. Iidx ji'phuni's jxuka txweyçxa, puuplesatx peesune'ga. Txā'wē yūuçxa', cielute ji'phsa yuune'ga. Txā'wē yūuçxa adx yakh myuh jīte', ²³txāa piçtakxa' wala nxusna neeyūuk, wala ji'phsa yu'k txāapa'ga. ²⁴Txā'wē nxuste', Jesusa' na'jīnak we'we:
—Maawa wala ji'phsa yakha', wala yuh thēya' Dxus jxkaahna ūsnite u'kawa'ja'. ²⁵Aça' txā'wē thēysa's yajkxte yu', kamelxo yuhwa thēymée wáa yūz kafxga u'kaya' ājatxna.
²⁶Txā'jīte', na'wētēx we'we:
—Txā'wē thēyte', ¿kim ewte neeyūuya' ājākx? jī'tx. ²⁷Aça' Jesusa' na'jīk:
—I'kwe'sxçxáa yu' ājāmeene'kwe. Nawa Dxus yakh yu', kīh yuhwa thēysa meea' jīte', ²⁸Pedro' na'wēk we'we:

—Kwe'sxa' idx yakh yujxa' kwe'sx ji'phuni's jxuka nvxihttha'w jîk.
 29 Aça' Jesus pasçxa' na'jîk:

—Isath we'we': Dxus jxkaahni's nwëesê'jya' maawa yat, neywe'sx, nyakhwe'sx, nyu, nçxi'kwe'sx txâ'wësatx nvxihtçxa', 30 naa kiwete nee ũsî txâa nvxiitnisate jxthaakwe jxpa'gatxna, sa' vxite kiwete' pçuméee îtxî fxi'zewa'ja's ji'phutxna jîk.

Jesusa' txajx uuwa'ja's ki' pta'sxni

(Mt 20.17-19; Mr 10.32-34)

31 Jesusa' txâa yakh u'jusawe'sx docesatx fxiite pa'yaçxa na'wëk pta'sx:
 —Ăçxha' Jerusamente pa'jya' u'jweçtha'w, aça' Dxus yuwe pta'sxsawe'sxa' fxi'jtx Dxus Nçxi'k Nasa Yuusá's ma'wë yūuwa'thewa txâ' jxuka kxtey yuuna. 32 Dxus Nçxi'ka's vxite nasatx dukh ya'wata', aça' txâawe'sxa' npeevxysijkana wëesxuuna fxne'sx avxythethna yūuya'wata'. 33 Sa' wala peçxujkwena yuuçxa ikhetxna. Nawa tekx ente' ki' îtxî yuuna jîtewa, 34 txâa yakh u'jusawe'sxa' weh yuhwa jiyumeeta' sa' txâ'wë kxtey yuutxna sūjū'çwameeta'.

Teeçx piçthê'j Jerikotewe'sx uyya' âjasame's Jesus nuykatxhini

(Mt 20.29-34; Mr 10.46-52)

35 Txajū' Jesusa' Jeriko çxhabte pa'jaçte', teeçx piçthê'j uysaméek dxi'j pukate kaçxçxa lmusxnu pêjxna u'pu'. 36 Sa' nasa wala skhëwna susuçte wësê'jçxa', pêjxku:

—¿Kîh yuuçna? jîna. 37 Aça' nasa pasçxa':

—Jesus Nasarethuwe'sx aysu skhëuuça' jîte', 38 uysame' na'jînak sus we'we:

—¡Jesus, Davxid ji'j, adxa's meen peeygâh! jîna pxthaa we'wete',

39 nasa yaçte u'jsawe'sx yu':

—Sxuuna' myuu jînatx wëesxu we'we. Nawa txâa yu' jweeñiçxâak sus we'we:

—¡Davxid ji'j, adxa's meen peeygâh! jîna.

40 Txajū' Jesusa' nee yujuçxa pe'jya' kaakh. Sa' utxaana kũhte', na'jîk:

41 —¿Kîhga yūu jxthâasu'? jîte':

—Adxa' uyya' âjâlçmeeth, txâasath uy wëjê' jîk.

42 Aça' Jesus we'weçxa':

—Kaauyu'ljuna sūhçxane'ga adxa's pi'kx, txâa pa'ga âçxha' uyna mneeyūu jîçpkaçxha', 43 txâa dudtey uyya' âjâk, sa' Dxusna wala weçxana Jesus e'stey u'kh. Txâ'wë uyya' âjâte nasa uyçxa', txâawe'sxwa txâ'wëytxi Dxusa's wala weçxa.

Zakeo yakh Jesus puutx we'weni

19 1 Txajū' Jesusa' Jeriko çxhabte pa'jçxa', txâa çxhabsu skhëuuçku yu'. 2 Aça' kxte' teeçx piçthê'j wala ji'phsa Zakeo yaasesak ũsu'.

Txãa yu' gobierno jii vxyu pkhakhsa npiiçthê'jsak yu'. ³Txãa Zakeo' Jesus kimtewa jiyuya' puutx uy wêeçxawa, nasaa wala ksxavxyte' âjãme', txãa yu' le'çxkuêek yu' naa pa'ga. ⁴Sa' yaçte wuwuuçxa, sikómoro fxtüü tasxtek tejka Jesusa's uyua'. ⁵Aça' Jesusa' kxuy uykhêuuçça', fxtüü tasxte pagayçxa Zakeo's we'wek:

—Dudçxáa txajü miisa'j, adxa' iidx yatte açxhíi pa'jwa'j ji'pthu jíte', ⁶Zakeo' dudçxáa sa'jçxa, Jesusa's weçxanak txajx yatte jxpa'ga. ⁷Txã'wê yüute' nasa jxukaysa açewe'wetx: Jesusa' txãa piçthê'j pkalsa yattek pa'jya' u'j jina. ⁸Txajü' Zakeo' yujuçxa na'jinak we'we:

—Adx ji'phuni's puupxâhn txuhdeçxa puupletx peesu'nja, sa' maaítixi's ísxüüçxa jxthaakwe wá'ntka vxyu kusa'j nawa kusa'jnite pahz us jxthaakwe kaasxwedu'ju'nja jíte', ⁹Jesusa' na'jik:

—Naa piçthê'ja' Abrahan ji'kh yuu naa pa'ga naa yattewe'sx ewte neeyüuwa'j en pa'kh açxha'. ¹⁰Dxus Nçxi'k Nasa Yuusa' txã'wê vxituna üssatx pakweçxa ewte nvxiht-ya' íçxáath kíh jik.

Patron vxyu's nuypenakahn selpisaatx nvxiitni

¹¹Jesus we'weni's wêšê'jsa yu', naa sühnatx üsu': Jesusa' Jerusalente pa'jaça' na' açxha' txãa jxkaahsa yuuna sühnatx üsu'. ¹²Naa pa'ga na'wêk kwentu'jna pta'sx:

—Teeçx piçthê'j jxtuhthesa jxu'j kiwen u'kh, kxtee pa'jçxa jxkaahsa yuuçxa ki' sxawedxa'. ¹³Nawa u'jmey, diez selpisaatx pa'yaçxa, kxazíitx txakweçxaçxáak vxyu üsçxa na'jina neewe'we: Adx sxawedna pa'phkaçx naa vxyu yakh mjiiine'kwe nuypenhaya'. Txã'jçxak jxkaahsa yuuya' jxu'j kiwen u'j. ¹⁴Nawa txajx kiwete nasa' jxkaahsa kí'pni's wa'lçxa, na'jinatx päatxhí'khya' kaah txajx e'stey: Naa piçthê'j kwe'sxtxi jxkaahni's peejxmeetha'w jítewa, ¹⁵pejka jxkaahsa yuuçxa ki' sxawedku txajx kiweníi. Sa' pa'jçxa' selpisaatx vxyu üsne' txáatx pa'yak, nasa iisa maz nuypehnatewa jiyuya'. ¹⁶Aça' nyafxtewe'sx kühçxa' na'jik: Iidx vxyu üsgu txáate diezthu jxthaakwe nuypehna jíte', ¹⁷jxkaahsa pasçxa': Wala ew selpiig. Txã'wê walameekuêsa'swa ew jxpe'pha'ga, diez çxhabte jxkaahwa'jsa ne'jwe'sx kí'pu'nja jik. ¹⁸Txajü' vxitewa utxaaçxa na'jik: Iidx vxyu üsgu txáate tahçthu jxthaakwe nuypehna jíte', ¹⁹jxkaahsa pasçxa': Iidx' tahç çxhabte jxkaahwa'jsa ne'jwe'sx yuune'ga jik. ²⁰Txajü' tekhtewe'sxwa utxaaçxa na'jik: Iidx vxyu üsgu txã'sa' panxwelote yapçxa jxaawthu. Txã' ayga üsa'. ²¹Iidx' wala juuna' yu'g, txã'wê mjiiimeeçxawa vxyu pëyi'g sa' iidx uuthasxmeetewa kxtee u'kaçxa jxuka pkhakhe'g. Aça' üukhçxa iidx vxyu'sa' kmãaji'jmeeth jíte', ²²jxkaahsa pasçxa': Iidx' seelpimeeg. Iidx yuweteyçxáa ewmeete neeyüuçgu. Adxa' juuna'saçxa' mjiiimeeçxawa vxyu pëjxna adx uuthasxmeetewa pkhakhsatewa jiiçxa', ²³çkíh yüutega adx vxyu'sa' bankoga jxaawmé? pehnate adx sxawedna pa'jçxa' jxthaakwe kutxi'khan jik. ²⁴Sa' txãa jxkaahsa' na'jinak we'we kxtee üssatx: Txãa vxyu's kusa'jçxa diez vxyu

ji'phsa's meswe jīte!, ²⁵ txāawe'sx pasçxa: Txā' vxyu walayā'j ji'pha', aça' çma'wē txā'síuçxáa ūsukxtha'w? jīte'wa, ²⁶ jxkaahsa pasçxa na'jīk: Maa'wa jxpa'yakx jxpe'jçxa nuypenasa's jxthaakwe ūswa'j yuuna. Nawa jxpe'jya' ājāmeeçxa nuypenasame's jxuka kusa'jwa'j yuuna, le'çxkuēçxáa ji'phtewa. ²⁷ Sa' adxa's ahçççxa jxkaahsa yuukahmén pāatxhī'khsawe'sxtxi' ayte pe'jna kūhçxa adx uyna ūste miikhwe jīk.

Jesus Jerusalente u'kani

(Mt 21.1-11; Mr 11.1-11; Jn 12.12-19)

²⁸ Txāa ejemplo's pta'sxna jxā'jçxa', Jerusalente pa'jya' u'kh. ²⁹ Sa' Betfagagé vxite! Betania çxhab ūsu'tx Oliwos vxiç utxaga kxtee pa'jya'çxáa txāa yakh u'jusa e'zsats kaakh ³⁰ na'jīna:

—Naaga çxhab ūsa' kxtee me'jwe. Sa' kxtee pa'jaççxa', teeçx buçxukuē uyuune'kwe kim yuhwa a'jnimeesa tudni ūsna. Txā'sa' jxūkhwedeçxa jxūna yuweene'kwe. ³¹ Jxūna yuhte', maafī yu' pēyi'wáatxna aça': Kwe'sxtxi jxpe'jsak níkxya' kaah jīne'kwe. ³² Aça' txā'jīte' u'jçxa', Jesus ma'wēne' we'we txā'wēy uytxi. ³³ Txajū' buçxu's jxūkhwedeçte', namuwe'sxa' pējxtxi:

—çKījxa' buçxu's jxūkhwedeçkwe? jīte', ³⁴ txāawe'sx pasçxa':

—Kwe'sxtxi jxpe'jsak níkxya' kaah jītx. ³⁵ Sa' Jesus tasxte jxūna kūhçxa', txāawe'sx atxhtxi puççxa Jesusa's ka'ja'jtx.

³⁶ Txajū' Jesus u'jwa'j dxī'jsu yaçtetx txāawe'sx atxhtxi pusna u'jwe'. ³⁷ Sa' Oliwos vxiç e'skhē u'jweçpkaççha', Jesus yakh yuusa nasa' Dxusa's wala weçxana weyya' takhtxi txā'wē Jesusa' kījkīhwa ew yūuna u'juni's uyuçxa. ³⁸ Sa' na'jīnatx weyi':

—jDxus kaahni wala yuh ew jxkaahwa'jsa yuja'! jDxus cielutewe'sxa's weçxaaga wala ew yūupa'ga! jī'tx.

³⁹ Txajū' nasaa ksxavxyte yuusa fxariseowe'sxa' na'jītx:

—Iidx e'ste kuçx susna yuusats mwe'we, sxuuna' yuukahn jīte', ⁴⁰ Jesus pasçxa':

—Makwe txāawe'sx yu' sxuuna' yuutewa, kweta' Dxusa's tuuthe'jetxna jīk.

⁴¹ Txajū' Jerusalente utxa pa'jçxa', çxhaba's thegçxa ū'nek ⁴² na'jīna:

—I'kwe'sxa' wēt kfxi'ze'jwa'jsa's jiyuçxa naa ente jxpa'gawaça', wala yuh ewna. Nawa i'kwe'sxa' jīmée ūsi'kwe na' jxpa'gameene'kwe. ⁴³ Naa pa'ga i'kwe'sxtxi' nxuswal'j en pa'jana, aça' txāa ente' çxhaba's jxuka yupna ktadxiçxa ⁴⁴ çxhaba's kīh yuhwa nvxihtmée jxuka suwuutxna kxtee ūssats ikhna. Sa' teeçx kwetçxáa yuhwa kēese'jnimée yu' neeyūumeena, i'kwe'sx ksxavxyte Dxus kīhtewa, jxpa'gamee'kwe naa pa'ga jīk.

Dxuus yatte txweysaatx Jesus kasxisxni

(Mt 21.12-17; Mr 11.15-19; Jn 2.13-22)

⁴⁵ Txajū' Jesusa' dxuus yatte u'kaçxa kxtee txweyna ūssats jxuka eka kasxisxku ⁴⁶ na'jīna:

—Dxus librute na'wē fxi'jni!: Adx yata' Dxus yakh puutx we'wena ūswal' yatçxá' jina fxi'jni'. Nawa i'kwe'sx yu' peswée pkhaakhena ūsni kafx na'wēçxáa vxitçxa ji'phi'kwe jik.

⁴⁷Jesusa' een isak dxuus yatte u'kaçxa kaapiya'ja'. Naapkaçxha' sacerdote npiiçthē'jwe'sx vxite! Dxus leya's kaapiya'jsawe'sx vxite' çxhabte ne'jwe'sx txāawe'sx yu': ¿Ma'wē yūuçxa ikhekxtha'w? jīnatx puutx we'wena ūsu!. ⁴⁸Nawa ikhya' yu' ājā'çmeeta', nasa jxukaysa Jesus ju'guçxaçxáatx ūsu' naa pa'ga.

Dxuus yatte Jesus juuna' yūuni's pēyni

(Mt 21.23-27; Mr 11.27-33)

20 ¹Teeçx ente' Jesusa' dxuus yatte Dxus yuwe ewte nvxiitwa'jsa's pta'sxna ūste', sacerdote npiiçthē'j vxite! Dxus leya's kaapiya'jsa vxite! judiu nthē'jsa txāawe'sx pa'jçxa' ²na'jīnatx pējx:

—Idxa' ¿kim jxkaathega dxuus yatte txā'wē juuna' yūu? Kim jxkaathe txā'wē yūuçxawa mpeeta'sx jite', ³Jesusa' na'wēk pas:

—Adxwa i'kwe'sxtxi' pējx ya'wath aça' txā'sa' mpaaswe. ⁴Juan Bautista's ¿kinga jxkaah yu'te bautisāykahn? ¿Dxus wá' jxkaah meeçxa' naa kiwete piçthē'j jxkaahni wá' yu'? jite', ⁵txāawe'sx pwe'sx na'jīnatx puutx we'we':

—¿Ma'jina pasukxtha'w? Dxusne' jxkaah jīwaçwa, txā'wē Dxus jxkaathe' ¿mjīya'kwe Juan pta'sxni's jxpa'gamée? jina. ⁶Aça' naa kiwete nasane'ta jxkaah jite', kwe'sxtxi kwet wāatatahçxa ikhetxna, nasa' jxukaysa Juana's ew jiita' Dxus yuwe pta'sxsatewa. Txāasa kwe'sxtxi' txā'wē yūutxna jī'tx.

⁷Txajū' Jesusa's pasçxa':

—Juana's kimne' jxkaah bautisāykahn nawa jiimeetha'w jite', ⁸Jesus pasçxa':

—Adxwa kim jxkaathe txā'wē yūuçxawa pta'sxme'nja jik.

Mjīsawe'sx patron nçxi'ka's ikhni yakh kaaja'daljni

(Mt 21.33-44; Mr 12.1-11)

⁹Txajū' Jesusa' naa ejemplo'sku pta'sx:

—Teeçx piçthē'ja' txajx kiwete jxuka uwa uhçxa mjīisatx ew neewe'weçxa wala txaçx u'kh. ¹⁰Sa' uwa thē'jeçte', kiwe namu' teeçx selpisa's kaakh kiweepa'ga pējxya'. Nawa kiwe's mjīisawe'sxa' txāa selpisa's pāpāçxa kīh yuhwa dukhmée kaahtx. ¹¹Aça' kiwe namu' vxite selpisa's ki' kaakh. Nawa txā'snawa txā'wēy iiwēesxuna pāpāçxa kīh yuhwa dukhmée neeutx. ¹²Txajū' kiwe namu' ki' vxite selpisa's kaakh. Nawa kiwe's mjīisawe'sxa' txā'snawa kpā'vxitçxa dukhmée neeutx.

¹³Txā'wē yūute', nmehte' kiwe namu' na'jik: Açha' ¿kīh yūuki'th? Meeçxa' adx nçxi'k wedxnisa's kaja'nja. Aça' txā'sa' ūukhçxa txā'wē yūumeewáatxna

jīçxak kaah. ¹⁴Aça! mjiisawe'sxa' kiwe namu nçxi'ka's uyçxa', txāawe'sx pwe'sx na'ljinatx puutx we'we: Ney uute!, kiwe's naathē'j iiyamuwa'lsana. Aça! ikhega, khīçxa kiwe's kwe'sx iiyamu'nja'w jīçxa ¹⁵eka kutxi'ljçxa ikhtxi jīk.

Txajū! Jesusa' txā'wē pta'sxçxa' pējxku:

—Txā'wē yūute!, kiwe namu' txāa mjiisawe'sxtxi' çkīh yūukx? ¹⁶Txā'wē yūupa'ga kiwe namu' txāa mjiisawe'sxtxi' jxuka ikhçxa kiwe's vxitetx ūsuna jīte!, txā'wē pta'sxni's wēsē'ljçxa na'ljītx:

—Dxusa' kxtee pa'l'j yu' wedxmeena jī'tx.

¹⁷Txā'wē paste!, Jesusa' txāawe'sx dxi'psu thegçxa na'wēk pta'sx:

—Txā'wē yuune'ljmeete!, çkijxa'çxáaki'k Dxus librute na'wē we'we'?:

Yat txaahsawe'sxa': Naa kweta' selpime' jīçxa wāatāhtx,

Nawa txāa íik yat makwesana çxhāçxha neewewa'l'jsa yuuna pa'l'j.

¹⁸Aça! maawa txāa kwette iikasa' jxuka çxkateteetxna. Meeçxawa txāa kwet nasaa kajkwēkhē weteçxa', jxuka ku'çxina jīna fxi'ljni'.

Gobierno's dukhwa'ja'swa pēyni

(Mt 21.45-46; 22.15-22; Mr 12.12-17)

¹⁹Txajū! sacerdote npiīçthē'j vxite' ley kaapiya'jsawe'sxa' jiyutx txāa ejemplo' txāawe'sxtxi' we'wenitewa. Sa' ūusaçxaçxa txāa dudtey Jesusa's tud wēetx. Nawa Jesus ju'gusa nasa wala kuh ūste!, ūukhçxa kīhwa yūumeeta!. ²⁰Nawa kīhteçxáawa ewmeete nvxilt-ya' sūhçxa thegsa kaahtx. Aça! txāawe'sxa' Jesusa's ew paapēysa na'wē yuh we'wena utxaatx, jxkaahsa's ewmēe we'wetewa jiyuçxa' ne'ljwe'sxa's pāatxhī'khya' sūhçxa. ²¹Sa' na'ljinatx paapējx:

—Kwe'sxa' idxa's jiitha'w. Idxa' isasaçxá'sgu pta'sxi!, Dxus tasxte pa'l'jwa'l' dxi'l'ja's kaapiya'l'na. Sa' nasaa jxkaahna yu'kxpehnitx nwēese'je'çmeeg, txāa pa'l'gately idxa' nasa ewsa na'wē thegsatx jiyumey ju'gu yu'çmeeg. ²²Àçxha' na'wētha'w jiyu wējē!: Jxkaahsa Cesara's vxyu dukhte çewmanx? meeçxa' dukhmeete çewmanx? jīte!, ²³ewmēe yajkçxa txā'wē pējxna ūstewa Jesusa' jiyuçxa na'ljīk:

—çKījxa'kwe adxa's ewmeete nvxiit wējē'? jīçxa ²⁴txāawe'sxtxi' teeçx vxyu musx pējxku. Sa'!

—Naa vxyu' çkiim dxi'pa's jī'phna, sa' kiim yase's fxi'ljnina? jīte!, txāawe'sx paççxa'!

—Cesar dxi'pa's jī'pha' sa' txajx yase's fxi'ljni' jītx. ²⁵Aça! Jesusa' na'wēk jxkaah:

—Cesar jī'sa' Cesara's dukhwa'ja'. Sa' Dxus jī'sa' Dxusna dukhwa'ja' jīk.

²⁶Txā'wē nasaa dxi'pte isasaçxáana paste!, Jesusa's ewmēe vxit-ya' ājāmeeçxa, kuh yajkxna sxuuna'tx neeyūu.

Uusaawe'sx ki' itxi yuua'ja'swa pēyni

(Mt 22.23-33; Mr 12.18-27)

²⁷Txajū! saduceowe'sx maafi yu' Jesus tasxte paapējxya' pa'ljtx. Nasa' uuyā'ljçxa' peena yu' itxi' yuumeetxna sūhsatx yu' txāa saduceowe'sxa', txāasatx na'wē pējx:

28—Moisesa' na'ljīnak fxi'jçxa nvxiht: Maa piçthē'jwa luuçx ji'phumey nyu's nvxihtçxa uute!, uusáa nyakha' txāa u'ya's iyyuuna, aç'a' txāate luuçxa' uusáa nçxi'k na'wē neeyūuna jīnak fxi'j. 29 Aç'a' kwe'sxa' jiitha'w siete piçthē'j pxakhtxi u'pu', sa' nyakh nthē'jsa' iyyuuçxawa luuçx ji'phumey uuk. 30 Aç'a' nyakh e'stewe'sxku iyyuu txāa u'ya'síiçxáa. Nawa txāawa luuçx ji'phumey uuk. 31 Txajū' nyakh tekhtewe'sxwa txāa u'ya's íiçxáak iyyuu. Txāawa luuçx ji'phumey uuk. Txā'wēçxaçxáatx sietesay txāa u'yçxaçxá's iyyuuna jxā'j. Nawa maa yuhwa luuçx ji'phumey uutx. 32 Aç'a' nmehte' txāa u'ywa uuk. 33 Aç'a' uusaawe'sx ki' itxī yuu ente!, txāa u'ya' çmaa yakh isa nyu yuua'jsakx? jīte!, 34 Jesus pasçxa':

—Naa kiwete nasa' ptamuuna txāawe'sx luuçxtxiwa kaaptamu'ju'tx. 35 Nawa vxite kiwete pçumée itxī fxi'zewa'the pa'jya' ājāsa' ki' itxī yuuçxa' txāawe'sxa' ptamuwa'jsameeta!, sa' txāawe'sx luuçxtxiwa kaaptamu'jna ūswa'jsameeta!, 36 txāa pa'gatey txāawe'sxa' Dxus angeleswe'sx na'wēsa yā'tha', sa' Dxus luuçx yā'tha' na' itxī yuuyā'jçxa' peena yu' uuwa'jsameeta!. 37 Txā'wē uusaawe'sxa' ki' itxī yuua'jsate íiçxáak Moisesiwa jiyukahn na'wē fxi'jçxa nvxiht txajx librate. Kxteea' Dxusa' çhūçh yu'kh behna ūsni pxājū we'weçxa': Abrahan, Isaak, Jakob txāawe'sx Dxusthu jīk. 38 Dxusa' uusaawe'sx Dxusme!, naasáa itxīsawe'sx Dxusçxá!. Dxus tasxte' maa yuhwa uumée itxī ūsta' jīnak pta'sx.

39 Txajū' Dxus leya's kaapiya'jsawe'sx we'weçxa':

—Wala ew pta'sxgu jīçxa, 40 peena yu' kíhwa jwee yu' pējxmeeta'.

Dxus tasxu yuusa' çkiim nçxi'kki? jīna Jesus pēyni

(Mt 22.41-46; Mr 12.35-37)

41 Txajū' Jesusa' na'wēk pējx:

—çMa'wēteta Kristo' Davxid nçxi'ka' jīna we'we' nasa'? 42 Naapkaçxha' Salmos librate Davxid we'weçxa yu' na'ljī'k:

Adxna jxpe'jsa Kristo's Dxusa' na'ljī'k:

Adx pukate paçu ju'gte mkaaçx,

43 Idxna açesatx idxçxaçxáana nwēese'jwa'ja's vxitna jxā'phkaçx jīk.

44 Davxida' Kristo's we'weçxa': Adxna jxpe'jsa jīk, aç'a' Kristo' çma'wē yuuçxa Davxid nçxi'k yuukx?

Fxariseo vxite' ley kaapiya'jsawe'sxtxi yuuwesa Jesus nvxiitni

(Mt 23.1-36; Mr 12.38-40; Lk 11.37-54)

45 Nasa jxukaysa wēsē'jna ūssa ksxavxyte Jesusa' txāa yakh u'ljusawe'sxtxi na'ljīnak we'we:

46—Dxus leya's kaapiya'jsawe'sxtxi' mpa'yajkxwe. Txāawe'sxa' ropa jxu'jsa athçxa plaasasu msuuwa weçxa jxthāasnatx pekūjū'. Sa' judiuwe'sx pkhaakhenisuwa kaçxní wejx zhiçxkwe ewsaçxáanatx pakwé!. Maa yat-su sāl'jīya' pi'kxtewa, txā'wēytxi kaçxwa'j ewsaçxáana pakwé!. 47 Sa'

vxiudawe'sx yattxiwa kusa'ja'tx, kījkih ji'phuni'swa jxuka. Nawa ewsata' sūjkahn wala jxu'lj lisa'tx. Txā'wē yūupa'ga txāawe'sxa' wejx jxthaakwe Dxus kastigāyini yuutxna jīnak pta'sx.

Vxiuda ofxreda akhni

(Mr 12.41-44)

21 ¹Wala ji'phsawe'sx dxuus yatte ofxreda wala āsxiçtek uy Jesusa'.
²Txā'wēy teeçx vxiuda puuplesawa kūhçxa', e'z vxyuu musxkuē akheçte uyçxa' ³na'jīk:

—Isath we'we', naa vxiuda puuple' maatewa jxthaakwek wala akh.

⁴Vxite yu' akhçxawa, neeyūsáa peejxmeesaçxáan yā'jtx akhe'. Nawa naa u'ya' kih yuhwa ji'phmeesaçxawa txajx ū' weywa'ja's jxukak akh jīk.

Dxuus yat pçuwa'ja's Jesus pta'sxni

(Mt 24.1-2; Mr 13.1-2)

⁵Txajū' kxtee ūssa maaní yu' dxuus yata's thegçxatx we'wena ūsu': Ofxreda peesni yakh wala yuh zhiçxkwe pheu'jna txaahni' jīte', Jesusa' na'jīk:

⁶—Āçxhūi yu' txā'wē yuh zhiçxkwe thegna ūsa', nawa kih yuhwa nvxihtméé jxuka suwní yuwa'lj en pa'jana. Aça' teeçx kwetçxáa yuhwa kéesē'jnimée yu' neeyūumeetxna naa yattewe'sx jīk.

Naa kiwe pçuwa'lj en ājaçte seena'sa vxyaawa'lj

(Mt 24.3-28; Mr 13.3-23)

⁷Txā'jīte':

—¿Bagaçx txā'wē yuukx? meeçxawa txā'wē yūuwa'lj en ājaçte' ¿kihçxa yuukx? jīna pējxte', ⁸na'wēk pta'sx:

—I'kwe'sxtxi kaypuba'jwe'sxte mpa'yajkxwe. Txā'wēme' wala kasejtxna Dxus kaahnisatha'w jīna na'jīna: Adxa' Kristoth, aça' āçxha' nmeh en ājk jītxna. Nawa txāawe'sxtxi' nwéesē'jnuwe. ⁹I'kwe'sxa' wésē'jene'kwe gweçxa seena'sa yuja' jīni, nawa txā' nyafxtewe'sxçxáata' aça' ūukhmeene'kwe. Nmeh en yu' āhméy txā'wē yuuna.

¹⁰Txajū' ma'wē yūuwa'ja'swa jxuka pta'sxku na'jīna:

—Txān en ājaçte', gobierno' vxite kiwete gobierno yakh puiitxna. Naapkaçxha' puutx jxu'lj kiweju pwe'sxwa puiitxna. ¹¹Sa' msuu msuuwa seena' ehd ul'jwena. Wējēwa txā'wē wala pa'jana. Naapkaçxha' kakwete wee seena'sawa pa'jana. Sa' cieluju kījkihwa seena'saçxáa vxyaatxna. ¹²Nawa txā'wē seena' yūuwa'lj en pa'jmeyna, i'kwe'sxtxi ahçeçxa preesu'jya' pakweetxna. Sa' judiuwe'sx pkhaakhenisuwa jxūna ul'jwetxna: Nasa ewmeesa' jīna. Txā'wē yūuna karceltewa txajatxna, i'kwe'sxa' adxna nwéesē'pha'gaçxáa jxkaahsawe'sx tasxsu vxite' nel'jwe'sx tasxsuwa kuutxa'jni yuune'kwe. ¹³Txā'wē yūute', Dxus yuwe's

txãawe'sxtxiwa pta'sxwa'lj en ji'phune'kwe. ¹⁴I'kwe'sxa' txãawe'sxtxi' çma'wẽ pasukxtha'w? sũhna kuh yajkxmeene'kwe, ¹⁵txãa pa'gatey adxa' i'kwe'sxtxi açesawe'sxtxi ma'wẽ paswa'lja'swa kaaũusuthe'je'nja. Aça' txãawe'sxa': İsxĩija'g jĩya' ajãmeetxna maa yuhwa. ¹⁶Sa' i'kwe'sx nwe'sxĩi yuhwa açeni yuune'kwe, tatawe'sx, yakthê'jwe'sx, namikuwe'sx preesu'jutxna. Aça' maafi' yu' ikhni yuune'kwe. ¹⁷I'kwe'sxa' adxna nwẽesê'pha'ga naa kiwete jxukaysa açeni yuune'kwe. ¹⁸Nawa i'kwe'sx dxkhasçxáa yuhwa vxitumeetxna teeççxáa yuhwa. ¹⁹I'kwe'sxa' uu entepkaçx Dxus yakh txutemée fxi'zeçxa', Dxus tasxte itxĩ fxi'zewa'lja's ji'phune'kwe.

²⁰Jerusalen çxhaba's soldauçxaçxáa jxuka ktadxiçxa ũste uyçxa', açxha' naa çxhaba' jxuka pçuwa'ljsana sũhna jii ũsune'kwe. ²¹Naapkaçxha' Judeasuwe'sxa' ũphna u'jwetxna yu'khsu, aça' Jerusalen çxhabtewe'sxwa txãa çxhabu ũphna kasejetxna, vxite' çxhab ekajuyã'j ũssa' çxhabte u'kameetxna. ²²Txã'wẽme' txãn ensu' kastigo seena'sa yuuna Dxus librute ma'wẽga pta'sxi' txã' jxuka kxtey yuuna. ²³Aça' txãn ensu' nasa ji'phsa meeçxawa luuçx apãkuẽ ji'phsa' wala yuh pxthaa yuutxna, txã'wẽ txãa nasatx kastigo seena'sa pa'the', naa kiwete wala yuh nxuswa'lj yuuna. ²⁴Maaítxi's gweçxate ikhetxna, sa' vxite yuutxi's preesu'jçxa jxu'lj kiwen jxũna u'jwetxna. Naapkaçxha' Jerusalen çxhaba's vxite nasa u'kaçxa jxuka suwçxa kxtee makwe txaçxwa ũsutxna.

Dxus Nçxi'k Nasa Yuusáa seena' zhiçxkwe vxyaana

(Mt 24.29-35, 42-44; Mr 13.24-37)

²⁵Txã'wẽ yũunijũ' sek a'te estrelxa txãasu seena'çxáa vxyaatxna. Aça' naa kiwete nasa mtee mteewe'sxwa jxuka jxpubana iiméh wala ũukhutxna txã'wẽ ikh wala seena' yuuna susni's wẽsê'jçxa. ²⁶Txã'wẽ seena' yuuçte', naa kiwete nasa' ũukhçxa ũus yu'swa ivxiitutxna, naapkaçxha' êe walate kijkih ũssawa jxuka seena' kéesê'jni yuutxna. ²⁷Txajũ' Dxus Nçxi'k Nasa Yuusa's uyuutxna, tãaph pxãhte sek na'wẽ seena' zhiçxkwe khikhyna kijjaçte. ²⁸Txã'wẽ seena' yuuya' takheçte', i'kwe'sxa' ũukhmée weçxana ũyhasna meswe, jwee yu' jxthëeyuumée nwe'weni yuune'kwe jik.

²⁹Txãa e'su' vxite ejemplo pta'sxku:

—Mthegwe higwera fxtũu tasx meeçxawa vxite fxtũu tasxtxi. ³⁰Sa' txãa fxtũu tasx yeeçuçte uyçxa', yũnya'watewa jiyu'i'kwe. ³¹Txã'wẽy adx pta'sxni kxtey yuuçte uyçxa', Dxus naa kiwete kũiwa'lj en utxaaçna sũhna jii meswe.

³²Isath we'we': naa ensu nasa uumeyna, txã'wẽ kxtey yuuna. ³³Cielu naa kiwe jxuka skhëuutxna, nawa adx we'weni' jxuka kxtey yuumey yu', skhëwmeetxna.

³⁴Wala jxpa'yakx meswe, ewmée yũuna tũuna kijkihwa naa kiwetewe'sxçxá's yajkxna fxi'zenuwe. Txã'wẽme' Dxus yu's yajkxmée

ũsiyna, Dxus kiiwa'lj en ãhçxáa yuuna. ³⁵Niimalwa jiimeeçxa' ma'wêga yajkxte khêje', txã'wêyçxáa Dxus kiiwa'lj ena' kpaakina naa kiwete nasa mtee mteewe'sxtxiwa jxukaysatx. ³⁶I'kwe'sxwa wala jxpa'yakx meswe, na'wê seena' yuuya'wa' txajü iyuya'. Dxus yakh puutx we'wena nes myuuwe bagaçxtewa, sa' txã'wê yüuçxa' Dxus Nçxi'k Nasa Yuusáa tasxte utxaaya' ãjane'kwe jík.

³⁷Jesusa' en yu' dxuus yattek kaapiya'ja', nawa kus yu' Oliwos vxíçnak u'jwe'. ³⁸Aça' nasa' een isa kuusítx dxuus yatte pa'ja' Jesus kaapiya'jni's wêsê'jya '.

Jesusa's ikhwa'ja's puutx we'weni

(Mt 26.1-5, 14-16; Mr 14.1-2, 10-11; Jn 11.45-53)

22 ¹Pan lewadura ji'phmêe ü'ni Paskua fxiesta ãjãçku yu'. ²Aça' sacerdote npiíçthê'jwe'sx vxite' ley kaapiya'jsawe'sxa': Jesusa's çma'wê yüuçxa ikhekxtha'w? jínatx txãawe'sx pwe'sx puutx we'wena üsu'. Nawa nasa wala kuh Jesus ju'gusa üste', üukhu'tx.

³Naapkaçxha' eçxthê'ja' Judas Iskariote üuste u'kak. Txãa Judas yu', Jesus yakh u'jusa docesatewe'sxíçxáak yu'. ⁴Txajü' txãa Judasa' puutx we'weya' u'kh sacerdote npiíçthê'jwe'sx vxite' dxuus yatte thegsawe'sxtxi, Jesusa's txãawe'sx kusete dukhya'. ⁵Aça' txã'wê puutx we'wete', txãawe'sxa' vxyu dukhya' neeyüutx Judasa's. ⁶Txajü' Judasa' nasa uynimeete paaçte dukhwa'ja's pakwek.

Jesusa' docesawe'sx yakh nmeh ü'ni

(Mt 26.17-29; Mr 14.12-25; Jn 13.21-30; 1 Ko 11.23-26)

⁷Txajü' pan lewadura ji'phmêe ü'ni fxiesta en ãjk. Txãa ente' piisxáa luuçxtxi ikhe' Paskuatewe'sx. ⁸Aça' txãa ente' Jesusa' na'jínak jxkaah Pedro Juanwe'sxtxi:

—Me'jwe Paskua fxiestate ü'wa'ja's pheu'jya' jíte', ⁹txãawe'sxa' pëjxtxi:

—¿Mteega pheu'lj jxthãasu'? jíte', ¹⁰Jesus pasçxa':

—Çxhabna u'jçxa kxtee pa'jaççxa', teeçx piçthê'j uyuune'kwe yu' mitxha's yakhçxa u'jweçte. Sa' e'ste u'jwene'kwe yatte u'kapkaçx. ¹¹Sa' kxtee pa'jçxa', yat namu's na'jîne'kwe: Kwe'sxtxi jxpe'jsa' pëjxya'k kaah: Paskua fxiestate txãa yakh u'jusawe'sx yakh ü'wa'lj çmtee piesa pheu'jni üsna? jíkaja'k jîne'kwe. ¹²Aça' yat namu' êe yatte piesa walasa pheu'jniyã'jsa's pta'sxina. Kxtee ü'wa'ja's pheu'june'kwe jínak jxkaah. ¹³Aça' Pedrowe'sxa' u'jçxa', Jesus ma'jîni'swa jxuka kxtey uyçxa Paskua fxiestate ü'wa'ja's pheu'jtx.

¹⁴Txajü' ü'wa'lj ora ähte', Jesusa' txãa yakh u'jusawe'sx yakh kaççku mesate ü'ya'. ¹⁵Sa' na'wêk we'we:

—¿Mazkuê uswa wala yuh yaaki'th, adxa's uu en pa'jmeyna, naa Paskua fxiestate i'kwe'sx yakh nmeh ü'wa'ja's! ¹⁶Na'jî'th na': ãçxha'

ayte peena yu' naa Paskua fxiestatewe'sxa's ũ'me'nja, Dxus ki' jxkaajxa' pa'jwa'j en ahpkaçx.

¹⁷Txajü' waso's uweçxa Dxusna weçxana orâyçxa', na'jik:

—Jxpa'gaçxa jxukaysa mtudxwe naa wasotewe'sxa's. ¹⁸Na'jî'th na': açxha' ayte peena yu' uwa yu'a's tudxme'nja, ki' Dxus jxkaajxa' pa'jwa'j en ahpkaçx.

¹⁹Txajü' pana'swa Dxusna weçxana orâyçxa', pe'ltedeçxa txâawe'sxtxi ũsu'sku na'jîna:

—I'kwe'sx pa'gate adx kakwe' dukhwa'j yuuya'wa', aça' naa pana' adx kakwe na'wësa'. I'kwe'sx pa'gate adx pxthaa yuuçxa uuni's yajkxna txâwë myüuwe bagaçxtewa.

²⁰Ū'na jxâ'jçxa', waso's jxpa'gaçxa na'wëk we'we:

—Adx eea's pkawçxa yuuçxáak Dxusa' i'kwe'sxtxi nwe'wewa'ja's u'se pheu'jçxa nvxiht. Aça' naa wasotewe'sxa' adx ee na'wësa'.

²¹Aça' açxha' adx yakh ũ'na u'pa' ay mesate txâa piçthê'ja' adxa's açasawe'sx kusete dukhya'wa'. ²²Dxus Nçxi'k Nasa Yuusá' açxha' pejka uuya'wayuja'. Adx uuwa'ja's ma'wëne' Dxus nvxiht txâ' kxtey yuuya'wa'. Nawa adxa's açasawe'sx kusete dukhsa' ;seena' yuh nxuste khêjena' jîte', ²³Jesus yakh u'jusa pwe'sx puutx ya'paapëyi'tx na'jîna: Kwe'sx ksxavxytewe'sx ¿kim txâ'wë dukhya'wakx? jî'tx.

Maa wejx jxthaakwe walasa yuuwa'ja's pêyni

²⁴Txajü' txâawe'sx pwe'sx na'wë yüuwa'ja'stxi puutx ya'paapëyi':

—Ayte kwe'sx ksxavxytewe'sx ¿maa wejx jxthaakwe walasakx? jîte',

²⁵Jesus paççxa':

—Naa kiwete jxkaahsawe'sxa' wala juuna'çxáa yuuna jxkaaja'tx.

Txâ'wëtewa txâawe'sx yuutxi's wala ewsata' jî'tx nasa yu'. ²⁶Nawa i'kwe'sxa' txâ'wë yüuna jxkaahwa'jsameei'kwe, wejxwa i'kwe'sxa' maafi yu' jxthaakwe walasa ũsçxawa, nuuçxa na'wë yuuwa'j ji'phi'kwe. Aça' maawa jxkaahwa'ja's ji'phsa', selpisáa na'wëçxáa yuuwa'j ji'phi'kwe.

²⁷¿Maa wejx jxthaakwe walasakx? ¿Puuçte mesate ũ'ya' kaçxsá wejx jxthaakwe walasamanx, meeçxa' puuçsa wáa wejx jxthaakwe walasana? Isa ew yajkxte', mesate ũ'ya' kaçxsá jxthaakwe walasana. Nawa adxa' i'kwe'sxtxi selpisáa na'wëçxáa ũsthu.

²⁸Adxa' bagaçxtewa nxuste thêyte fxi'zeçtewa i'kwe'sxwa adx yakh ja'da pxthaa yuuna nesi'kwe yu' nvxihtmé. ²⁹Txâa pa'ga adxa' i'kwe'sxtxi ũsu'nja jxkaahwa'ja's, adxa'swa ma'wëga adx Tata jxkaahwa'ja's ũs txâ'wëy, ³⁰kxah adx jxkaahna ũsnite pa'jçxa', adx yakh ih mesate ũ'wene'kwe, sa' Israelwe'sx jî'j docesatx jxkaahsa yuune'kwe.

Pedro ísxiwa'ja's Jesus pta'sxni

(Mt 26.31-35; Mr 14.27-31; Jn 13.36-38)

³¹Txajü' Jesusa' Simona's na'wëk pta'sx:

—Simon, idxa' wala yuh mpa'yajkx. Txã'wēme' eçxthē'ja' i'kwe'sxtxi pējxku skuutxh kweeja'jsa na'wē yuuya'. ³²Nawa adxa' iidx pa'gate Dxusa's neewe'weth, Dxusçxáana yajkxna fxi'zekahn. Aça' idxa' Dxus tasxte ki' sxawedçxa', yakthē'jwe'sxtxi kçxhãaçxha'jane'ga Dxus yakh txutemée fxi'zewa'ja's jíte', ³³Simon pasçxa':

—Adxa' karcelna ma'k yuu meeçxa' uuwa'j ma'k yuu nawa adxa' kîhte yuhwa txuteme'nja jíte', ³⁴Jesus ki' we'weçxa' na'jîk:

—Pedro, idxa's na'jî'th na': açxhíi atalx we'wemeyna, idxa' tekh us îsxíjacyã'j yuune'ga adxa's jiimeeth jîna.

Jxpa'yakx ūs kaahni

³⁵Txã'wē pta'sxçxa' Jesusa' na'wēk pējx:

—Adxa' teeçx ente' i'kwe'sxtxi' Dxus yuwe pta'sxya' kaahçxa' kîh yuhwa ji'phmeeth kaah, ya'ja, vxuyu, pelgatxi txã'wēsaxt. Aça' i'kwe'sxtxi' dxi'the çkîhçxá' peejiigá'? jíte', txãawe'sx pasçxa':

—Kwe'sxtxi' kîh yuhwa peejime' jîtx.

³⁶Aça' Jesus we'weçxa' na'jîk:

—Açxha' ya'ja ma'k yuu, vxuyu ma'k yuu, kçxilx ma'k yuu nawa ji'phsa' jxūçxa me'jwe. Aça' kçxilx ji'phmeesa' atxha's txweyçxa kçxilx mweywe.

³⁷Txã'wēme' Dxus librute we'weçxa': Ewmeesathas yuuwesa yakhku ki'pni yuu jîk naa pa'ga açxha' adxa's jxuka txã'wēy yuuya'wata' jíte',

³⁸txãawe'sx we'weçxa':

—Ayte e'z kçxilx yu' ūsta' jíte', Jesus pasçxa':

—Txã'wēçxa'. Txãaçxáa ewtxna jîk.

Jesusa' Geçemanite Dxus yakh puutx we'weni

(Mt 26.36-46; Mr 14.32-42)

³⁹Txajū' Jesusa' ū'na jxã'jçxa', txajū kasehçxa', Oliwos vxíçna ki' u'kh. Aça' txãa yakh u'jusawe'sxwa e'stey u'jtx. ⁴⁰Kxtee pa'jçxa' na'jîk:

—Dxus yakh puutx we'wena me'pwe, ewmeete weteya'mée jîçxa', ⁴¹txãawe'sx tasxu jxul'meekuē txuteena u'jçxa' peejxūkweçxa' na'jînak Dxus yakh puutx we'we:

⁴²—Tata, idxa's ewuweçxte', seena' nxuste uuwa'ju meen nwe'we.

Nawa adx jxthãasni's kxtey yuumeexawa, iidx jxthãasniçxá's kxtey meen yūu jíte', ⁴³Dxus angel cielujūwe'sx kvxiisxal'na kçxhãaçxha'jya' kîjk.

⁴⁴Txã'wēme' wala yuh pxthaa nxusna Dxus yakh puutx we'wena u'pu'k naa pa'ga pē'ç yuhwa ee na'wēsak wala pkaw. ⁴⁵Sa' Dxus yakh puutx we'wena jxã'jçxa' kiiteçxa' u'kh Pedrowe'sxtxi thegya'. Nawa txãawe'sxa' deenitx yu', wala nxusçxa.

⁴⁶Aça' kühçxa' na'wēk we'we:

—¿Kîjxa'kwe de'jé'? Kiiteçxa' Dxus yakh puutx we'wena me'pwe, ewmeete weteya'mée jîk.

Jesusa's preesu'jni*(Mt 26.47-56; Mr 14.43-50; Jn 18.2-11)*

⁴⁷Jesusa' kxtee we'wena nee ūsiyna, nasa wala kūhtx. Aça' Jesus yakh u'jusa Judas yu' txāa nasa yaçte kūhçxa, Jesus tasxte utxaak pukakwette weçxaya'. ⁴⁸Aça' Jesusa' na'jik:

—¿Judas, idxa' Dxus Nçxi'k Nasa Yuusa's weçxani yakh wáa kuuwe'jya'wane'ga? jíte', ⁴⁹Jesus yakh u'jusawe'sxa' Jesusa's pějxtxi:

—¿Txāa nasatxi's kçxilx yakh puiimtha'w? jıtx. ⁵⁰Txajū' Jesus yakh u'jusa teeçxsa yu' sacerdote npiçthē'ja's selpisáa thū'wē's spē'thku paçuwe'sxna. ⁵¹Aça' Jesusa' we'wek:

—Kxtee pa'j yu' yūunu jıçxa', txāa thū'wē spē'thnite jxa'dxçxa', ki' kaywētu'kh. ⁵²Sa' sacerdote npiçthē'j vxite' dxuus yatte thegsawe'sx vxite' judiu nthē'jsawe'sx preesu jxūna u'jya' pa'jsatx we'wek:

—Adxa' çpesweethas i'kwe'sxa' kçxilx petx fxtū atçxawá'kwe adxa's preesu jxūna u'jya' yuwé'? ⁵³Adxa' i'kwe'sx yakh een isath dxuus yatte ūsu', nawa txagaçxhū' yu' tudxa' utxaameeçxa', jxuka çxhi'dxni naa orate yu' pejka preesu'jya' pa'ji'kwe jik.

Jesusa's jiimeeth jına Pedro we'weni*(Mt 26.57-58, 69-75; Mr 14.53-54, 66-72; Jn 18.12-18, 25-27)*

⁵⁴Txajū' Jesusa's tudçxa jxūna u'jtx sacerdote npiçthē'j yatna. Aça' Pedro' Jesus e'ste jxu'j neeyūuçxak u'jna ūsu'. ⁵⁵Kxtee pa'jçxa' patxute ipx yuthçxatx bajçxya' kaçx. Aça' Pedrowa txāawe'sx yakh ih bajçxya' kaçxku. ⁵⁶Aça' teeçx u'y selpisá' Pedro txā'wē ipx pukate bajçxna u'pte', dxi'pte ew thegçxa na'jik:

—Naa piçthē'jwa Jesus yakh u'jusa' jíte', ⁵⁷Pedro' ĩsxıik:

—Adxa' jiimeeth txāa piçthē'j kxsusu'i'kwe txā'sa' jik.

⁵⁸Txajū' txāa e'su' vxitewa uyçxa na'jik:

—Idxwa txāawe'sx yakh u'jusag jíte', Pedro pasçxa':

—Isa, adxa' txāawe'sx yakh u'jusameeth jik.

⁵⁹Txāa skhēwni teeçx orate' vxitek na'jına we'we:

—Īsxıimeete, naa piçthē'ja's uythu Jesus yakh u'jute. Txāa yakh u'jusaçxaxı, Galileajuwe'sxa' jíte', ⁶⁰Pedro pasçxa':

—Kıhne'ga we'we' na'swa jiyuçmeeth. Txā'jına we'wena nee ūsiyna, atalx we'wek. ⁶¹Aça' Jesusa' tuphiçxa Pedro dxi'pte thegte', Pedro' yajkxku Jesus we'weçxa': Açxh atalx we'wemeyna, tekh us ĩsxıijacyā'j yuune'ga jını's. ⁶²Txajū' Pedro' eka kasehçxa seena' wala nxusna ū'nek.

Jesusa's npeevxysxikani*(Mt 26.67-68; Mr 14.65)*

⁶³Txajū' Jesus ūphwe'sxte yupna ūssa yu' weeçx we'wenatx pāpā'. ⁶⁴Sa' yafxtxi tudçxatx dxi'pte uka'ka' na'jına:

—Aan jiyune'ga kim uka'kaçtewa.

⁶⁵Txã'jĩnatx wala kuh jwed we'wena wëesxu'.

Judiu nthê'jsawe'sx tasxte Jesusa's kuutxa'jni

(Mt 26.59-66; Mr 14.55-64; Jn 18.19-24)

⁶⁶Sa' khikhyna sêjêçtê', judiu nthê'jsa sacerdotewe'sx, Dxus leya's kaapiya'jsa txãawe'sx pkhaakheçxatx Jesusa's kxtee kuutxa'jçxa pêjx:

⁶⁷—Mpeeta'sx, idxa' ¿Kristo dxihgá'? jíte', Jesus pasçxa':

—Txã'wêiith jítewa, isane' we'we' sühmeene'kwe. ⁶⁸Sa' i'kwe'sxtxi adx paapêjxwaçwa, pasya'wameei'kwe. Sa' adxa's txhweteya'wameei'kwe.

⁶⁹Nawa açxhüyá'ja' Dxus Nçxi'k Nasa Yuusá' Dxus itxísa pukate kaçxya' u'jwena jík.

⁷⁰Aça' jxukaysa na'wêtx pêjx:

—Na'jĩ'g na', idxa' Dxus Nçxi'kthu jĩne'ga jíte', Jesus pasçxa':

—Txã'wêiith. I'kwe'sxa' isa i'kwe we'we' jík. ⁷¹Aça' txãawe'sx we'weçxa':

—¿Kĩjxa' jwee vxite testigo peejiikxtha'w? Kwe'sx thū'wêju yuutha'w txajx we'wenni's wësê'j jĩ'tx.

Jesusa's Pilato kusete dukhni

(Mt 27.1-2, 11-14; Mr 15.1-5; Jn 18.28-38)

23 ¹Txã'wê yūuçxa' Jesusa's Pilato tasxna jxūna u'jtx. ²Kxtee pa'jçxa' na'jĩnatx pãatxhĩ'kh:

—Naa piçthê'ja' nasatx kaypuba'jna ūstetha'w uy, sa' Romate gobierno's dukhwa'jme'. Sa' Dxus txhitxhçxa kaahnisa adxthu jxkaahwa'jsa jĩ'k jíte',

³Pilato' pêjxku:

—Idxa' ¿judiuwe'sxtxi jxkaahsa dxihgá'? jíte', Jesus pasçxa':

—Txã'wê iith, isag we'we' jík.

⁴Aça' Pilato' sacerdoté npiçthê'jwe'sx nasa jxukaysatx na'wêk we'we:

—Naa piçthê'j yuuwe yuuni's uyu'çmeeth jítewa, ⁵txãawe'sx yu' jweeíçxáatx sus we'wena na'jĩ':

—Judeate nasa jxukaysatx jxuka kaypuba'jna jxã'jaça' txajx we'wenni yakh, Galileaju takhçxa açxha' aysuwa jxuka pekūjuça' txã'wê yūuna jĩ'tx.

Jesusa's Herodes tasxte kuutxa'jni

⁶Txã'wê we'wete Pilato wësê'jçxa', nasatx pêjxku:

—Txãa piçthê'ja' Galileajūwe'sxwáana jĩna. ⁷Aça':

—Txajūwe'sxĩ'k jĩna pta'sxte', Galileate ne'jwe'sx Herodes tasxnk kaah, txãn ensu' Herodeswa Jerusalenteyku ūsu' naa pa'ga. ⁸Aça' Herodesa' Jesusa's uyçxa', wala weçxak, txã'wê Jesusa' kīhwa yu'k jĩni's wësê'jçxa' nyafxíik Jesus yakh puutx uy wēena ūsu', cieluju kīhçxáawa

kaavxya'ja'the! txāawa uyu'nja sūhçxa. ⁹Txajū! Jesusa's kījkihwa wala pējxku, nawa pasme!. ¹⁰Kxteewa sacerdote npiičthē'jwe'sx vxite! Dxus leya's kaapiya'jsawe'sx kūhçxa wala juuna' we'wena yuwee ūstxi. ¹¹Aça' Herodesa' txajx soldauwe'sx yakh Jesusa's weeçx we'wena ahçeçxa jxkaahsa ropa na'wē zhiçxkwesa kaathe'jçxatx npeevxysijkana ūsu. Txā'wē yūuçxak Herodesa' Pilato tasxtey Jesusa's ki' kaah. ¹²Pilato yakh Herodes yakha' nyafxí yu' iipuiisatx yu', nawa txān ente txā'wē yūuçxa' yuwe ewuutx.

Jesusa's ikhwa'j vxitni

(Mt 27.15-26; Mr 15.6-15; Jn 18.39–19.16)

¹³Txajū! Pilato' sacerdote npiičthē'jwe'sx vxite' judiu nthē'jsawe'sx çxhabte nasa jxukaysatx kaapkhakhe'jçxa, ¹⁴na'jīnak we'we:

—I'kwe'sxa' naa piçthē'ja' nasatx kaypuba'jna ūsa' jīçxa adx tasxte nuypa'ji'kwe. Aça' adxa' i'kwe'sx wēsē'jna ūstey jxuka paapējxthu. Nawa kihte yuhwa ewmée yūuni's yu' uymeeth. ¹⁵Aça' Herodeswa ewmée yūuni's uymeeçxa', ki'kin kaasxwedu'kh. I'kwe'sxíwa jiyui'kwe naa piçthē'ja' yuuwesa kasehme!. Aça' çma'wē ikhwa'j yuukx? ¹⁶Txāa pa'ga ikhmée kaapeçxukwe'jçxaçxáa kaatxhweete'je'nja jīte!, ¹⁷⁻¹⁸nasa jxukaysa na'jīnatx sus we'we:

—Naa piçthē'ja's ikhçxa Barabasçxá's mitxhwete jī'tx. (Pilato' anxu iisak txāa fxiestate teeçx preesu txhweeté' nasa weçxaakahn naa pa'gatx txā'jī!.)

¹⁹Txāa Barabas yu' çxhabte gobierno's puí kiisçxa nasatx wala kiikhe'pha'ga karceltek txaahni ūsu!. ²⁰Txajū! Pilato' Jesusa's txhweete wēeçxa nasatx ki' pējxku. ²¹Nawa txāawe'sx yu' jweeíçxáatx sus we'we:

—Kluuste pejka mkaafxuçu'l' yuh jīna.

²²Aça' Pilato' tekh uswa nasatx ki' we'wek na'jīna:

—Naa piçthē'ja' çkihga ewmée yūu? Adxa' makwe paapējçxawa, ewmée yūuni's yu' uymeeth ikhkahn yuua. Txā'wē yuuwesa kasejeçme' aça' kaapeçxukwe'jçxaçxáa kaatxhweete'je'nja jītawa, ²³txāawe'sx yu' jweeíçxáatx sus ūusçxa we'wena kluuste fçuçkaah. Sacerdotewe'sx nasa jxukaysa txā'wē sus we'weni yakhçxáa pejka knaytxi txāawe'sx pēyni's. ²⁴Txajū! Pilato' txāawe'sx pēyni's kxtey yuuk, ²⁵sa' gobierno's puí kiisçxa nasatx kiikhe'jsa yu'sa' karceluh kaakutxi'jçxa Jesus yu'sa' txāawe'sx kusete nvxihtku, kīh yūu wēeçxawa kxtey yuukahn.

Jesusa's kluuste fçuçni

(Mt 27.32-44; Mr 15.21-32; Jn 19.17-27)

²⁶Jesusa's kluuste fçuçya' jxūna u'jweççxa', teeçx piçthē'j Cirenejūwe'sx Simon yaasesa çxhabte pa'jaçte pu'jykhēwçxa', kluusa's txā'sna kxaakhe'jçxatx Jesus e'stey pe'jna u'j. ²⁷Txā'wē yūuya' u'jweçte, nasa

wala kuh u'jweç yu'tx. Txãa ksxavxyte u'ywe'sxwa txã'wêtx wala kuhsa nxusçxa sus û'nena u'l'jna üsu'. ²⁸Aça' Jesusa' txãawe'sxtxi yu'thegçxa':

—Jerusalente u'ywe'sx, adxa's nxusçxa û'ne na'wê' wejx yuuwa i'kwe'sx fxi'zewa'ja's yajkxçxa mnxuswe, i'kwe'sx luuçx pa'gate. ²⁹Txã'wême' naa kiwete nxusu en yuja'. Txãa en pa'the', txãawe'sx luuçx pxthaa yuuçte uyçxa' na'l'jïtxna: Bagaçx yuhwa nasa j'l'phuçxa kçxu'çxu'l'samée yakha' txakwe nxus yuhmeena jïtxna. ³⁰Txajü' nasa' nxusna üukhna vxiç wala upeçxa jxuka ikh jxthãasutxna, sa' thã'l' le'çxkwesatxwa txã'wêy yüu jxthãasutxna. ³¹Fxtüu tasx buçxaçteçxáa yuhwa na'wêtx yü' na' fxtüu tasx ewsa ukawa'l' en ähte yu' wejx txã'wê yüutxna jïk.

³²Jesus yakh ikhya' e'z piçthê'l' wala yuuwesatx jxüna u'l'jtx. ³³Sa' teeçx ahte Uusáa dxikthê dxi'thçxáasa jïnisate pa'l'çxa', Jesusa's kluuskhê ki'ptxi, txã'wêy e'z yuuwesatxwa teeçxsa's paçu, vxite's jebu. ³⁴Txã'wê kluuste fxuçuçte', Jesusa' na'l'jïnak we'we:

—Tata, meen peltunaí adxa's açesawe'sxtxi. Txãawe'sxa' jiimeeçxatx txã'wê yü' jïk.

Txajü' soldauwe'sxa' swerte kaahtx, Jesus athni ropa's maa soldau knaytewa jiyuya'. ³⁵Naapkaçxha' nasa kuhsa kxtee thegna üssa vxite' judiu npiiçthê'l'jwe'sxwa Jesusa's weeçx we'wena npeevxysxijkatx na'l'jïna:

—Vxitetxwa nwe'weya' äjã'k na' açxha' peekí kluusuwa iyuna, Dxus txhitxhçxa kaahnisa dxihçxa' jï'tx. ³⁶Aça' soldauwe'sxwa weeçx we'wena utxaaçxa', vxino ewmeesa's yus wëena ³⁷na'l'jï'tx:

—Idxa' judiuwe'sxtxi jxkaahsa dxihçxa', peekí kluusu iyuçxa msa'l' jï'tx.

³⁸Kluus vxiçte' griego, latin, hebreo yuweju fxi'l'jni na'l'jï'k: Naaí Judiuwe'sxtxi Jxkaahsa' jï'k.

³⁹Txajü' yuuwesa kluuskhê a'kxni u'psa teeçxsa' na'l'jïk Jesusa's iiwëesxuna:

—Idxa' Kristo dxihçxa', peekí kluusu iyuçxa kwe'sxtxiwa meen nwe'we jïte', ⁴⁰vxite' ka'tu pukakhê u'psa yu' na'l'jïnak pas:

—Idxa' yuuwesaçxa txã'wê seena' kastigãyni u'pçxawa, Dxusa's üukhu'çmeewá'ga txã'wê wëesxu'. ⁴¹Kwe'sxa' isa yuuwesayuhtha'w, txãa pa'ga kastigãyni u'ptha'w. Nawa naa piçthê'l'ja' kíhte yuhwa yuuwesa meek yu' jïçxa', ⁴²Jesusa's na'wêk we'we:

—Iidx jxkaahwa'the pa'l'çxa', adxa's yaakine'ga jïte', ⁴³Jesus pasçxa':

—Isath we'we', Dxus üsnite açxhíi adx yakh üsune'ga jïk.

Jesus uuní

(Mt 27.45-56; Mr 15.33-41; Jn 19.28-30)

⁴⁴Txajü' ëepxãh yuuçpkaçxha', naa kiwete jxuka çxhi'dxku kusuçte las trestepkaçx. ⁴⁵Seka' kweethme', naapkaçxha' dxuus yatte txudenisa

liensu pesath a'kxnisal puupxãjkhêk sute. ⁴⁶Naapkaçxha' Jesusa' naljĩnak sus we'we:

—Tata, iidx kusete adx ũusa's nvxiituçthu jĩna'wa uuk.

⁴⁷Txã'wẽ yũute', soldau kpiitan uyçxa', naljĩnak Dxusna weçxa:

—Isa, naa piçthê'ja' yuuwemeesa yuh yu'ga jĩk. ⁴⁸Aça' nasa jxukay kxtee ũssawa txã'wẽ yũute uyçxa', çtxã'wẽ yuja' yuumanx? sũhnatx nxusna ũukhna u'j. ⁴⁹Aça' Jesusa's jiisawe'sx vxite' Galileajũx Jesus yakh yuusa u'ywe'sxa' jxu'juçxáatx thegna ũsu' txã'wẽ yũuçte.

Jesusa's pedaní

(Mt 27.57-61; Mr 15.42-47; Jn 19.38-42)

⁵⁰Kxte' teeçx piçthê'j José yaasesa ũsu'k. Txãa yu' Judea kiwete Arimatea çxhabtewe'sx judiu npiičthê'j walasatewe'sxku yu'. ⁵¹Txãa Jose' isa bagaçx Dxus jxkaajxa' takhekx sũhna ũythassak yu'. Txã'wẽçxafiik vxite judiu npiičthê'jwe'sx Jesusa's ikhya' puutx we'weçte', txãa yu' wa'l. ⁵²Txajũ' txãa Jose' Pilato tasxte u'jçxa Jesus kakwe's pẽjxku. ⁵³Sa' kluusuh spajkçxa liensute yapçxa kwet penxa u'se phaadeni kim yuhwa pedanimeegak khikh. ⁵⁴Txã'wẽ sapatu jxkaasewa'j en jxuka ajãçku yu'. ⁵⁵Aça' u'ywe'sx Galileajũx Jesus yakh pi'kxna yuusa' txãawe'sxwa u'jçxa kwet kafx pedani's uytxi Jesus kakwe's mkaa khikheçtewa. ⁵⁶Sa' yatna sxawedna u'jçxa, Jesus kakwete sxũsxwa'j jxuka pheu'jçxatx sapatu jxkaase ente ki'sna fxi'ze, Dxus jxkaahni's kxtey nwẽesê'j na.

Jesus ki' itxi yuuni

(Mt 28.1-10; Mr 16.1-8; Jn 20.1-10)

24 ¹Jxkaase en skhẽwnijũ kuskuskhẽ wala kusí u'ywe'sxa' Jesus kakwete sxũsxwa'j pheu'jnisa's atçxa pedaní kwet kafxna u'jtx. Vxite u'ywa txãawe'sx yakh ja'da pi'kxna u'jtx. ²Kxtee pa'jçxa', kafxte aphnisa kweta's fxiite ki'pni u'pte uyçxa', ³kafxte u'katx. Nawa Jesus kakwe yu'sa' uymeeta'. ⁴Sa' wala ũukhna ma'wẽ yũuwa'ja's yuuwa jiimeetx ũsu', naapkaçxha' e'z piçthê'jtx ropa zhiçxkwe zmeena' çxihmesa athçxa txãawe'sx pukate vxayaa. ⁵Aça' wala ũukhçxa kiwekhêtx kĩçhu, naapkaçxha' txãa piçthê'jwe'sxa' naljĩtx:

—Uusaawe'sx ksxavxyu itxĩ yuusa's çkĩjxa'kwe pakwé'? ⁶Ayte meeyã'ja'. Uuçxawa ki' itxĩ yuuyã'kh. Galileate ũsçxa' naljĩnak we'we txã'sa' miiyajxwe: ⁷Dxus Nçxi'k Nasa Yuusa's ewmeesawe'sx kusete dukhni yuuna, aç'a' txãawe'sxa' kluuskhẽ ki'pçxa ikhetxna. Aç'a' uuçxawa tekh ente' ki' itxĩ kiiteena çjĩna pta'sxmeená'?

⁸Txã'jĩte' Jesus we'weni's yajkxtxi. ⁹Sa' pedaniijũ sxawedna u'jçxa ma'wẽ uyni'swa jxuka pta'sxtxi oncesatx, sa' Jesus yakh u'jusa vxitesatxwa pta'sxtxi. ¹⁰Txã'wẽ pta'sxsa yu' Maria Magdalena, Juana, Jakobo nĩ'j Maria, vxite' u'ywe'sx ja'da u'jsa txãawe'sxtxi yu'. ¹¹Nawa

Jesus yakh u'jusawe'sx yuutxi' luuku we'weni na'wěçxáane' pthūuse' txāa u'ywe'sx pta'sxnisa yu', aça' isane'ta we'we' sūjū'çmeeta'. ¹²Txā'wētewa Pedro' wuwuuxak thegya' u'j pedaní kafxte, sa' dxiiga kuyçxa', liensuçxá's puçte ki'pni u'pte uyçxa': ¿Txā'wě yuja' yuumanx? sūhna wala kuh yajkxna yatna sxawedku.

Emaus çxhabna u'jsatx Jesus vxyaani

(Mr 16.12-13)

¹³Txāa entey Jesus yakh u'jusa e'zsa' Emaus çxhabnatx u'jweç yu'. Txāa çxhaba' Jerusalenuh once kilometro āh jxu'khak ūsu'. ¹⁴Txāa e'zsa' jū'nakhē kījkih yūuni'swa jxuka yajkxnatx puutx we'wena u'jweç yu'. ¹⁵Txā'wě dxi'the we'wena u'jweçpkaçxha', Jesusa' vxyaaçxáa yuuçxa txāawe'sx yakh ja'da u'kh. ¹⁶Txā'wētewa, txāawe'sx yu' uyçxawa, kimtewa jiyumeeta'. ¹⁷Txajū' Jesusa' pějxku:

—¿Kījke txakwe puutx we'wena u'jwe'? ¿Kīh yuupa'ga txā'wě nxusna u'jweçkwe? jīte', ¹⁸Kleofxas yaasesa teeçxsa' na'jīnak pas:

—Jū'nakhēçxáa Jerualente txā'wě seena' nxus nxus yūunisa's majūwe'sxwa jxukatx jiyu, aça' idxçxáawá'ga jiyumée neeyūu kxtee ūsçxawa jīte', ¹⁹Jesusa' pějxku:

—¿Kīhga yuu? jīna. Aça' txāawe'sxa' pta'sxtxi jxuka:

—Jesus Nasarethūwe'sxa's seena' nxusnxus vxitçxa ikhni'stha'w jī'phu. Txā' Dxus yuwe pta'sxsa kījkih yūuya'wa ājāsak yu', sa' Dxus dxi'pte vxite' nasaa ksxavxytewa txā'wěç ewçxáa yūuna fxi'zesa yu'. ²⁰Txā'wētewa sacerdote npiičthē'jwe'sx vxite' kwe'sx npiičthē'jwe'sx yu' txā'sa' ikhwa'ljçxáa vxitçxa dukhtxi, aça' kluuste fuççxa ikhtxi. ²¹Kwe'sx yu' Israelwe'sxtxi nwe'wewa'jsana sūjū'tha'w, nawa kxtey yuume'. Txā'wě nxus yūuni āçxha' tekhn en yā'j yuuça'. ²²Aça' u'ywe'sx kwe'sx yakh ih pkhaakhena u'jusa maafí yu' pedaní kafxte thegya' u'ljçxa ²³ki' sxawedçxa', kwe'sxtxi khāawāsi'tx txāawe'sx pta'sxçxa': Uusáa kakwe yu's uymeeçxawa, angeleswe'sxçxáatxtha'w uy, aça' Jesusa' itxī yuuk jī'tx jīnatx kwe'sxtxi pta'sx txāa pa'gatha'w ūukh. ²⁴Aça' kwe'sx yakh u'jusa piçthē'j maafí yu' pedaní kafxna u'ljçxa u'ywe'sx ma'wēne'ta pta'sx txā'wěyçxáatha'w uy. Nawa Jesus yu'sa' uymeetha'w jīnatx pta'sx jīte', ²⁵Jesusa' na'wěk we'we:

—Dxus yuwe pta'sxsawe'sx we'weni's nakwe txaçxtewa, jiyuya' ājā'çmée fiçxáai'kwe. ²⁶Kristo' cielute u'kamey, ¿seena' nxus pxthaa yuuwa'jsa yu'çmeená'? jīçxa', ²⁷Dxus libroute ma'wě fxi'jni'swa jxuka pta'sxya' takhku, txā's ma'wě yūuwa'ja'swa Moises we'wenijūjx takhçxa mtee pa'jne'ta Dxus yuwe pta'sxsawe'sx fxi'ljçxa nvxiht kxtee pa'j. ²⁸Sa' txāawe'sx pa'jwa'j çxhabte pa'the', Jesus yu' u'jnik u'jweç yu'. ²⁹Aça' txāawe'sxa' na'jīnatx neevxisxa:

—Kwe'sx yakh ayte me'ka dejxa'. Txā'wēme' kusuçyā'ja' na' çxhi'dxina jīte', Jesusa' txāawe'sx yakh u'kak kxtee dejxa'. ³⁰Sa' txāawe'sx yakh

mesate u'pçxa', Dxusna weçxana'wa pana's pe'ltedeşxa txāawe'sxtxi ūsu'sku. ³¹Txā'wē yūunijūtx kimtewa jiyu. Naapkaçxha' Jesus yu' naa dudte txāawe'sx yafxju vxyaame!. ³²Aça' txāawe'sx pwe'sx na'jīnath puutx pta'sxi':

—Jesusne' yu' aça' isa yuhne' kwe'sx ūuste seena' weçxweçxa ūusuthe' dxi'the yuhçxa Dxus librute fxi'jni's pta'sxiçte' jī'tx. ³³Sa' txāa oratey kiitena'wa ki' Jerusalen çxhabna sxawedçxa Jesus yakh u'jusa oncesawe'sxtxi uyna pa'jtx vxite nasa yakh pkhaakheçxa u'pte. ³⁴Aça' kxtee pkhaakhena u'psa yu' e'zsa Emausu sxawedsatx pta'sxtxi na'jīna:

—Isa, kwe'sxtxi jxpe'jsa' ki' itxī yuuyuhga aça' Simonwa uyka jīte', ³⁵Emausu sxawedna pa'jsawa pta'sxtxi dxi'the ma'wē puutx uyçxa we'weni'swa jxuka, sa' pana's txudedepkaçxha' ma'wē yūuçxa Jesustewa jiyuçxawa jxuka pta'sxtxi.

Jesusa' txāa yakh u'jusawe'sxtxi neewe'weçxa nvxiitni
(Mt 28.16-20; Mr 16.14-18; Jn 20.19-23)

³⁶Txāawe'sxa' kxtee we'wena u'pīyna, Jesusa' txāawe'sx pxāhte vxyaaçxāa yuuçxa na'jīnak weçxa:

—Ūukhmée weçxana meswe jīte', ³⁷txāawe'sx yu': anximusa's ne'tka'w uy sūhçxa ūukhuçtxi yu'. ³⁸Aça' Jesus we'weçxa':

—¿Kīh yuutekwe ūukhú'? Sa' pta'sxte', ¿kīh yuuçxakwe isa yuhna sūjū'cmée? ³⁹Mthegwe adx kuse petx adx çxida yā'lçxa. Vxitemée, adxthu. Aça' adxa's ew jiyuya' mjxa'dxwe. Adxa' anximusmeeçxa', dxi'th ji'phsath, sa' kakwe'swa ji'phsath. I'kwe'sx yafxte ma'wētkā vxya' txāa yu'sa' jxuka ji'pthu.

⁴⁰Txā'jçxa', kuse petx çxida yā'lçxa ktheegu'kh. ⁴¹Nawa txāawe'sxa' kuh yajkxna weçxaniiteçxāa Jesusna sūhna yaakxwa'j yu'sa' ji'phumeeta'.

Txajū' Jesusa' na'jīk:

—¿I'kwe'sxa' ū'wa'j kīhçxāawa ji'phmeekwe'? jīte', ⁴²wedx khakhni pe'la vxite' çxhi'dx mil txā'wēsa'stxi ūs. ⁴³Aça' jxpa'gaçxa' txāawe'sx dxi'pvey uyna ūste ū'k. ⁴⁴Sa' na'jīnak we'we:

—Adxna na'wē yūuk txā'snath adxa' i'kwe'sx yakh nee u'juy pta'sx. Moises ley fxi'jni vxite' Dxus yuwee pta'sxsawe'sx librute fxi'jni vxite' Salmos librute fxi'jni ūsta', adxa's ma'wē yūuwa'ja'swa txā' jxuka kxtey yuuna jīnath pta'sx.

⁴⁵Txajūk Dxus librute fxi'jni's isa ew kaajiyu'j, ⁴⁶sa' na'jīk:

—Kristo' uuwa'jsa', nawa tekh ente' ki' itxī yuuna uusaawe'sx ksxavxyuh. ⁴⁷Aça' txā'wē yūuni's Jerusalenu pta'sxya' takhçxa maa maa kiwetewa jxuka pta'sxixna, kxah nasa' pkaltxi nvxihtçxa Dxus tasxte sxawedte', Kristo' txāawe'sxtxi peltunaīna jīna fxi'jni ūsa'. ⁴⁸Aça' i'kwe'sxa' adx ma'wē yūuçxa ki' itxī yuuni's uysaai'kwe na' txā'sa' pta'sxwa'j ji'phi'kwe. ⁴⁹Nawa mwēesē'jwe: adx Tata i'kwe'sx jīi kaajxa'

neeyũuk txã'sa' kaja'nja jxpa'gakahn. Nawa txã'sa' jxpa'gamey yu', ay Jerusalentee meswe jxpa'gapkaçx jĩk.

Jesus cielun u'jni

(Mr 16.19-20)

⁵⁰Txãa e'su' txãa yakh u'jusawe'sxtxi pe'jna u'kh çxhab eka Betaniate pa'j. Sa' kusetx kiisçxa jxukaysatx bedekĩyku. ⁵¹Txã'wẽ yũuçpkaçxha', cielun pe'jna u'jnik yuu txãawe'sxçxáatx nvxihtçxa. ⁵²Aça' txãawe'sxa' Jesus yuh yu'ga jĩna weçxana Jerusalen çxhabnay wala wẽtwẽt yajkxna sxawedtxi. ⁵³Sa' pu'vxitumeetx dxuus yatte Dxusna weçxana nes yu'.